

येसुए ओसाचीराए यायेन

आव पोस्तोको लूकाए ओसरो ज़। गेप्रभु येसु स्वर्गत ओबाव सोनो छैव पुरुस उपरींव छीनी (ओसाचीर १:१-११; २:१-४१) ओपाँ प्राइँड ज़ ओकेसो आल ज़ रैःज्या। डादा नो पाँ यरूसलेमनी सुरू ताद, नकिन यहूदिया सोनो सामरिया जीदा ब थास्के (१:८; ८:१,४), ननी फरी छुत जातलावराए ल्योड ब केस्के (१०:१-११:१८)। हो बेलाक ज़ मन्दलीराए याखिरी पसिज्याव पावलए परमेस्वरलाई सरेस्द (९:१-१९) मन्दलीरास खैद (९:२६-३०) सोखेप पो पोड बाद परमेस्वरए ओपाँ मिँरालाई सथैद मन्दलीर खदा याजैक्यो (१३:१-१४:२८; १५:३६-१८:२२; १८:२३-२१:१६)। छीनी इन पावल रोम सहर पै केस्द नलावरालाई मनी परमेस्वरए ओपाँ यासथैक्यो (२८:१६-३१)। है जैद येसुए ओसाचीर याकेसो भरिड छैव पुरुस ब यास यास बाद अचम्बलाव सरेसर सतैद्याद यापाँ साचो ज़ थरैद ओरायो सरैःसिउ लिज्या।

1-2 माननिय थियोफिलस ज्यू,

डादाडाव डासरो पोस्तोकोल, येसु ओयेनत उथूसिउकिन स्वर्गत ओबाज्याव छचाम पैकाव ओयेनर ओपाँ प्राइँड ज़ सर्द नैद डाईए। हो छचाम ज़ ओराछाँतिउ ओसाचीरालाई छैव पुरुसए ओसक्तीनी 'आव आव दोच्यो' है दाद याख्यानैक्यो।³ होकिन डादा ज़ बनै दुखस उसिउ छीनी येसु सैसिद चालीस दिन भरी घरी पाला ज़ नोराए याडाक सरैःसिद, 'आव डा ज़' लिद ओसरेसर ब सतैद ओराएज्याव, परमेस्वरए ओराज्यालाव पाँ ब ओरासथैज्याव।⁴ तछा नोरास ज़्यान्याए जूनी दुप्सिद यालिज्याक, "जे यरूसलेम मारासूड डाबाबु परमेस्वरए ओयाकालाई कींद नैचिके। डा जेलाई नो ओयाकाए जूनी डादाकिन ज़ है दाद डानैचिए।⁵ किताव यूहननाए जेलाई रील ओसछैचिउ, हिताव ज़ जाँ छीनी छैव पुरुसनी जेछैरिज्या," है यादोक्यो।

येसु स्वर्गत ओबाव

६नोर तछा दुप्सिद यालिजूयाक उसिसराए येसुलाई, “प्रभु, सैं आव बेलाक ज़ इस्राएलीराए गेराजूया रोमीरानी सोवोल्द नयासिरिजूयाव रो?” है यादोक ते, ७ येसुए, “बेला तोन्या, जुक तोन्या डाबाबु परमेस्वरए उकुइत लिजूया, जे सैन्या ओमेला माले। ८ बुरू जे जेक्याँत छैंव पुरूस उहुक बनै घ्योःव सक्ती दैद यरूसलेमल, यहूदियाल, सामरियाल सोनो नामलाव काना कुनीड पै डासाचीर जेतारिजूया,” है यादोक्यो।

९हाःत ज़ येसु नोराए याड़ाकिन ज़ याचिऊजूयाक ज़ नमदा छीसिद बादलए लुम्बैद मासरैःक्यो। १० नोराए नमदा लँ लँ याचिऊजूयाक होक ज़ उमँःजानी पालो क्वा क्वाइसिउनी नेब्लो याड़ाक च्याँःसिहुकिनी। ११ नोनी, “अ गालीललाव मिँर, काराव नमदा भाल्सिद जेलिजूयाव? नो जेड़ाकिन बाव येसु किताव नमदा उछींसिजूयाव जेरैःव, हिताव ज़ फरी तछा झरिहुरिजूया।”

यहूदाए ओपोल छुतलाई याजैव

१२हाःत ज़ येसुए उसिसर जैतून दाँदातिन झरिद नजिककाव यरूसलेम सहरदा बाकेर। नो दाँदातिन आधा घन्तावाकाव येम उलिजूयाव। १३ सहरल केस्द नोर हाः बेलाकाव यालिजूयाव ओतर्ताव ताललाव कुन्तील बाकेर। नो कुन्तील पत्रुस, यूहन्ना, याकूब, अन्द्रियास, फिलिप, थोमा, बारथोलोमाइ, मत्ती, अल्फयसए ओज़ा याकूब, देसभक्ता सिमोन सोनो याकूबए ओज़ा यहूदास सिप ज़ यालिजूयाव। १४ नोरास नल येसुए ओआमा मरियम, येसुए ओभाइर सोनो येसुसकाव मेंमार दिनकाव ज़ दुप्सिद प्राईए तयुँ जैद पोँखारिउ ज़ यानैजूयाव।

१५तछा यायुँ हुबोर तसय बीसा दुप्सिद यालिजूयाक पत्रुस नोराए याड़ाक च्याँःसिद अइ लिद पाँके, १६ “अ डानैँ डामेँर, आदा

थैचिके। येसुलाई सूपिज्याव यहूदा इस्करियोतए उजूनी भाःकाव धर्मसास्त्रलाव सर्सिउ पाँ भरी योःके। नो पाँ भरी छैव पुरूसए डादा ज़ दाऊद राजाए ओयाःनी है लिद ले। 17 नो मिँ डादा गेस ज़ ओल्यो। आव गेयेनत मनी नोए उजू ब ओल्यो ज़।”

18 नो मिँ येसुलाई क्योःन्या घुस ज्याद नो पैसाए एँः तोबो लँःक्यो। नो एँःल ज़ बाप तेद उभूँदीर पाःद च्याल्नी ब्याल ताद सिके। 19 यरूसलेम सहर भरिल नो पाँ थासूद नो एँःए उमिन या याखामनी आखेल्दामा नैदिकेर। नोए ओअर्थ ‘झीए एँः’।

20 पत्रुस फरी, “होए उजूनी डानैँ डामेरं, भजन पोस्तोकोल इताव सर्सिउ लिज्या,

‘नोए ओपो रितो ओताक,
नल बासिन्या सु ज़ तातारक।’

सोनो,

‘ओदैव येन ब छुतए ओनैँवक।’

21-22 है जैद गेप्रभु येसुलाई रँःव, डादाकिन गेस गेस बारिउ मिँ नोए ओपोल तोबो जैव ताके — गे मिताव ज़ नो मनी येसु सिउनी सैसिद ओसोव साची याधुन्याकाव ओताक। नो मिँ रील सछैँज्याव यूहन्नाए ओपालाकिन येसु स्वर्गत ओबाज्याव पै गेस गेस लिज्याव मिँ ज़ ताव परिके,” है ओरादोक ते, 23 नोराए तोबो योसेफ बारसाबास यादोज्याव (नोलाई युस्तस मनी है यादोज्याव), सोनो तोबो मतियास यादोज्याव, नोनी नेब्लोए निमिन हाइद, 24-25 अइ लिद परमेस्वरलाई पोंखारिकेर, “अ प्रभु प्राइँए युँलाव पाँ सैँज्याव, यहूदाए ते गेसकाव ओयेनलाई ऱासूद सराप दैन्या ओपोल ज़ बाके। है जैद नोए ओरासो येनत आव नेब्लोनी काताकावलाई नैन्या नपैँज्याव, गेलाई सतैँद्याव ताके।” 26 नोनी निमिनत गोला याझाःक मतियासए उमिन परिके। है जैद नो एघार जनात चाःसिके।

2

छैव पुरूस याक्याँत उहुव

1 पेन्तिकोस पर्व हुद उलिज्याव। हो छयाम पोखारिन्याए जूनी येसुए उमिनतावर प्राइँ दुप्सिद यालिज्याक, 2 उमँ:जानी नमतिन बुर बुर फर्लेसिहुज्याव बनै घ्यो:व बतासए ओर्गा मिताव थास्द नो दुप्सिद यालिज्याव झिमल ज तसी ताके। 3 हा:त ज मँ:ए मुल्का स्यासोर रँ:हुद नो मुल्कार आदा होदा रासिनाद प्राइँ याक्याँत ज तोबो तोबो चुसिके। 4 ना:त ज नोर छैव पुरूसए ब्याल्द नो पुरूसए ओरायो मिताव प्राइँ ज छुत छुत खामनी पाँकेर।

5 नो बेलाक पर्वए जूनी प्राइँ राज्यानिकाव यहूदीर यरूसलेमल हुद यालिज्याव। नोर परमेस्वरलाई रँ:द छे:ज्यावर याल्यो। 6 नो घ्यो:व गा थैद मिँर बनै माहोल्या प्राइँनी ज धो:हुद नो झिमलाव दुप्सिउराए यापाँज्याव सु सु याखामनी ज थैद अचम्ब ताकेर। 7 नोर बनै अचम्ब ताद, “आव पाँज्यावर ते प्राइँ गालीललाव मिँर ची सानी। 8 कै जैद आवराए यापाँ सु सु गेखामनी गेथैज्याव? 9 गे ख्वार पार्थीया, मादी सोनो एलामीनी हुवर गेलिज्या। ख्वार फरी मेसोपोतामियालावर, यहूदियालावर, कापादोकियालावर, पोन्तसलावर, एसियालावर, 10 फ्रिगियालावर, पामफिलियालावर, इजिपलावर सोनो लिबिया देसलाव कुरेनी जीदाडावर गेलिज्या। ख्वार फरी रोमनी हुवर ब लिज्यार। 11 (नोर ख्वार यहूदी जातलावर लिज्यार, ख्वार यहूदी धर्म मानिज्याव छुत जातलावर ब लिज्यार।) ख्वार फरी क्रेत तापु सोनो अरब देसनी हुवर गेलिज्या। कै जैद परमेस्वरए ओसक्तीलाव ओदोव येनर सु सु गेखामनी ज यापाँज्याव गेथैज्याव?” है लिकेर। 12 है जैद नोर बनै अचम्ब ताद “आवए ओअर्थ काता ओताव?” लिद या याल सुधिसिकेर। 13 ख्वाराए फरी ल०द, “आवर ते मँ:वर ची सा,” है ब

लिकेर।

पत्रुसए माहोल्यारालाई है ओरादोव

14हाःत ज़ पत्रुस सोनो एघार जना येसुए उसिसर च्याँःसिद पत्रुसए ओर्गा बनै सघ्योःद नो माहोल्यारालाई है यादोक्यो, “अ यहूदियालाव मिँर सोनो यरूसलेमल लिज्यावर, आदा थैचिके। आव जेरँःव भरी पलासूद डायार्चिरिज्या। 15 जे है जेलिज्याव मिताव आवर मँःवर माःक। भर्जा ज़ छकालून्याकाव नौ बजिद ले सानी। 16 आव जेरँःज्याव भरी ते योएल अगमबक्ताए सर्द ओनैज्याव पाँ ची। नोए ओसरो आव ज़,

17“परमेस्वरए है लिज्या, जुक खेमून्या बेलाक डा मिँ भरिराए क्यॉत डापुरूस थुद डाराएरिज्या।

जे खेपा मेंमा जेज़ाराए डापुरूसनी पाँन्या लेर।

जेसकाव धापाज़ाकावराए दर्सनर रँःन्या लेर।

जेसकाव सेरोराए मनी अचम्बलाव मँर मँन्या लेर।

18हो बेलाक डाय्रेन दाज्याव डाबाँदा डाबाँदानीराए याक्यॉत डापुरूस थुद डाराएक नोर डापुरूसनी पाँन्या लेर।

19रोताव नमत छे छे डम्सिउर रँःन्यार डाराजैरिज्या,

उधूँलाव नामल मनी अचम्बलाव सरेसर डासतैरिज्या —

झी स्यासोर, मेंःए मुल्कार, सुम्ला सुम्ला म्किडर।

20परमेस्वर बनै ज़गै मगैवस उहुरिज्याव छचाम ओमाताद

डादा निमीए ओझार ब चुम चुमो तारिज्या,

स्यावै मनी झी स्यासो घ्याम घ्यामो तारिज्या।

21हो बेलाक जोए परमेस्वरए उमिन हाइद ओललाई खिमूज्याव, नो सजानी पुलुसूद बाँचिन्या ले।’

22“जे इस्राएली डानैँ डामेँ भरिए, आव ब सैच्यो। नासरतलाव येसुए परमेस्वरए ओसक्ती दैद जे जेखार्ल ज़ अचम्बलाव येनर सोनो

सरेसर ओदोव जे ज़ जेरें:के। नो ओदोव ओयेननी ज़ परमेस्वरए, 'डा ज़ डापरीं'व लिद जेलाई ज़ थरैव परींचिक्यो। ²³ जे ते झन नो मिँलाई परमेस्वरए डादाकिन ज़ गोईंद ओनैजूयाव मितावनी ज़ नोलाई परमेस्वरए ओपाँ मासैजूयावराए कुइत सँपिद क्रुसत तङ्गैद सै:व जेरापरींके। ²⁴ परमेस्वरए फरी नोलाई सिउनी सोचोइद सिउका सिउ तान्यानी उस्कैक्यो। है जैद नोलाई खादरल काताए ब मानैधुक्यो। ²⁵ नोए उजूनी दाऊद राजाए मनी डादा ज़ धर्मसास्त्रल अइ लिद सर्द नैव,

'डाप्रभुलाई एकतार डास ज़ उलिजूयाव डारें:जूया।

डावोर्दा च्याँ:सिद धुरिद ओयाँजूयावए,

काताए ब डायुँलाई काता माँ:ती माजैधुव।

²⁶⁻²⁷ है जैद डायुँर बनै होलाँ ताद, डाया:ए ब रेंद डापाँजूया।

'डापुरूसलाई सिउराए याल्योल ख्यानैद्यान्या नमाले' लिद,

आव डाजिउत डायुँ हुबो ज़ लिजूया।

डा, छैव नमीलाई खादरल चिउ यान्या नमाले।

²⁸ अजम्बरी जुनील बान्या येम डालाई नपैनाके।

है जैद नँ डालाई नँस ज़ नैद, डायुँर होलाँ जैद्यान्या नले।' "

²⁹ हा:त ज़ पत्रुसए फरी ब है यादोक्यो, "अ डानैं डामेर, साचो ज़ है डालिजूया – गोपुर्खा दाऊद ते डाड ज़ सिद गमल बाके। ओखादर आ:पै गेस ज़ लिजूया। ³⁰ खाली नो मिँ अगमबक्ता ओतावए छींनी हुन्या पाँर ब सैद ओनैजूयाव। परमेस्वरए नोलाई डादा ज़ किर्या झा:द, 'नँ नथोरानी ज़ डाराजूया चलैन्या मिँ डाउथैरिजूया,' है दाद ओनैजूयाव। ³¹ है जैद दाऊदए छींनी तान्या पाँर उरें:व मिताव ज़ ताद ख्रीस सिउनी ओसैसिरिजूयावए जूनी ज़ ओपाँव। है जैद डादा है उलिजूयाव मिताव ज़ ख्रीस सिउराए ल्योल ब मारहिए, ओक्याँ

ब खादरल माचिए। ³² नोलाई ओल परमेस्वरए ज्ञ सोचोइक्यो। नो पाँ रँःज्यावर गे प्राइँ गेलिज्या। ³³ ओबाबु परमेस्वरए येसुलाई मान याद ओवोर्दा चुसिउ परींद ओयाकालाव छैँव पुरूस एक्यो। येसुए नो पुरूसलाई ज्ञ आछिम गेक्याँत थुद्यासिक्यो। नो जेरँःज्याव जेथैज्याव भरी हो ज्ञ। ³⁴⁻³⁵ स्वर्गत पुलुसुद परमेस्वरए ओल्योड बाव दाऊद माःक। नोए उजूनी ब ओल दाऊदए अइ लिद पाँके, 'परमेस्वरए डाप्रभुलाई, 'नसुतुररालाई नखँ धूँल झाःद डामाईवा पै, डावोर्दा चुसिद लिन्के,' है दोक्यो।'

³⁶है जैद जे इस्राएली जातलाव प्राइँ मिँराए आव सैँच्यो, नो क्हुसत जेसैःव येसुलाई ओल परमेस्वरए ज्ञ अजम्बरी जुनी यान्या ख्रीस ब थरैद्यासिक्यो, नाम सोनो नमतावराए गेप्रभु ब जैद्यासिक्यो।"

पत्रुसए ओपाँ थैवराए यायेन

³⁷नो माहोल्याराए पत्रुसए ओपाँ थैद यायुँ माचाव दाद पत्रुस सोनो येसुए छुत ओसाचीरालाई, "ओहो! डादाज्यु भाइर, हिताव ताकिन ते गे कै लिन्या ओताव?" है यारादोक ते, ³⁸ पत्रुसए फरी, "जेपापलाई रासुद परमेस्वरस सखैसिन्याए जूनी जेरुँर तोद येसु ख्रीसए उमिनत रील सछैँसिचिके। हो ताकिन ची छैँव पुरूस परमेस्वरए ल्योनी बरदान मिताव दैन्या जेले। ³⁹ नो पुरूस दैन्या याका जेलाई, जेजारालाई सोनो तादा तादा लिज्यावर, जो जोलाई गेप्रभु परमेस्वरए ओल्योदा खुल्सिउर लिज्यार, होराए जूनी ज्ञ लिज्या," है यादोक्यो।

⁴⁰पत्रुसए कुधु पाँर सथैद, "आव जुकलाव पापी मिँराए ल्योनी पुलुसुद बाँचैसिचिके," लिद यासम्जैक्यो। ⁴¹ हो छचाम पत्रुसए ओपाँ भैःद परमेस्वरए उमिनत चाःसिहुवर सोहजारा याल्यो। नोर प्राइँ ज्ञ रील सछैँसिकेर।

येसुए ओपाँत हुवराए याचलन

42 नोर हाःकिन येसुए ओसाचीरास प्राइँ तोबो झिमलाव मिताव ताद, नोराए यापाँ पैसिद, प्रभु-भोजल दुप्सिद पोखारिउ ज़ यानैज़याव। 43 मिँ भरी प्राइँ छेःवर यालिज़याव। येसुए ओसाचीराए अचम्बलाव येनर, अचम्बलाव सरेसर दाव ज़ यानैज़याव। 44 येसुए ओपाँत हुव भरी ते प्राइँ तोबो झिमलाव मिताव ताद यासकाव लिज़याव भरी दुप्द याखार्त ज़ जैद यानैज़याव। 45 याधन सम्पतीर योःद या या माथैव मायोःवल सघैसिउ ज़ यानैसिज़याव। 46 दिनकाव ज़ ध्यान झिमल दुप्सिद ननी भाःसिद याबावत झिम झिमक यानैरास दैसिद या याल बनै खैद रेंद काँर ब सिप याज़युज़याव। 47 परमेस्वरए ल्योदा खुसी ताद परमेस्वरए उमिन ब सघ्योःद याएज़याव। मिँराए ब नोरालाई चाव ज़ यारारँःज़याव। है जैद यार्युँ हुपुज़यावर परमेस्वरए दिनकाव ज़ याबगालल चाःद ओराएज़याव।

3

येसुए उमिननी तोबो घ्याँस्या सोजोकाव ओताव

1 तछा पोखारिन्या बेलाक तीन बजेवाक पत्रुस सोनो यूहननानी ध्यान झिमदा निबाज़याव। 2 हो बेलाक तोबो जर्मननी ज़ घ्याँस्या ताव मिँलाई ओनैराए ध्यान झिमदा घुर्द यालाँज़याव। नो मिँ दिनकाव ज़ 'चाव' यादोज़याव यामक चुसिद ध्यान झिमल पसिज़यावरास पैसा उनिज़याव। 3 पत्रुस सोनो यूहननानी ध्यान झिमल निहुज़याव रेंद नो मिँए नोनिस ब निक्यो। 4 हाःत ज़ पत्रुसए, ओनै यूहननास, नोलाई चिऊद, "आदा भाल्सिन्के," है ओदोक ते, 5 नोए, 'कातार याँनी सै' लिद उयुँ नदा ज़ झाःक्यो। 6 पत्रुसए फरी, "डास सुन चाँदी ते माले, खाली जो लिज़या, हो ज़ डाईरिज़या। नासरतलाव येसु ख्रीसए उमिननी च्याँःसिद बान्के," है दाद, 7 नोलाई वोर्फताव उकुइनी क्योःद ओसोचोइव प्राइँना ज़ उखँर पलास्सिद, 8 नो फुतु ज़ोःद च्याँःसिद आदा होदा लिके। पत्रुस

सोनो यूहन्नानिस ध्यान झिमल पसिद बनै ज़ोःद परमेस्वरए उमिन सघ्योःद 'धन्या धन्या' है ल्यो ज़ लिके। 9 परमेस्वरए उमिन निताव सघ्योःद ओबारिज़्याव रँःद ध्यान झिमल लिज़्याव मिँ भरिए नोलाई सरैस्द, 10 “ओहो! आव ते नो 'चाव यामक' चुसिद निज़्याव घ्याँस्या ची सानी। कै जैद बाधुन्या ओताव?” लिद अचम्ब ताकेर।

पत्रुसए ध्यान झिमल है ओरादोव पाँ

11 हाःत ज़ मिँ भरी बनै अचम्ब ताद नो ध्यान झिमलाव सोलोमन मैरा यादोज़्याव ल पत्रुस सोनो यूहन्नानी निल्योक धोःहुकेर। हाःपै नो गराँव घ्याँस्या ओरेंतए नोनिलाई लापूद उनिनैज़्याव। 12 पत्रुसए मिँर याहुज़्याव रँःद नोरालाई, “अ इस्राएली डादाज्यु भाइर, काराव आवलाई रँःद अचम्ब ताद जेलिज़्याव? सैं गिनलाई, 'नी निसक्ती नितपसनी ज़ सोजोकाव निजैव ताखेहो,' है लिद जेचिऊसिज़्याव रो? 13 गोपुर्खा अब्राहाम, इसहाक सोनो याकूबराए यापरमेस्वर, ओल ज़ आज्याल ओज़ा येसुलाई ज़गै मगै जैक्यो। नो येसुलाई जे ते झन सँपिद सैःन्या जेथरैके। पिलातसए नोलाई रासो ओपैज़्यावत ब जे भैःद जेमाएके। 14 है जैद ओखत माल्यो छैँव मिँलाई अनाकल ज़ भीःद झन होए ओपोल मिँ सैःज़्यावलाई रासो परींद, 15 प्राइँए गेस० झाःद्याज़्याव गेधर्मीलाई जेसैःके। नोलाई फरी परमेस्वरए सिउनी ओसोचोइव गे गेमीए ज़ गेरँःके। 16 नो है डालिज़्याव येसुए उमिननिकाव सक्तीए ज़ आव जेरँःज़्याव जेसरेसूज़्याव मिँ सोजोकाव ताद ले। नो येसुए उमिनत गिनयुँ गिन्सुहुबोनी ज़ आल जेड़ाक ओक्यार्र हालाँ होलों गराँद ले।

17 “आव ब ड़ासैँज़्या डाँनै ड़ामेर, जेघेपपाराए यादोव मिताव ज़ जे मनी येसुए ओक्याँताव जेदोव भरी मासैंद ज़ जेदोके। 18 हुनी ज़ अगमबक्तराए यायाःनी ड़ादा ज़ 'ख्रीसए दुखर दैन्या ले' लिद

ओपाँव पाँर योके। ¹⁹है जैद जेपापलाई क्याल्नुयाए जूनी जेयूर तोद परमेस्वरए ल्योदा सखैसिचिके। हो ताकिन ची परमेस्वरए युँलाई होलाँ जैद्यान्या असिकर जेक्याँत जैद्याद, ²⁰जेजूनी डादाकिन ज़ खतैद नैद ओयाचिउ येसु ख्रीसलाई फरी तछा परींद्यान्या ले। ²¹खाली नोकिन डादा आव नाम नमलाव परमेस्वरए ओयेन भरी दाद ओमातुपैवा पै येसु स्वर्गत ज़ लिन्या ले। नो बेलाए जूनी परमेस्वरए भाःकिन ज़ छैँव अगमबक्ताराए यायाःनी है ल्यो ज़ उलिज्याव। ²²मोसाए मनी अइ लिद पाँके,

‘जेजातलाव मिँराए याखानी ज़ परमेस्वरए जेजूनी तोबो डा मिताव अगमबक्ता उथैद्याचिरिज्याव। जे नोए ओपाँ भरित बनै धिद ल्यो ताके।

²³जोराए नोए ओपाँ माभैःर होराए यामिन ओपोःस ज़ परमेस्वरए ओथोनी क्याल्सिन्या ले।’
²⁴“हो मिताव ज़ अगमबक्ता भरी, समूएलए ओपालाकिन छींनीकाव पाला पैकावर प्राइँए आव बेलाए जूनी ज़ पाँकेर। ²⁵नो अगमबक्ताराए याथोर जे ज़ जेतावए नो जेजिज्यु बाज्युरास परमेस्वरए ओनैव बाचालाव पाँ भरी जे जेक्याँत ज़ हुके। नो पाँ डादा परमेस्वरए अब्राहामलाई अइ लिद एक्यो,
 ‘नँ नथोरानी ज़ मानुवाताव प्राइँ जातलाव मिँराए असिक दैन्या लेर।’

²⁶है जैद जेदोज्याव पापरानी फकैद असिकर यान्याए जूनी परमेस्वरए ओसेवा दान्या उथैद ओनैज्याव येसुलाई उस०कत जे जेल्योक ज़ परींद्याचिक्यो,” है यादोक्यो।

4

पत्रुस सोनो यूहन्नानिलाई घ्योःव कचरील यारालाँव
 1हाःत ज़ पत्रुस सोनो यूहन्नानी माहोल्यारास निपाँज्याक ज़

ध्यान झिमलाव पाल्याराए कप्तान, नलाव पुजारीर सोनो सदुकीर नोनी निल्योक केसहुकेर। 2 पत्रुस सोनो यूहन्नानी 'येसु सिउनी ओसैसिउए छुत सिउर ब सैसिन्या लेर' लिद थरैद निराएज्यावए नोर बनै यारिस चोके। 3 है जैद नोनिलाई क्योःद जाँ रिमदा रिमदा ओतानावए हो पराःती खोलेःन्याए जूँनी इयालखानाल यारानैकेर। 4 हैदी मनी नोनी निपाँ थैज्यावरानी कुधुए भैःद येसुए ओपाँत चाःसिहुकेर। नो डादाडाव भैःज्यावरास प्राइँ जैद पाँच हजारा तानाकेर।

5हो पराःती यहूदीराए याघेपपार, यासेरर सोनो सास्त्रीर प्राइँ यरूसलेमल दुप्सिद यालिज्याव। 6 नोरास प्रधान पुजारी हननास ब उलिज्याव। नोस फरी कैयाफा, यूहन्ना, अलेक्जेन्दर सोनो छुत नोए ओखलकलाव घेपपा पुजारीर ब यालिज्याव। 7 नोराए पत्रुस सोनो यूहन्नानिलाई घ्योःव कचरी डाक यारासच्याँक नो घेपपाराए नोनिलाई खोलेःद, "आव घ्याँस्यालाई काताए ओसक्तीनी, सुए उमिननी जिन्सगराँव?" है यारादोक ते, 8 पत्रुस छैँव पुरुसए ब्याल्द, "अ यहूदीराए याघेपपार, यासेरर, 9 गिन आव घ्याँस्यालाई गिनयुँ नाद गिन्सगराँवए जूँनी जेखोलेःसिज्याव ताकिन, गिन नोलाई कै जैद गिन्सगराँव लिंक ते, 10 जे सोनो इस्राएली भरिराए आव सैच्यो — जे क्रुसत जेसैःव, परमेस्वरए सिउनी ओसोचोइव नासरतलाव येसु ख्रीसए उमिननी आव मिँ जेडाक सोजोकाव ताद च्याँःसिद ले। 11 धर्मसास्त्रलाव आव पाँ होए उजूँनी ज़ सर्सिउ लिज्या — 'भुलीराए कान्ल ज़ माज़्यासे लिद याख्याव लुँ नो ज़ झन भुयारलाव लुँ ताके।'

12 है जैद पापए सजानी पुलुसन्त्या उपुर सुए ओल्योनी ब माले। गे मिँरालाई अजम्बरी जुनी दैन्या मनी आव मानुवाताव मिन भरिरानी उपुर सुए उमिन ब यासिउ माले," है यादोक्यो।

13पत्रुस सोनो यूहननानी निलेखा प्री काता ज़ ओमालिदी ब नियुं हुपुद पक्कास निपाँजूयाव रँ:द नो कचरीलाव घेपपार बनै अचम्ब ताद, 'आवनी ते येसुसकावनी ज़ निल्यो' लिन्या थरैकेर। 14 फरी नो निसगराँव मिँ ब याड़ाक सोजोकाव ज़ च्याँ:सिद उलिजूयाव रँ:द कातानी ज़ मापाँधुद थाम थुम ज़ ताकेर। 15 है जैद नोनिलाई कचरीनी लाँ:दा पले:द या याज़ जलफल दाद, 16 "आवनिलाई कै जैन्या ओताव? आवनी तोबो अचम्बलाव येन निदोव यरूसलेम भरी प्राईँ सैजूयार, नो पाँत 'मा:क' है गेमालिधुइ। 17 खाली नो पाँ झन आदा होदा माफीजैन्याए जूनी नोनिलाई हपूकैद, 'येसुए उमिननी सुरास ज़ तापाँचिन' है लिद अर्थैव ताके," है लिन्या थरैकेर।

18 है जैद नोनिलाई कचरील फरी ब खुल्द रैद, "जिन अबकिन येसुए उमिननी सुलाई ज़ काता पाँर सथैन्या ब मा:क, पैन्या ब मा:क," है लिद याराअर्थैकेर। 19 हा:त ज़ पत्रुस सोनो यूहननानी, "परमेस्वरए उयुं किताव उलिजूयाव, जे ज़ सैचिके — जे जेपाँ दान्या सै ओल ओपाँ दान्या? 20 गिन ते गिन्थैव सोनो गिन्रँ:व भरी कै जैद मापाँन्या?" है निरादोक ते, 21 नो घेपपाराए फरी ब यारासिडाकैर। खाली मिँ भरिए नोनी निदोव येनत परमेस्वरए उमिन बनै सघ्यो:द यापाँजूयावए नोनिलाई कैज़ माजैधुद यारारास्केर। 22 निताव अचम्बलाव येननी निसगराँव मिँ ते चालीस बर्सकिन यादाडाव ओल्यो।

येसुए ओपाँत बाजूयावराए यापोंखारिउ पाँ

23पत्रुस सोनो यूहननानी निरास्सिउ छीनी निनैराए ल्योक बाद नो मुख्या पुजारीर सोनो यहूदीराए यासेरराए है यारादोव भरी है यारादोकिनी। 24 नोराए निपाँ भरी थैद प्राईँ तयुं जैद परमेस्वरलाई अइ लिद पोंखारिकेर, "अ गेप्रभु, आव नाम नम सोनो रीर जैजूयाव

नँ ज़। नलाव लिज़्याव भरी जैज़्याव ब नँ ज़। 25 नँ छैव नपुरूसनी
ज़ ननोकोर गेपुर्खा दाऊद राजाए ओयाःनी अइ लिद नपाँके,
‘मानुवाताव मिँर काराव यारसिज़्याव?’

काराव अनाकलाव येनत बुद्धी याकलैज़्याव?’

26मानुवाताव राजार सोनो मिँराए याघेपूार

प्राइँ दुप्सिद परमेस्वर सोनो छाँतिद ओनैज़्याव ख्रीसकिन तँदा
जैसिकेर।’

27साचो ज़ प्रभु, आव सहरल ज़ हेरोद सोनो पन्तियस पिलातसनी
छुत जातलाव मिँर सोनो इस्राएलीरास खैद, छाँतिद ननैज़्याव छैव
नज़ा येसुकिन तँदा जैसिद, 28 नँ डादाकिन ज़ नयुँल गोइँद नरायो
येन ब दोनाकेर। 29 अब ते, गेलाई हपूकैद सचेव यापैँज़्याव नँ ज़
चिऊके, प्रभु। सोनो गे ननोकोररालाई ब नपाँ सथैन्या माछेद ज़
पाँन्या जैसियो। 30 नो गेरासथैज़्याव पाँत फरी नँ नसक्तीए ज़ छैव
नज़ा येसुए उमिननी याजोरो हुवर ब ओगरारक, अचम्बलाव सरेसर,
अचम्बलाव येनर ब ओतारक,” 31 है लिद पोंखारिकेर। हो प्राइँना
ज़ नो दुप्सिद यालिज़्याव झिम बनै थोनोःसिद, छैव पुरूसए ब्याल्द
प्राइँए परमेस्वरए ओपाँ माछेद ज़ यारासथैनाकेर।

येसुए ओपाँत बाज़्यावराए प्राइँ याखार्त ज़ याजैव

32येसुए ओपाँत बाज़्यावर प्राइँ खैद तोबो युँस ज़ यालिज़्याव।
यासकाव लिज़्याव भरी ब प्राइँ याखार्त जैद ‘आव डामीं ज़’ है लिद
सुए ज़ है यामालिज़्याव। 33 येसुए ओसाचीराए फरी बनै सक्तीस,
‘येसु सिउनी सैसिद स्वर्गत बाके’ है लिद प्राइँलाई ज़ सथैद प्रभुए
ओसाची याराएज़्याव। उपुर्काव येसुए ओपाँत लिज़्यावरालाई
मनी परमेस्वरए ओअसिक याक्याँत ज़ ओताज़्याव। 34 याखार्ल
माथैव मायोव मिँर ब सु ज़ यामालिज़्याव। याझिम, याएँ: ल्योर

नो भरी योःद ओएः भरी रैद, ³⁵ नो पैसार येसुए ओसाचीराए ल्योक यादुपूज्याव। सोनो जोल चाहिजूया होल नो पैसार भाःद योराएजूयाव।

³⁶हाः बेलाक नोरास तोबो साइप्रस तापुनी हुव लेबी थरलाव योसेफ यादोज्याव उलिजूयाव। येसुए ओसाचीराए नोए उमिन बारनाबास नैदिकेर। (नोए ओअर्थ 'युँ सझेंःद्यान्या'।) ³⁷ नोए पाला तोबो ओएँःलाई योःद ओएः भरी येसुए ओसाचीराए ल्योक लाँक्यो।

5

हननिया सोनो सफीरानी

¹फरी तोबो हननिया यादोज्यावए ओजूया सफीरास निँः तोथो योःद, ²ओरेए नो एँःए ओएः ओजूयासकाव निसल्लाए तभा ओलस नैद उपुर्काव भरी येसुए ओसाचीराए ल्योक लाँक्यो। ³ ओसाचीराए ल्योक ओरैव प्राइँना ज़ पत्रुसए, “ए हननिया, कै जैद सैतानए नयुँल पसिद छैँव पुरूसलाई धुतैव उपरीनिजूयाव? नो एँःए ओएः तभा नँस नैद ‘आःज़’ है नलिजूयाव। ⁴ नो एँः ड़ादा नँ नमीं ज़ ओल्यो। योःद ओएः भरी जो नजैदी ब नमाहाँ ज़ ओल्यो। कै जैद नयुँल इताव नचेतैव? नँ गेलाई नधुतैसिजूयाव माःक, परमेस्वरलाई नधुतैजूयाव ची,” है दोक्यो।

⁵हननिया नो पाँ भरी ओथैव प्राइँना नक ज़ थलिद सिके। नो थैवर प्राइँ ज़ बनै छेःकेर। ⁶ हाःत ज़ नक लिजूयाव धापाज़ाकावराए नोए ओमोरोलाई क्वाए लुम्बैद गादैनाकेर।

⁷नो भरी ओताव सोधन्ता छीनी हननियाए ओजूया सफीरा मनी नक हुके। ओरेलाई अइ ताके लिन्या काता ज़ ओमासैजूयाव। ⁸ हाःत ज़ पत्रुसए, “नो जिन्योःव एँःए ओएः आःज़ रो?” है ओदोक ते, नोए, “नाः ज़,” है दोक्यो। ⁹ नकिन पत्रुसए फरी, “जिन ज्या-रीए काराव परमेस्वरए उपुरूसलाई उयुँ कोला कोला जैद्यान्या बुद्धी जिन्कमैव? दे, नरेलाई गादैना बावर यामक ज़ हुद लेर। नँलाई मनी

लाँद गादैनिरिज्ञयार,” है ओदोव प्राइँना ज़, ¹⁰नो मनी होक ज़ थलिद उस० फ्याःके। हाःत ज़ नो ओरेलाई गादैना बाव छोर्यार खादरनी ओल्द हुद झिमल यापसिक ओज्यालाई मनी सिउ ज़ दैकेर। नोलाई मनी लाँद ओरेए ओलापक ज़ गादैकेर। ¹¹नो पाँनी ज़ मन्दली भरी सोनो उपुर्काव थैज्ञयाव मिँ भरी ब बनै छेःकेर।

येसुए ओसाचीराए याजोरो हुवरालाई यारासगराँव

¹²हाः बेलाक मिँराए याखार्ल येसुए ओसाचीराए याक्याँनी ज़ अचम्बलाव सरेसर ओताज्ञयाव। येसुए ओपाँत लिज्ञयावर प्राइँए तयुँ जैद ध्यान झिमलाव सोलोमन मैराल दुप्सिउ ज़ यालिज्ञयाव। ¹³उपुर्काव मिँराए नोरालाई बनै घ्योःव यारामानिदी ब नोरास खदेप लिन्या याछेःज्ञयाव। ¹⁴हैदी ब कुधु मिँर, खेपा मेमा प्राइँ प्रभुए ओपाँत चाःसिहुव ज़ यालिज्ञयाव। ¹⁵मिँराए, “याजोरो हुवराए याक्याँत पत्रुसए ओसाँ वाज़ उपरिदी ब गराँन्या ज़ लेर,” लिद नो याजोरो हुवरालाई याझेलोङ्गा यातैरास पत्रुसए ओयेमक यारानैज्ञयाव। ¹⁶यरूसलेम सहर लापजीकाव नाखार नाखारलाव मिँराए मनी याजोरो हुवर सोनो माचाव पुरूसराए क्योःद यारानैज्ञयावरालाई येसुए उसिसराए ल्योक यारारैक नोर मनी यागराँज्ञयाव।

येसुए ओसाचीराए याखिरी यापसिनाव

¹⁷छींनी प्रधान पुजारी सोनो ओलसकाव सदुकी दललाव ओनैराए येसुए ओसाचीरालाई रँःद यामी बनै तूद, ¹⁸नोरालाई क्योःद इयालखानाल याराझाःकेर। ¹⁹हो छ्याम रील परमेस्वरए ओचाक्या हुद इयालखानालाव ग्रामर फैद्याद नोरालाई पलेःद, ²⁰“जे ध्यान झिमल बाद प्राइँए याङ्काक च्याँःसिद आव साःरो जुनीए जूनी ओपोःस ज़ यारासथैचिके,” है दाद याख्यानैक्यो। ²¹नोए है ओरादो पाँ भैःद नोर नम उसँनाक ध्यान झिमल बाद मिँरालाई

यारासथैकेर ।

हो छचाम ज़ छकालून्या प्रधान पुजारी सोनो ओलसकाव लिज्याव ओनैराए इस्राएल देसलाव यासेररालाई घ्योःव कचरील दुप्द तोबो नेब्लो यासिपाईरालाई नो इयालखानाल लिज्याव येसुए ओसाचीरालाई चानाव यारापरीकेर । 22 नोर बाद इयालखानाल सुलाई ज़ यामारादैवए ननी ओल्द बाद नो घेपपारालाई, 23 “गे इयालखानाल गेबाक प्राइंत ज़ तालकुची झाःसिउ लिज्या, पाल्यार मनी ग्रामक च्याँःसिउ ज़ लिज्यार । खाली ग्राम फैद नल गेराचिऊक ते सु ज़ मालेर,” है यारादोक ते, 24 नो ध्यान झिमलाव पाल्याराए याकपतान सोनो मुख्या पुजारीराए नो पाँ थैद, “अब कै तान्या ओताव?” लिद यार्युँ बनै आँचानी पाँचा ओताज्याव । 25 हो प्राइँना ज़ याल्योक तोबो मिँ हुद, “दे, नो इयालखानाल जेराझाःव मिँ ते ध्यान झिमल ची च्याँःसिद प्राइँलाई ज़ येसुए ओपाँ यारासथैज्यार,” है ओरादोक ते, 26 नो ध्यान झिमलाव कपतान उसिपाईरास लाला लुलु बाद नोरालाई ननी कचरी झिमल चावस ज़ यारारैकेर । “मिँराए गेलाई लुराए प्रोसिर्या,” लिद जबरज्यासती क्योःन्या याछेःज्याव ।

27 नो घ्योःव कचरील दुप्सिउ सेरराए याड़ाक फरी ब यारासच्याँवत नो प्रधान पुजारीए, 28 “गे जेलाई ‘येसुए उमिननी काता पाँर ब तारासथैच्यो’ है गेदाचिउ सैं माःक? जे ते झन नोए ओपाँ यरूसलेम भरिल फीजैद, नोलाई यासैःव गल्ती ब गे गेडैत झाःव जेपैज्या,” है ओरादोक ते, 29 पत्रुस सोनो येसुए छुत ओसाचीराए, “मिँराए यापाँकिन बुरू गे परमेस्वरए ओपाँ भैःव ताके । 30 नो क्रुसत तङ्गैद जेसैःव येसुलाई गेजिज्यु बाज्युराए यापरमेस्वरए ज़ सिउनी सोचोइक्यो । 31 नोलाई ज़ फरी परमेस्वरए स्वर्गताव प्राइँरानी ओमान ल्यो झैःव पोल नैद गेराजा जैद्यासिक्यो, पापनी रासन्या ब जैद्यासिक्यो । गे इस्राएलीरालाई गेयुरँ तोद्याद गेपापर क्याल्द्यान्या

ओल ज़ लिज़्या। ³²गे फरी नो पाँ भरित ओसाचीर गेलिज़्या। खाली गे वाज़ माःक, छैव पुरूस ब लिज़्या। नो पुरूस गे परमेस्वरए ओपाँ भैःज्याव भरिरालाई गेक्याँत ज़ याद नैसिउ,” है यारादोकेर।

गमलिएलए ओसल्ला

³³नो घ्योःव कचरीलाव मिँराए पत्रुसए ओपाँ भरी थैद यायुँर बनै कोला कोला ताद नो उसिसरालाई सैःव पैकेर। ³⁴हाःत ज़ तोबो यासकाव गमलिएल यादोज़्याव नो कचरीराए याड़ाक च्याँःसिके। नो मिँ बनै मान दैव फरिसीरासकाव कानुनलाव यागुर्बा ओल्यो। है जैद नोए येसुए उसिसरालाई तखेप लाँःदा पलेःव परींद नो घेपूपारालाई है यादोक्यो, ³⁵“अ इस्राएली डानैर, आवराए याक्याँत जेदोरिज़्याव येन बनै जोगोइसिद वाज़ दोच्यो। ³⁶नो तालाडाव थुदासए मनी तघरीत ज़ उमिन बनै सघ्योःद ओल्योदा चार सयवा मिँर याजैक्यो। छीनी नोलाई यासैःवत उमीर प्राइँ चितराँ पुतराँ ताद उमिन ज़ माके। ³⁷नकिन फरी नो गालीललाव यहूदाए मनी, जनसंख्या यासर्ज्याव बेलाक, मिँरालाई सर्बा ज़ ओल्योदा याजैक्यो। नोलाई मनी यासैःक उमीर आदा बाकेर लिन्या ज़ माताके। ³⁸है जैद आछिम डा जेलाई आव सल्ला डायचिज़्या — आव मिँरालाई कैज़ ताराजैच्यो, बुरू यारारासचिके। आवराए याबिचार यायेनर अइज़ मिँनिकाव हुव ताकिन नो ओलनी ज़ मान्या ले। ³⁹नो यायेन फरी परमेस्वरनिकाव हुव ताकिन जे वैंधुन्या जेमाले। इन परमेस्वरकिन तँदा जैसिद ओलस लरै जेदोज़्याव मिताव तान्या ले,” है ओरादोक ते, ⁴⁰नोराए नोए ओपाँ भैःद येसुए ओसाचीरालाई फरी ब याल्योक खुल्द, “येसुए उमिननी काता पाँर ब तारासथैच्यो,” लिद हपूकेद रीःद अइज़ यारारासकेर। ⁴¹नोर नो कचरीनी पुलुसुद, ‘परमेस्वरए गेलाई येसुए उमिनत दुख सहिन्या स्यासोर ओथरैसिउ ओल्यो’ लिद बनै रेंए रेंए बाकेर।

42नकिन दिनकाव ज़ ध्यान झिमल सोनो मिराए झिम झिमक दुप्सिद, “येसु परमेस्वरनी हुव ख्रीस ज़,” लिद चिम मादाद सथैव ज़ यारानैकेर।

6

सात जना सधैन्यार

1हाः बेलाक येसुए ओपाँत बाजूयावर सर्बा याबाऩावत यासकाव ग्रीक पाँज्याव यहूदीर हिब्रू पाँज्याव यहूदीराए याडैत जाँ यारूम्रूमैजूयाव। हिब्रू पाँज्याव यहूदीराए माथैव मायोऩवरालाई दिनकाव ज़्यावर भाःद याराएक कैताक ग्रीक पाँज्याव राँदी मेंमारालाई बलेंद याराख्यानैजूयाव। 2 है जैद बाह्व जना येसुए उसिसराए परमेस्वरए उमिनतावरालाई दुप्द, “गे परमेस्वरए ओपाँ सथैजूयावराए नो गेध्यावनालाई रासूद ज़्यावर भाःद्यान्या जाँ माजूयासे। 3 डानैं डामेर, बुरू जे ज़ नो येन चलैन्यात जे जेखानी ज़ सात जना यातह ल्यो छैव पुरूसए ब्यालो यामान ल्योरालाई याराखतैचिके। 4 गे ते परमेस्वरलाई पोखारिद ओपाँ सथैन्या ध्यावना वाज़ गेदोरिजूया,” है यारादोक ते, 5 प्राइँए ज़ भेंःद नोरालाई याराखतैकेर। उसंक्तावए उमिन स्तिफनस। नो मिँ परमेस्वरए ओपाँत बनै थंरिउ, छैव पुरूस दैव मिँ ओल्यो। नकिन फिलिप, प्रखरस, निकनोर, तीमोन, पर्मिनास, सोनो एन्तिओखिया सहरनी हुद डादा ज़ यहूदी जैसिउ निकोलाउसलाई ब जैकेर। 6 आव भरिरालाई येसुए ओसाचीराए याल्योक यारारैक, नोराए पोखारिद असिक निद्याद याकुइ याडैत झाःद याराएकेर।

7परमेस्वरए ओपाँ इन ज़ फैलिद, यरूसलेमल येसुए ओपाँत हुजूयावर बनै ज़ याबाऩजूयाव। पुजारीर मनी कुधुए ज़ यायुँ उहुपूजूयाव।

स्तिफनसलाई याक्योःव

8नो स्तिफनसए परमेस्वरए ओअसिक सोनो ओसक्तीर ओक्याँत

ओतावए, मिंराए खार्ल बनै अचम्बलाव येनर ओदोज्याव। ⁹ हो बेलाक ज़ यरूसलेम सहरल 'फुर्सुल ताव' है यारादोज्याव यहूदीराए धर्मसास्त्र झिम तोबो जैद यानैज्याव। नोर ख्वार कुरेनी सोनो अलेक्जेन्द्रिया सहरनी हुवर, ख्वार किलिकिया सोनो एसिया खन्दनी हुवर यालिज्याव। नोर स्तिफनसकिन तँदा जैसिद नोस खर्लेसिउ ज़ यालिज्याव। ¹⁰ खाली स्तिफनस परमेस्वरए उपुरूसनी ओदैव बुद्धीनी ओपाँवए नोराए ओपाँ जात ज़ मापलत्तैधुकेर। ¹¹ है जैद नोराए अनाकलाव पाँर ससैद, " 'आव मिँ मोसाए उउपर्त सोनो परमेस्वरए उउपर्त माचाव ओपाँज्याव गे ज़ गेथैके' है लिचिके," लिद मिंरालाई यारामचैकेर। ¹² नोराए माहोल्यार, यहूदीराए यासेरर सोनो सास्त्रीरालाई मनी यारामचैकेर। नकिन प्राईँ ज़ स्तिफनसए ल्योक हुद नोलाई क्योःद, नो घ्योःव कचरीलाव घेपपाराए डाक लाँद सच्याँकेर। ¹³ नोए उज्जनी ख्वार धुत गोहाईर जैसिद, " 'आव मिँ एकतार ज़ गेध्यान झिम सोनो मोसाए ओकानुनए उउपर्त पाँव ज़ लिज्याव। ¹⁴ आवए ते झन, 'नो नासरतलाव येसुए ध्यान झिमलाई तैःद, मोसाए ओयासिउ चलनर ब त्तोद्यान्या ले,' इताव पाँर है उलिज्याव ब गेथैके," है लिकेर। ¹⁵ हाःत ज़ नो घ्योःव कचरील दुप्सिद लिज्याव भरिए स्तिफनसलाई लँ लँ याचिऊक ओडाः परमेस्वरए ओचाकर्याए ओडाः मिताव ज़गै ज़गैव रँःकेर।

7

स्तिफनसए ओरायो जवाप

¹हाःत ज़ नो घ्योःव कचरीलाव प्रधान पुजारीए, " 'आव नडैत झाःद याईज्याव पाँर साचो सँ माःक?' " है ओदोक ते, ² स्तिफनसए, " 'अ डासेरर, डादाज्यु भाइर, आव डापाँ थैचिके। गेपुर्खा अब्राहाम हारानल ओमाबाद, डादा मेसोपोतामिया देसल उलिज्याक ज़ ज़गै मगैव परमेस्वर ओडाक सरैःसिद, ³ 'आव नलिज्याव देस सोनो नक्याँदाडावरालाई रास्द नँलाई सतैद डाईरिज्याव पोड

लिनान्के,' है ओदोक ते, 4 अब्राहाम ओल उलिजूयाव कल्दीराए यादेसलाई रासूद हारानल बाद नल ज़ जाँवा पै लिके। नकिन ओबाबु उसिउ छीनी परमेस्वरए आव गेलिजूयाव पोल ज़ सारैक्यो।

5“खाली हो बेलाक आव देसल ओल लिन्या पो परमेस्वरए तके ब ओमाएताव, ओज़ार मनी तोबो ब यामाताताव। हितावत मनी परमेस्वरए नोलाई, ‘आव पो नँ नपो सोनो नथोर लिन्या पो जैद डायचिरिजूया,’ है लिद याका याद ओनैजूयाव। 6 खाली होए उजूनी परमेस्वरए इतावनी ब पाँके, ‘नँ नथोर छुतराए यादेसल खासिद लिद नोराए याधूँल चार सय बर्स पै याबाँदार ताद दुख ब दैन्या लेर। 7 छीनी डा ज़ नो बाँदा ताद यालिजूयाव देसलाई सजा डाएरिजूया। हाःकिन नो नथोर ननी पुलुसूद आव डायचिरिजूयाव पोल डासेवा दाहुन्या लेर,’ है दोक्यो। 8 नकिन परमेस्वरए अब्राहामलाई बाचालाव क्यालून्या सरेस एक्यो। है जैद अब्राहामए ओज़ा इसहाक उजर्मिउ आथ दिनत नो सरेस जैदिक्यो। नकिन इसहाकए ओज़ा याकूब ताके, याकूबए ओज़ार बाह जना बाह थरराए यापुर्खार ताकेर।

9“याकूबए ओज़ा योसेफलाई छुत ओदाज्युराए यामी तूद इजिप देसदा योकेर। हैदी ब परमेस्वर योसेफस ओल्योए, 10 उदुख भरिनी जोगोइद, नोलाई बनै अचम्बलाव बुद्धीर याद इजिपलाव राजा फारोलाई योसेफए ओल्योदा दाइनो जैक्यो। है जैद नो राजाए योसेफलाई इजिपलाव हाकिम जैद दरबार चलैन्या ब जैक्यो।

11“छीनी इजिप सोनो कनान देस भरिल घ्योःव अनिकाल हुद प्राइँलाई ज़ बनै दुख ताके। गोपुर्खाराए मनी ज़याव मादैकेर।

7:3 7:2-3 उत १२:१ 7:4 7:4 उत ११:३१; १२:४ 7:5 7:5 उत १२:७; १३:१५; १५:१८; १७:८ 7:7 7:6-7 उत १५:१३-१४; प्रस ३:१२ 7:8 7:8 उत १७:१०-१४; २१:२-४; २५:२६; २९:३१-३५:२९ 7:9 7:9 उत ३७:११, २८; ३९:२, २१ 7:10 7:10 उत ४१:३९-४१ 7:11 7:11 उत ४२:१-२

12 है जैद याकूबए 'इजिपल ज़्यावर दैसिज़्या दी' लिन्या बयेन थैद ओज़ारालाई नदा तखेप ज़्यावर लँ:नाव यापरीक्यो।

13 फरी छीनीकाव पालाकाव ओरापरीक योसेफ ओदाज्यु भाइराए याड़ाक सरेस्सिके। हा:किन राजा फारोए मनी योसेफए उझिमलावरालाई यासरेस्क्यो। 14 ना:त ज़ योसेफए, ओबाबु याकूब सोनो ओक्याँदाडाव भरिरालाई 'आदा ज़ उहुरक' लिद किनाव यापरीक्यो। नोर प्राईँ जैद पचहत्तर जना याल्यो। 15 है जैद याकूब इजिपल बाद नल ज़ सिके। गेपुर्खार ब नल ज़ सिकेर। 16 खाली नोराए यामोरोर नल मानैद, अब्राहामए हमोरए ओज़ाराए याल्योनी उलँ:व सकेम नाखार डाकाव खादर पुपल ज़ यारागादैनाकेर।

17“हा:किन ज़ परमेस्वरए अब्राहामलाई ओयो याका सयो:न्या बेला उहुनावत नोए ओथोर इजिपल ज़ लिद बनै ज़ बा:नाकेर।

18 छीनी इजिपल योसेफए उमिन माथैव तोबो सा:रो राजा पुलुस्के।

19 नो राजाए गेखलक भरिरालाई जाल दाद बनै दुख याएक्यो। याभाउज़ारालाई मनी सफ्या:न्याए जूनी करस ज़ पाखादा पले:व ओरापरीज़्याव।

20“होए ओपालाक ज़ मोसा जर्मिके। नो भाउज़ा परमेस्वरए उयुँलाव ज़ ओल्यो। नोलाई सोमैना पै ओबाबु ओआमानी निझिमल ज़ मोंद डाकेनी। 21 छीनी नोलाई पाला पाखाड ख्याद यानैज़्याक राजाए मेंमा ओज़ाए नोलाई लाँद ओल ओज़ा ज़ जैद डाक्यो। 22 है जैद मोसाए इजिपलाव प्राईँ ग्यान सिऊसिद, सैन्या सोनो दान्या भरित बनै ओगहक ल्यो मिँ ताके।

23“चालीस बर्स ओतावत ओभेरा इस्राएलीरास दैसिन्या युँ

7:13 7:13 उत ४५:१,१६ 7:14 7:14 उत ४५:९-१०,१७-१८; ४६:२७ 7:15 7:15 उत ४६:१-७; ४९:३३ 7:16 7:16 उत २३:३-१६; ३३:१९; ५०:७-१३; यहो २४:३२ 7:18 7:17-18 प्रस १:७-८ 7:19 7:19 प्रस १:१०-११,२२ 7:20 7:20 प्रस २:२ 7:21 7:21 प्रस २:३-१०

दोक्त्यो। 24 है जैद तछा याल्योक ओबाक तोबो इजिपीए इस्राएलीलाई ओप्रोज्याव रँ:द नो प्रोसिउलाई धुरिद्याद उखिस फेरैद्याद, प्रोज्यावलाई सै:दिक्यो। 25 ओल उयुँल ते, 'डाभेरारालाई यादुखरानी फुर्सुल जैन्या परमेस्वरए डालाई जैद नैनाव। आव पाँ नोराए मनी सैज्याखेरहो,' है उलिज्याव। खाली नोराए मासैकेर। 26 है जैद हो परा:ती मनी याल्योक ओबाक नेब्लो इस्राएलीनी नी नी निखप्सिज्याव रँ:द, 'अ डानैनी, जिन दाज्यु भाइनी काराव जिन जिन ज़ जिन्प्रोसिज्याव?' लिद नोनिलाई सखैव ओपैज्याक, 27 नो डादा छुपिउए मोसालाई हुतैद, 'नँलाई गेडैताव ताद पाँ फाल्न्या सुए ओजैनिउ? 28 काता नँ आझ्योकाव इजिपीलाई नसै:व मिताव डालाई ब सै:व नपैज्याव रो?' है ओदोक ते, 29 मोसाए नो पाँ थैद ओछ्याचेए थो:द मिद्यान देसल खासिद लिनाके। नल ज़ ओज़ानी ब दुई भाइ ताकिनी।

30 "मोसा नल ओल्यो चालीस बर्स ओतावत सीनै खागरताव बनल झोपोरा चाँ:ज्यावनी परमेस्वरए ओचाकर्या ओडाक सरै:सिके। 31 मोसाए नो झोपोरा ओलनी ज़ ओचाँ:ज्याव रँ:द बनै अचम्ब ताद जाँ ओल्योकसै बाद चिऊद ओनैज्याक परमेस्वरए ओर्गाए, 32 'डा जेजिज्यु बाज्युराए यापरमेस्वर, अब्राहाम, इसहाक सोनो याकूबराए यापरमेस्वर ज़,' है लिन्या ओथैव प्राइँना मोसा ओछ्याचेए बनै गूद माभाल्सिधुके। 33 हा:त ज़ परमेस्वरए, 'नखँताव पोला हाइके, नँ च्याँ:सिद नलिज्याव पो चोखो लिज्या। 34 इजिपल लिज्याव डामीं इस्राएलीराए धो सहिउ दुखर यादैज्याव डा ज़ रँ:द डानै। नोर यागहनिज्याव ब थैद डानै। है जैद नोरालाई जोगोइना हुद डाले। दे नँ झा:सिन्केदा, इजिपदा डापरीनिरिज्या,' है दोक्त्यो।

35“है जैद नो डादा ‘नँलाई गेडैताव ताद पाँ फाल्नुया सुए ओजैनिउ?’ है लिद यामाभैःव मोसालाई ओल परमेस्वरए ज़ चाँःज़्याव झोपोरानी पाँज़्याव ओचाकर्यालाई ओल्थोक परींघाद झन यालाई जोगोइन्या याडैताव जैद याएक्यो। 36 मोसाए नोरालाई ननी ओरासारैक इजिपल, लाल समुन्द्रल, सोनो चालीस बर्स पै याल्यो बनल अचम्बलाव येनर सतैद याएक्यो। 37 नो मोसाए ज़ फरी नोरालाई, ‘परमेस्वरए जेजातलाव मिँराए याख्वानीं ज़ जेजूनी तोबो डा मिताव अगमबक्ता उथैद्याचिरिज़्याव,’ है ओरादोज्याव। 38 नो मोसा मनी नोरास चालीस बर्स भरी बनल लिद सीनै खागरत परमेस्वरए ओचाकर्या सोनो गेसाखा पुख्वाराए याख्वार्लिव त्याला ताद नो बाँचिनुया पाँर गेलाई मनी यासिक्यो।

39“खाली नोराए झन ओपाँर माभैःद ओललाई ज़ भीःकेर। यायुँ जम्मा यारासो पो इजिपदा वाज़ खोतोरो याजैज़्याव। 40 है जैद नोराए मोसाए ओदाज़्यु हारूनलाई, ‘गेलाई इजिपनी पले-ज़्याव मोसा काना ओबाव सुए ज़ गेमासैए। है जैद नँ ज़ गेलाई गेडा गेडा बान्या देवतार जैद्याव ताके,’ है दोकेर। 41 नो बेलाक बाछाए अडग्या तोबो जैद नो अडग्याए उमिनत मार सैःद चरैःद बनै घ्योःव जात्रा जैकेर। नो अडग्या याज़ याजैवए बनै रेंकेर।

42“है जैद परमेस्वरए ओडाः तँदा फकैद, ‘आवरालाई कै जैद ब माताके’ लिद, ‘नमताव स्यावै, निमी, सोरोरालाई ब पुजा घदोज्यारक ते,’ है लिद यारासक्यो। होए उजूनी अगमबक्तराए यासरो पोस्तोकोल ब इताव सर्सिउ लिज़्या, ‘अ इस्राएललाव मिँर, नो चालीस बर्स भरी बनल जेलिज़्याकाव मारर सैःद जेचरैःव डा डाजूनी माःक।

7:35 7:35 प्रस २:१४ 7:36 7:36 प्रस ७:५; १४:२१; गन्ती १४:३३ 7:37 7:37 ब्य १८:१५,१८ 7:38 7:38 प्रस १९:१-२०:१७; ब्य ५:१-३३ 7:40 7:40 प्रस ३२:१ 7:41 7:41 प्रस ३२:२-६

43खास जे यासेवा दान्याए जूनी जैद जेस जेरालाँव मोलोख देवता लिन्या पाल

सोनो सोम्पा सोरोए ओअडग्यानी ची ।

है जैद डा जेलाई जबरज्यास्तीस बेबिलोन देसदा डालाँचिरिज्या ।'

44“हो बेलाक ज़ गेसाखा पुर्खारास बनल यालिज्याक परमेस्वरए ओध्यान दान्या पाल ब उलिज्याव । नो पाल परमेस्वरए मोसालाई सतेंद ओयो गोइंनी ज़ जैसिउ उलिज्याव । 45 छिंनीकाव पिरील मनी गेसाखा पुर्खाराए यहोसूस कनान देसल याबाक नो पाल यास ज़ यालाँज्याव । हो बेलाक ज़ नो देसलाव छुत जातरालाई परमेस्वरए खेपैद ओरायोनी नो पो गेसाखा पुर्खाराए यामी ज़ ताके । है जैद नोर नल लिद दाऊद राजाए ओपालाक पै नो पाल यास ज़ यानैज्याव ।

46 दाऊद परमेस्वरए उयुँलाव मिताव मिँ ओतावए नोए ‘नँलाई लिन्या पो तोबो झिम जैद गेई रो’ लिद याकूबए ओपरमेस्वरलाई बिन्ती दोक्यो । 47 खाली नो झिम होए ओपालाक माताद ओज़ा सोलोमनए ओपालाक वाज़ ताके ।

48“हैदी ब ओल माहान परमेस्वर उलिन्या पो ते मिँए जैसिउ झिमल माःक । अगमबक्ताए मनी परमेस्वरए ओपाँ अइ लिद सर्द नैव,

49‘डा डसिंहासन स्वर्गत लिज्या ।

डाखँ नैन्या पो नामल लिज्या ।

इतावए डाजूनी किताव झिम ची जैद जेयॉरिज्याव?

डा डान्नासिन्या पो काङ्क ची उलिज्याव?

50आव जेरँःज्याव नाम नम भरी

आव डाकुइए ज़ डाजैव माःक रो?’

51“जे बनै मामुइलिउर, जेयुँ परमेस्वरए ओपाँ मासैँज्यावराए यायुँ

7:43 7:42-43 आमो ५:२५-२७ 7:44 7:44 प्रस २५:९,४० 7:45 7:45 यहो
३:१४-१७ 7:46 7:46 २ समू ७:१-१६; १ इति १७:१-१४ 7:47 7:47 १ राज
६:१-३८; २ इति ३:१-१७ 7:50 7:49-50 यसै ६६:१-२

स्यासो लिज्या। जेर्ना ब सूइसिउ मिताव ज़ ताद छैव पुरूसनिकाव हुज्याव पाँ भरी काता ज़ जेमाथैधुइ। जे जेयेन चबनै जेसाखा पुर्खाराए यायेन स्यासो ज़ लिज्या। 52 नोरानी खिरी मापसिउ अगमबत्तार सु ची यालिज्यावदा? नो ड़ादा 'परमेस्वरए छैव उमीं गेल्योक हुरिज्या' है लिद सथैज्याव भरिरालाई मनी ओपोःस ज़ यारासैःकेर। जे ते इन नो हुव ओज़ालाई ज़ थोका याद जेसैःके। 53 है जैद जे परमेस्वरए ओचाकर्यारानी परमेस्वरए ओकानुन दैवराए ते, जे ज़ इन नो कानुन जेमाभैःके," है यादोक्त्यो।

स्तिफनसलाई लुँए झेःद यासैःव

54नो घ्योःव कचरीलाव घेपपाराए स्तिफनसए ओपाँ याथैवत यारिसए बूलिवा ताद याहार डर डर कैकेर। 55 स्तिफनस ते छैव पुरूसए ब्याल्द नमदा ओभाल्सिक परमेस्वरए ओज़गै ब रँःक्त्यो, परमेस्वरए ओवोर्दा येसु च्याँःसिद उलिज्याव ब रँःक्त्यो। 56 हाःत ज़, "ओहो! नम फैसिउल मिं मिन्सिउलाई परमेस्वरए ओवोर्दा च्याँःसिद उलिज्याव डारँःज्या," है ओल्यो प्राइँना ज़, 57 नोर बनै चिर चिर क्रिद यानार्नर सूइद, प्राइँ ज़ भोरोःसिनाद, 58 नोलाई लुँए झेःद सैःन्याए जूँनी सहरनी सेल्द पाखाड लाँकेर। हो बेलाक नोरास बाव तोबो साऊल यादोज्याव धापाज़ाकाव ब उलिज्याव। नो छ्याप लैज्यावराए याफुतुर हाइद नोए उजिम्बाल नैकेर। 59 नोलाई लुँ लुँए याझेःज्याक स्तिफनसए परमेस्वरए उमिन हाइद, "अ प्रभु येसु, डापुरूस नल्योदा लाँघाँके," है लिद, 60 उघूँदानी तिकिसिद बनै चोइस, "अ प्रभु, आवराए डाक्याँत यादोज्याव पाप याक्याँत ताताक," है ओल्यो प्राइँना ज़ उस० फ्याःके।

8

1 नो साऊलए मनी, 'आवलाई सैःन्या ज़' लिद नोरास तयुँ ज़

ओजैज्याव।

साऊल मन्दलीए उखिरी उपसिउ

हो छचामकिन ज़ यरूसलेम सहरलाव मन्दलीए उखिरी बनै पसिनाकेर। हुनी ज़ नोर प्राइँ यहूदिया सोनो सामरिया खन्दल धोंःद राःसिनाकेर। येसुए ओसाचीर वाज़ यरूसलेमल रहिकेर। ² हाः बेलाक फरी, धर्मी मिँराए स्तिफनसए ओमोरोलाई बनै घरे घरे लाँद गादैकेर। ³ साऊलए ते मन्दलीलावरलाई बनै ज़ हाप हाप ख्याद झिम झिमक बाद खेपा मेमा प्राइँलाई ज़ क्योःद सेले सेले लाँद इयालखानाल ओराझाःज्याव।

येसुए ओपाँ सामरियाल ओथासो

⁴नो यरूसलेमनी धोंःद बावर प्राइँदा राःसिद जोड याकेस्दी ब येसुए ओपाँ यारासथैकेर। ⁵ फिलिपए सामरिया सहरल बाद परमेस्वरनी हुव ख्रीसए उज्जनी यासथैक्यो। ⁶ नलाव मिँराए नोए ओपाँर थैद अचम्बलाव ओदोव येनर रँःद ओपाँ बनै चावस थैकेर। ⁷ माचाव पुरूसर कुधु मिँराए याक्याँतिन बनै चिर चिर क्रिद पुलुसद याबाज्याव, सोनो याखँ याकुइ सिउर, दूँदार यागराँज्याव। ⁸ है जैद नो सहरल मिँर बनै ज़ यारेंज्याव।

सिमोन धामी

⁹नो सहरल तोबो सिमोन यादोज्याव बनै उमिन थासो धामी ब उलिज्याव। नो बनै सघ्योःसिद ओमन्तर तन्तरए सामरियालाव मिँरालाई डादाकिन ज़ अचम्ब जैद ओरानैज्याव। ¹⁰ घेप्पा जिम्जा मिँराए नोलाई बनै घ्योःव थरैद, “आव ज़ ची ओल्यो, परमेस्वरए ओसक्ती ल्यो मिँ,” है यालिज्याव। ¹¹ है जैद कुधु बर्स पै ओमन्तर तन्तरए अचम्ब ओराजैवए, प्राइँए ज़ यामानिज्याव।

¹²हाःत ज़ फिलिप यासहरल हुद येसु ख्रीसए उमिननी परमेस्वरए ओराज्यालाव चाव था ओरासथैक खेपा मेमार कुधु ज़ ओपाँर भैःद रील सछेंसिकेर। ¹³ ओल सिमोन धामी मनी परमेस्वरए ओपाँत उयुँ

हुपूद सछैसिके। ओसछैसिउ छीनी फिलिपस आदा होदा सिप सिप लिद फिलिपए ओदोज्याव अचम्बलाव सरेसर येनर रँद बनै ज़ अचम्ब ताद उलिज्याव।

14छीनी यरूसलेमल लिज्याव येसुए ओसाचीराए ‘सामरियालाव मिंराए मनी परमेस्वरए ओपाँ भैःद लेर दी’ लिन्या याथैवत पत्रुस सोनो यूहननानिलाई नदा यारापरींकेर। 15 नोनी नड बाद नोरालाई छैव पुरूस दैन्याए जूनी परमेस्वरस पोंखारिद निद याराएकिनी। 16 हाःपै छैव पुरूस याक्याँत ओमाहुताव, नोर प्रभु येसुए उमिननी वाज्र सछैसिद यालिज्याव। 17 है जैद नोनी निकुइ याक्याँत नैद्याद निपोखारिक छैव पुरूस दैकेर।

18नो सिमोन धामीए अइज्र निकुइ नैद निरायोनी ज़ नो पुरूस उहुज्याव रँद, होक ज़ ओपैसार हाइद, 19 “दे डासेरनी, निताव सक्ती डालाई ब याव ताके। डा मनी मिंराए याक्याँत डाकुइ नैद डाराएक छैव पुरूस ओदैरक,” है उलिक ते, 20 पत्रुसए, “नो नपैसा नँस ज़ ओमाक। नँ है नलिज्याव मिताव परमेस्वरए ओअसिक ज़ खर्क पैसाए लँद ओदैसिज्याव? 21 नँ नयुँ परमेस्वरकिन तँदा ओतावए आव पाँत नजुँ काता ज़ दैन्या नमाले। 22 आव दोव नपैज्याव माचाव येननी नयुँर तोद परमेस्वरलाई पोंखारिद माफी निके, कसा नपाप क्याल्द माईव। 23 माछैव येनत नयुँ मानैधुद पापल सुर्सिउ मिताव नलिज्याव,” है दोक्यो।

24हाःत ज़ सिमोन बनै छेःद, “जिन ज़ परमेस्वरलाई पोंखारिद्याव ताके। आव है जिन्लिज्याव मिताव काता ज़ डाक्याँत ताताक,” है लिद बिन्ती दोक्यो।

25नकिन पत्रुस सोनो यूहननानी नो सहरल परमेस्वरए ओपाँ बनै चावस थरैद पलास्द निरायोत, फरी नोनी ननी पुलुस्द सामरियालाव नाखार याल चाव था सथैए सथैए यरूसलेमदा ओल्द बाकिनी।

फिलिप इथियोपियालाव मन्त्रीस ओदैसिउ

26 हाःत ज़ परमेस्वरए ओचाकर्या फिलिपए ल्योक सरैःसिद, “नँ आनी बाद नो दखिनलाव यरूसलेमनी झरिद नाङ्ग्या पात्या बनलाव घ्याँ गाजा सहरदा बाज़्याव येमदा बान्के,” है ओदोव प्राइँना ज़, 27 फिलिप च्याँःसिद बाके। नो येमत ओबाज़्याक नक तोबो इथियोपिया देसलाव सिडारू मिँ ब नदा ज़ ओबाज़्याव। नो मिँ इथियोपियालाव माहारानी कन्दाकीए ओपैसा चलैज़्याव मन्त्री ओल्यो। नो यरूसलेमल बाद ध्यान दाद, 28 उझिमदा ओल्द ओबाज़्याव। नो मिँ उगद्दील चुसिद यसैया अगमबक्ताए ओसरो पोस्तोको उपरिज़्याव। 29 हाःत ज़ परमेस्वरए उपरूसए फिलिपलाई, “नँ नो गद्दीलाई दैनाद नोस बान्के,” है ओदोक ते, 30 फिलिपए नोलाई धोःनाद ओदैनाक नो मन्त्रीए यसैया अगमबक्ताए ओसरो पोस्तोको उपरिज़्याव थैद, “नो नपरिज़्यावए ओअर्थ नमाबुझिज़्याव?” है ओदोक ते, 31 नो मन्त्रीए, “डालाई पैन्या मिँ माल्यो। कै जैद डाबुझिधुरिज़्याव?” है दाद, फिलिपलाई ओलस चुसिउ परीक्यो।

32 नो धर्मसासुत्रलाव उपरिज़्याव खन्द आव ज़ ओल्यो,
“पल्ना यालाँज़्याव बेधा माँःती नोलाई ब लाँकेर।

याएन्ज़्याव पाथा ओमाक्रिज़्याव मिताव
नो मनी घाइ ज़ मालिके।

33 बिनु न्याय ज़ बीज्यात जैकेर।

ओललाई ज़ यासफ्याःवए,
ओथोर कातानी ची यारैःरिज़्याव?”

34 नो मन्त्रीए फिलिपलाई, “डालाई है दाँके, अगमबक्ताए आव पाँर ओल उजूनी ओपाँव सैं छुतए उजूनी ओपाँव?” है ओदोक ते,
35 फिलिपए, “आव भरी येसुए ओक्याँत ताव पाँर ज़,” लिद नो

धर्मसास्त्रलाव खन्दनी ज़ येसुए उजूनी चाव था पलासदिक्यो।
 36 येमत निबाजूयाक तोबो री लिजूयाव पोक निहुवत नो मन्त्रीए,
 “दे आक री लिजूया, डा नल सछैसिन्या माताजूया?” है ओदोक ते,
 37 [फिलिपए, “नँ येसुए ओपाँत नयुँ उहुपूकिन, ताए ज़,” है दोक्यो।
 हाःत ज़ नो मन्त्रीए, “येसु ख्रीस परमेस्वरए साचो ओज़ा ज़ लिद
 डायुँ हुबो ज़ लिजूया,” है दाद,] 38 नो गद्दी चलैजूयावलाई अदैव
 परीद नोनी नेब्लो रील बाद फिलिपए मन्त्रीलाई होक ज़ सछैक्यो।
 39 नोनी रीनी निपुलुसो प्राइंना परमेस्वरए उपुरुसए फिलिपलाई
 क्योःद छुतदा ज़ लाँक्यो। मन्त्री ते बनै रेंए रेंए उझिमदा बाद
 फिलिपस फरी मादैसिकिनी।
 40 नकिन फिलिपए ओल ओक्याँलाई अरुदोद सहरल दैद
 नजीदाडाव नाखार नाखार भरिल बाद कैसरिया सहरक पै चाव
 था यासथैक्यो।

9

साऊलए प्रभु येसुलाई उरँःव

1 साऊलए हाःपै प्रभुए ओपाँत लिजूयावरालाई यामिन समैद्यान्याए
 जूनी उसुनी बनै फों फों ओमोज़याव। है जैद प्रधान पुजारीए ल्योक
 बाद, 2 दमस्कस सहरलाव धर्मसास्त्र झिमलाव घेपपारालाई
 सतैद्यान्याए जूनी पुर्जी कागत न्निद ओनैजूयाव। नोए येसुए ओपाँत
 बाजूयाव खेपा मेंमारालाई सापूद क्योःद, यरूसलेमदा लाँन्या
 ओपैजूयाव। 3 येमत ओबाजूयाक दमस्कस केसून्यावाक उमँःजानी
 बनै मी झीःन्या ज़गै नमतिन म्याल्याकनी मिलिक हुके। 4 साऊल
 होक ज़ धलिद कातानी तोबो गाए, “ए साऊल, ए साऊल, नँ काराव
 डाखिरी नपसिजूयाव?” है लिद ओपाँजूयाव थैक्यो। 5 साऊलए
 फरी, “नँ सु प्रभु?” है ओदोक ते, नो गाए, “डा नो डाखिरी
 नपसिजूयाव येसु ज़। 6 नँ सोद सहरल बान्केदा, नड ज़ नँ दान्या
 येन भरी थैन्या नले,” है दोक्यो।

7 साऊलस बाजूयाव ओनैराए ते नो गा थैजूयावत ब सुलाई ज़ यामारैःवए नोर बनै तोतास्केर। 8 हाःत ज़ साऊल सोद च्याँःसिद आदा होदा ओभाल्सिक उमी ज़ मारैःके। है जैद ओनैराए उकुइनी दोरैद दमस्कसल लाँकेर। 9 स्रोंला भरी उमी मारैःद, ज़याव ब माजूयुक्यो, री ब माओक्यो।

हननिया साऊलस ओदैसिउ

10 दमस्कसल येसुए ओपाँत बाजूयाव तोबो हननिया यादोज़याव उलिज़याव। नोलाई दर्सनल परमेस्वरए, “अ हननिया,” है ओदोव ओथैक, “काराव प्रभु?” है दोक्यो। 11 परमेस्वरए फरी, “नँ सोद बजारलाव दाँव येम यादोज़याव दोहाल बाद यहूदाए उझिमल पसिद, ‘तार्ससलाव साऊल काङ्क उलिज़याव?’ है यादोनाके। नो साऊलए भर्जा ज़ पोंखारिज़याव। 12 होए मनी दर्सनल नँलाई ज़ रँःनिज़याव। नँ ओल्योक बाद, नकुइ ओक्याँत नैद उमी सरैःद नएरिज़याव ब सतैद डाएके,” है दोक्यो।

13 हाःत ज़ हननियाए, “ओहो प्रभु! आव है नलिज़याव मिँए उजूनी कुधु ज़ थैद डानै। नोए यरूसलेमलाव छैव नमीरालाई बनै ज़ दुख याएज़याव दी। 14 इन आल मनी मुख्या पुजारीराए ल्योनी नमिन हाइज़याव भरिरालाई क्योःन्या हक ब रैद नैव दी,” है ओदोक ते, 15 परमेस्वरए, “नँ घबानी, नो मिँलाई डाय़ेनत छाँतिद डानै। नोए डामिन छुत जातलावर, इस्राएलीर स्रोनो राजाराए ल्योदा सथैन्या ले। 16 नोए डामिनताव दैन्या दुख भरी नोलाई डा ज़ सतैद्यान्या डाले,” है दोक्यो।

17 है जैद हननिया ननी पुलुस्द परमेस्वरए ओपैव झिमक बाद, साऊलए ओक्याँत उकुइ नैद, “अ भाइ साऊल, नँ आदा येमत नहुज़याकाव नडाक सरैःसिउ प्रभु येसुए डालाई नल्योदा नमी सरैःद्यान्याए जूनी स्रोनो छैव पुरूसए घब्याल्क लिद उपरीनाव,” है ओदोव प्राइँना ज़, 18 साऊलए उमीनी सीका मिताव कातार तेद उमी

रें:के। हा:त ज़ ननी च्याँ:सिद रील सछैंसिनाद, ¹⁹ ज़्यावर ज़्याद ओसार् पुलुस्के।

साऊलए दमस्कसल येसुए ओपाँ ओरासथैव

साऊल येसुए ओपाँत लिज़्यावरास जाँवा पै दमस्कसल लिद, ²⁰ धर्मसास्त्र झिम झिमल बाद, “येसु परमेस्वरए ओज़ा ज़,” लिद ओरासथैज़्याव। ²¹ ओपाँ थैज़्याव भरी बनै अचम्ब ताद, “आव ते नो यरूसलेमल येसुए उमिनत लिज़्यावरालाई खेमो पैज़्याव मिँ मा:क रो? आवए ते आल मनी नितावरालाई क्यो:द, मुख्या पुजारीराए याकचरील सेले सेले लाँन्याए जूनी हुव ची सानी,” है लिकेर। ²² खाली साऊलए ओसत्की इन ज़ घ्यो:नाद, “येसु परमेस्वरए ओज़ा खीस ज़,” लिद थरैद ओरायोनी दमस्कसलाव यहूदीराए यायुँ बनै आँचानी पाँचा जैद याएक्यो।

²³छींनी सर्बा कुधु दिन ओतावत नलाव यहूदीराए साऊललाई सै:न्या बुद्धी कलैकेर। ²⁴ खाली नो पाँ ओल साऊलए मनी थैद ओनैज़्याव। है जैद नोराए, ‘जुनी ब सै:न्या ज़’ लिद नो सहरनी पुलुसन्त्या येम भरिल पाल्यार नैद लाकनी रील वैसिद यालिज़्याव। ²⁵ खाली ओनैराए तछा रील साऊललाई भेल झा:द नो सहर घिरिसिउ भार्नातिन झरैकेर।

साऊल यरूसलेमदा ओल्द ओबाव

²⁶साऊल दमस्कसनी पुलुस्द यरूसलेमल बाद येसुए ओपाँत बाज़्यावरास तखेप सरेस्सिउ ओपैज़्याव। खाली नोलाई यायुँ माहुप्द, “आव ते येसुए ओपाँत साचो लिज़्याव मा:क सानी,” है लिद छे:केर। ²⁷ बारनाबासए वाज़ साऊललाई पतिद येसुए ओसाचीराए ल्योक लाँद, “आव मिँ दमस्कसदा ओबाज़्याक प्रभु येसु ओल्योक सरै:सिद, ओलस ज़ पाँके दी। दमस्कसल मनी येसुए उमिन माछे:द ज़ यासथैक्यो,” है यादोक्यो। ²⁸ है जैद साऊल नोरास यरूसलेम सहरल आदो होदा लिद, नल ब प्रभुए उमिन माछे:द

ज़ यासथैक्यो। 29 खाली नलाव ग्रीक खामनी पाँजूयाव यहूदीरास याखल्लेसिक ते नोराए झन साऊललाई सैःन्या निउं याखिमूज़्याव।

30 ओनैराए नो पाँ थैद साऊललाई ननी पलेद कैसरिया सहरक पै सारैद, नकिन उझिम तार्सस सहरदा परींकेर।

31 हाः बेलाक यहूदिया, गालील सोनो सामरिया खन्दलाव मन्दली जाँवा पै रान छानस लिन्या ताके। येसुए ओपाँत बाज़्यावर परमेस्वरलाई यायुँल चेतैद, छैव पुरूसनी यायुँर झेंःद, झन ज़ याबानाजूयाव।

एनियास सोनो दोरकासनी

32 पत्रुस नजीदा आदा होदा उलिज़्याक लुद्दा नाखारल परमेस्वरए उमिनत लिज़्यावरास दैसिनाके। 33 नल तोबो एनियास यादोज़्याव उखँ उकुइ सिउ, आथ बर्स भरी घ्याँसिद लिज़्याव मिँलाई दैक्यो। 34 पत्रुसए नोलाई रँःद, “अ एनियास, येसु ख्रीसए नँलाई सगराँनिज़्याव। नँ सोद नतैर यारूल्के,” है ओदोव प्राइँना ज़, नो मिँ थर च्याँःसिके। 35 नकाव लुद्दा सोनो सारोन नाखारल लिज़्यावराए निताव रँःद यायुँ हुपद प्रभुए ओपाँत हुकेर।

36 फरी योप्पा सहरल तोबो तबीता यादोज़्याव परमेस्वरए ओपाँताव मेंमा ओल्यो। ग्रीक खामनी होए उमिन दोरकास है यादोज़्याव। नो मेंमा बनै उयुँ गराँद प्राइँलाई सघैव ज़ ओरानैज़्याव।

37 तछा नो मेंमा ओजोरो हुद सिके। मिँराए ओमोरोलाई हुद ओतर्ताव ताललाव कुन्तील नैकेर। 38 हाः बेलाक पै पत्रुस योप्पाकिन नजिकक लिज़्याव लुद्दाल उलिज़्याव सैद नलाव यायुँ हुबोराए नेब्लो मिँनिलाई, “जिन पत्रुसलाई, ‘हतपूत ज़ हुन्साँ दी’ है दोचिन,” है लिद किनाव यारापरींकेर। 39 है जैद पत्रुसए नो पाँर थैद नोनिस बाके। योप्पाल याकेसो प्राइँना पत्रुसलाई नो सिउ मेंमालाई यानैज़्याव ओतर्ताव कुन्तील लाँकेर। नल नो नाखारलाव राँदी मेंमार दोरकासए जैद ओरायो क्वार सतैद याघर्ज़्याव। 40 पत्रुसए

नोरालाई लाँःदा परींद नो सिउए ओलापक उघूँदानी तिकिसिद परमेस्वरलाई पोंखारिद, सिउए ल्योदा भाल्सिद, “अ तबीता, सोनिके,” है ओदोव प्राईंना नो मेंमा सैसिद भाल्सिके। पत्रुसलाई उरँःव प्राईंना सोद चुसिके। 41 हाःत ज़ पत्रुसए नोलाई उकुइनी क्योःद सच्यौँद, नो लाँःक लिज़्याव परमेस्वरए उमिनताव राँदी मेंमारालाई खुल्द सिउनी बाँचिउलाई सतैँद याएक्यो। 42 नो पाँ योप्पा भरिल प्राईँदा ज़ थासूद कुधुए प्रभुलाई यायुँ हुपूके। 43 नो भरी ओतावत पत्रुस कुधु दिन पै योप्पाल तोबो स्यालोए येन दाज़्याव सिमोन यादोज़्यावए उझिमक ज़ लिके।

10

परमेस्वरए ओचाकर्या कर्नेलियस ओपाँव

1हाः बेलाक कैसरिया सहरल तोबो कर्नेलियस यादोज़्याव मिँ इतालिया फौजीलाव कप्तान उलिज़्याव। 2 नो मिँ बनै धर्मी ओल्यो, उझिमलावरास परमेस्वरए ओमान नैज़्याव मिँ ओल्यो। उयुँ गराँव ओतावए गरीबरालाई ज़्यावर पैसार ब याव ज़ उलिज़्याव, परमेस्वरलाई ब पोंखारिउ ज़ ओनैज़्याव। 3 तछा लाकाव तीन बजेवाक कर्नेलियस झजल्किद परमेस्वरए ओचाकर्या ओल्योदा उहुज़्याव रँःक्यो। नो चाकर्याए कर्नेलियसए उमिन ओहाइक ते, 4 कर्नेलियस बनै छेँद ओल्योदा लँ लँ चिऊद, “काराव प्रभु?” है दोक्यो। हाःत ज़ नो चाकर्याए, “परमेस्वरलाई नपोंखारिज़्याव सोनो गरीबराए ल्योदा नयुँ यालूद नदोज़्याव येनर परमेस्वरए ओल्योक केसूके। 5 नँ तोबो नेब्लो नमीरालाई योप्पाल तोबो सिमोन पत्रुस यादोज़्यावलाई च़ानाव यापरीके। 6 नो मिँ समुन्द्र छचोकाव स्यालोए येन दाज़्याव सिमोनए उझिमक लिज़्या,” है दोक्यो।

7नो चाकर्या ओबाव छींनी, कर्नेलियसए ओयेन दाज़्याव भरिरानी ओसेवा दोज़्याव तोबो धर्मी उसिपाई सोनो नेब्लो ओनोकोरनिलाई

खुल्द, ⁸नो चाकर्याए है ओदोव पाँ भरी नोरालाई है दाद योपपादा यापरीक्यो।

पत्रुसए उरँ:व दर्सन

⁹हो परा:ती लाकाव बाह बजेवाक नो सोम्लो योपपाल याकेसनाव बेलाक ज़ पत्रुस थालात बाद परमेस्वरलाई ओपोखारिज़्याव। ¹⁰पत्रुस बनै करेद काँ ज़्युव ओपैज़्याव। खाली काँ ओमाताताव, भर याजैज़्याव। हा:त ज़ पत्रुस झजल्किद, ¹¹नम फैसिउ रँ:क्यो। नमतिन तोबो घ्यो:व फेरवा स्यासो चार चोंच्यानी क्यो:सिउ उझरिहुज़्याव रँ:क्यो। ¹²नो फेरवाल जै जन्तुर, रूइज़ा वान्ज़ार सोनो बाज़ा बिज़ार यालिज़्याव। ¹³हा:त ज़ तोबो गाए, “अ पत्रुस, नँ सोद आवरालाई सै:द याकैके,” है ओदोज़्याव थैद, ¹⁴पत्रुसए, “माता प्रभु, निताव कैन्या माताज़्यावर खर्क ज़ डामाकैए,” है दोक्यो। ¹⁵नो गा फरी ब हुद, “जोलाई परमेस्वरए चोखो थरैद नैव, होलाई नँ माछैव थरैन्या माताए,” है दोक्यो। ¹⁶निताव सोखेप ओतावत नो फेरवा नमदा छींसिद मारै:के।

¹⁷पत्रुस बनै अचम्ब ताद, “आव डारँ:वए ओअर्थ काता ओताव?” लिद उयुँल ओखामिज़्याक ज़ कर्नेलियसए ओरापरीव मिँराए, “सिमोनए उझिम काङ्क उलिज़्याव?” लिद पैसी पैसी साँबिलाक हुकेर। ¹⁸साँबिलाक च्याँ:सिद, “सिमोन पत्रुस यादोज़्याव आल मालिज़्या?” है लिद किकेर। ¹⁹हा:पै पत्रुस थालात चुसिद दर्सनलाव पाँ ओखामिज़्याव। हा:त ज़ परमेस्वरए उपुरुसए, “सोम्लो मिँराए नँलाई खिमनिज़्यार। ²⁰नँ च्याँ:सिद मेल झरिद नयुँ धुकक जैद नोरास बान्के। नोरालाई डा ज़ डारापरीव,” है दोक्यो। ²¹है जैद पत्रुस मेल झरिद नोरास दैसिद, “जेखिमनाज़्याव मिँ डा ज़, काताए जूँनी जेहुव?” है ओरादोक ते, ²²नोराए, “तोबो कर्नेलियस यादोज़्याव रोमी कप्तानए गेलाई उपरीसिउ। नो मिँ बनै धर्मी, परमेस्वरए ओमान नैद्याज़्याव मिँ ज़, यहूदी भरिराए

बनै चाव थरैज्यार। नोलाई परमेस्वरए ओचाकर्याए, 'योप्पाल लिज्याव पत्रुसलाई नझिमक रैव यापरीके। नो मिँए नँलाई तोबो पाँ सथैनिरिज्याव' है दोक्यो दी," है यादोक ते, ²³ पत्रुसए नोरालाई उलिज्याव झिमक चावस नैद नल ज़ याबासैक्यो। हो परा:ती येसुए ओपाँत लिज्याव योप्पालाव ओनैरालाई तोबो नेब्लो लाँद नो खुल्ना हुवरास बाके।

पत्रुस कर्नेलियसस ओदैसिउ

²⁴हो परा:ती पत्रुस ओनैरास कैसरिया सहरल केस्केर। ओल कर्नेलियसए ते ओनैर सोनो ओक्याँदाडावरालाई उझिमक दुप्द पत्रुसलाई कींद यानैज्याव। ²⁵ पत्रुस हुद झिमल उपसिज्याक कर्नेलियस ओल्योक दैसिनाद उखँत फुलुप्सिद धो दोक्यो। ²⁶ पत्रुसए नोलाई सोचोइद, "डालाई धो दान्या मा:क, च्याँ:सिन्के। डा मनी नँ स्यासो मिँ ज़ ची," है दाद, ²⁷ पाँए पाँए झिमल निपसिक नल मिँ बनै कुधु दुप्सिद यालिज्याव रँ:द, ²⁸ नोरालाई, "गे यहूदीर जे मिताव छुत जातलावरास सिप लिन्या ब माताए, जेझिमल पसिन्या ब माताए लिन्या जे ज़ जेसैज्या। हितावत ब परमेस्वरए डालाई, 'सु मिँ ज़ माछैव माले, अछुत्या ब माले' है लिन्या सतैद्याँक्यो। ²⁹ है जैद डालाई जेखुल्नाक 'माता' है मालिद ज़ डाहुके। अब काताए जूनी जेखुल्नाव, है दाँचिके," है ओरादोक ते, ³⁰ कर्नेलियसए, "चार दिन डादा लाकाव तीन बजेवाक डाझिमक परमेस्वरलाई डापोँखारिज्याक तक तकौ क्वा क्वाइसिउ परमेस्वरए ओचाकर्या डाडाक सरै:सिहुद, ³¹ डालाई, 'अ कर्नेलियस, परमेस्वरलाई नपोँखारिज्याव सोनो गरीबराए ल्योदा नयुँ ग़ाल्द नदोज्याव येन परमेस्वरए रँ:क्यो। ³² नँ योप्पाल लिज्याव सिमोन पत्रुस यादोज्यावलाई नमीरालाई किनाव यापरीके। नो मिँ समुन्द्र छचोकाव स्यालोए येन दाज्याव

सिमोनए उझिमक लिजूया,' है दाँक्यो। ³³ है जैद डा नँलाई हतपूत ज़ डाथानिके। नँ ब नयुँ नाद हुद नयासिके। गे परमेस्वरए ओपैनिउ पाँर थैन्याए जूनी आव डानैरास दुप्सिद गेले," है दोक्यो।

पत्रुसए कर्नेलियसए उझिमल ओरासथैव

³⁴हाःत ज़ पत्रुसए अइ लिद यासथैक्यो, "साचो ज़ ओल्यो डानै डामेर, परमेस्वरए जात रँःद ओमादोज़याव ओल्यो, डा मनी आछिमकिन ज़ डासैके। ³⁵ जो जातल तादी ब, जो मिँए परमेस्वरए ओमान नैजूयाव, चाव येन ब दोजूयाव, होलाई ज़ परमेस्वरए चाव रँःजूयाव। ³⁶ गे उमीं इस्राएलीरालाई ओज़ा येसु ख्रीसनी सखैन्या येम ब सतैद्यासिक्यो — नो प्राईं मिँराए गेप्रभु ज़ लिजूया। ³⁷ रील सछैँजूयाव यूहननाए ओयेन उतुपैवकिन गालील खन्दनी सुरू ताद, यहूदिया खन्द भरिल राःसिनाव पाँर जे मनी थैद जेनैजूयाखेहो। ³⁸ नो पाँर आव ज़ — परमेस्वरए नासरतलाव येसुए ओक्योँत छैँव पुरूस ब झाःद्याद ओसक्तीर ब एक्यो। परमेस्वर ओलस ज़ उलिजूयावए येसु आदा होदा बाद चाव येनर दाद याजोरो हुवर सोनो माचाव पुरूसए क्योःद ओरानैजूयावरालाई ब ओरासगराँजूयाव। ³⁹ गे उसिसर फरी नो यरूसलेमल सोनो यहूदीराए यादेसलाव ओदोव येनरात ओसाचीर ताद गेले। नोलाई झन तछा क्रुसत तङ्गैद सैःकेर। ⁴⁰ हैदी ब उसिउ सोलात परमेस्वरए नोलाई सोचोइद गेल्योक सरैःद्यासिक्यो। ⁴¹ सरैःद ओरायो प्राईं मिँरालाई माःक, परमेस्वरए गे डादाकिनकाव रूजिद ओनैसिउ ओसाचीरालाई वाज़ ची। सैसिद ओसोव छीनी गेस सिप ज़ ज़्युक्यो, सिप ज़ ओक्यो। ⁴² गेलाई ओसाचीर जैद, 'जे प्राईं मिँरालाई डापाँ सथैद, 'सिउ मासिउरालाई यान्याय फालन्या ओल परमेस्वरए ज़ डा ओज़ालाई जैद नैनाव' लिद यारासथैनाच्यो,' लिद गेलाई अर्थैसिक्यो। ⁴³ अगमबक्ता भरिराए मनी नो हरिजूयाव येसुए उजूनी ज़ पाँकेर। नोराए यापाँल

मनी, 'जोए नोलाई उयुं हुपूज्या, हो नोए उमिननी ज़ ओपापर क्वालसिद परमेस्वरस खैरिज्या,' है लिद लेर।"

छुत जातलावराए छैव पुरूस यादैव

44 पत्रुस आव पाँर ओपाँज्याक ज़ नो ओपाँ थैज्यावराए याक्याँत छैव पुरूस हुके। 45 नो पत्रुसस हुव येसुए ओपाँत बाज्याव यहूदीराए, छुत जातलाव मिँराए याक्याँत मनी छैव पुरूस उहुव रँ:द, 46 "नोराए ते छुत छुत खामनी पाँद, परमेस्वरए उमिन ची सघ्यो:ज्यार!" है लिद अचम्ब ताकेर। हा:त ज़ पत्रुसए ओनैरालाई, 47 "आवरालाई गे काराव रील सछैसिन्या भै:द मायान्या? आवर मनी गे मिताव छैव पुरूस दैवर ज़ लिज्यार सानी," है दाद, 48 येसु स्त्रीसए उमिननी रील सछैसिउ यापरीक्यो। नकिन कर्नेलियस ओनैरास, "गेस जाँवा पै ल्यो ताके," है यारादोक ते, नोर जाँवा पै लिकेर।

11

पत्रुसए ओदोव येनर पलासूद ओरायो

1 छींनी येसुए ओसाचीर सोनो यहूदिया खन्दलाव येसुए ओपाँत बाज्यावराए, 'छुत जातलावर मनी परमेस्वरए ओपाँत हुकेर दी' लिन्या थैकेर। 2 है जैद पत्रुस यरूसलेमल ओल्द ओबाक नलाव येसुए ओपाँत हुव यहूदीराए ओदोव येनर माभै:द, 3 "नँ काराव छुत जातलावराए ल्योक बाद नोरास सिप नज्यु?" है यादोक ते, 4 पत्रुसए नोराए यापाँए ओअर्थ ओजरानी ज़ अइ लिद पलासूद याएक्यो, 5 "डा योपपाल डालिज्याक तछा परमेस्वरलाई डापोखारिज्याक, झजल्किद तोबो फेरवा स्यासो चार चोंच्यानी क्यो:सिउ, नमतिन डाल्योक उझरिहुज्याव डारँ:के। 6 नोलाई लँ लँ चिऊद डानैज्याक नल जै जन्तुर, रूइजा वान्जार सोनो स्यार बाजार डारारँ:के। 7 हा:त ज़ कातानी तोबो गाए, 'अ पत्रुस, नँ सोद आवरालाई सै:द याकैके,' है ओदाँज्याव डाथैके। 8 डा फरी, 'माता

प्रभु, निताव कैन्या माताजूयावर डासेत खर्क ज़ डामाझाःए,' है डादोक ते, 9 नो गा फरी ब नमतिन हुद, 'जोलाई परमेस्वरए चोखो थरैद नैव, होलाई नँ माछेंव थरैन्या माताए,' है दाँक्यो। 10 निताव पाँर सोंखेप ओतावत नो फेरवा नमदा सेल्सिद मारैःके।

11“हाःत ज़ डालिजूयाव झिम डाकाव साँबिलाक सोम्लो मिँर हुद यालिजूयाव। नोर डाल्योक कैसरियानी परीसिउर याल्यो। 12 परमेस्वरए उपुरूसए फरी, 'आवरास माअन्कनिद घबानी,' है दाँक्यो। है जैद आव डास लिजूयाव छ जना डानैर लाँद नो परीजूयाव मिँए उझिमल गेपसिके। 13 हो प्राईना ज़ डादा उरँःव भरी गेलाई है दासिक्यो – नो मिँए उझिमल परमेस्वरए ओचाकर्या च्याँःसिद उलिजूयाव रँःक्यो दी। नो चाकर्याए फरी, 'योपपाल लिजूयाव सिमोन पत्रुसलाई चानाव यापरीके। 14 नो सिमोन आल हुद नझिमलावरास जेलाई अजम्बरी जुनी दैन्या पाँर सथैचिरिजूयाव,' है दोक्यो दी।

15“है जैद डा नोरालाई परमेस्वरए ओपाँ डारासथैजूयाक ज़ किताव डादा छेंव पुरूस गे गेक्याँत उहुव, हिताव ज़ नोराए याक्याँत मनी हुके। 16 हाःत ज़ गेप्रभु येसुए डादा गे उसिसरालाई है ओदासिउ पाँर याका डादोके –

'यूहन्नाए किताव जेलाई रीनी ओसछेंचिउ,
हिताव ज़ छीनी तछा छेंव पुरूसनी जेछैरिजूया।'

17है जैद परमेस्वरए गेलाई गेप्रभु येसु ख्रीसलाई गेयुँ सुहुपुदकाव ओयासिउ असिकर नोरालाई मनी ओरायोए डा परमेस्वरए ओयेनलाई कै जैद डावैंधुरिजूयाव?" है लिद पत्रुसए है ओरादोक ते, 18 नोर सुए ज़ काता ज़ मापाँधुद परमेस्वरए उमिन सघ्योःद्याद, "परमेस्वरए छुत जातलाव मिँरालाई मनी यायुँ याफकैवनी अजम्बरी जुनी दैन्या असिक ओरायो ओल्यो," है लिकेर।

येसुए ओपाँ एन्तिओखियाल ओथासो

19सृतिफनसए ओपालाकिनकाव यरूसलेमलाव येसुए ओपाँत हुवरालाई याखिरी यापसिक ख्वार फोनिके खन्ददा, ख्वार साइप्रस तापुदा, ख्वार एन्तिओखिया सहरदा धोंद खासिद लिनाकेर। नोराए नड मनी येसुए ओपाँ यारासथैक यहूदीरालाई वाज्ज यारासथैज्याव। 20 खाली नोराए याखार्नी साइप्रस तापु सोनो कुरेनी देसनी हुवर तोबो नेब्लोए एन्तिओखियाल बाद छुत जातलाव मिँरालाई मनी प्रभु येसुए ओपाँ यारासथैकेर। 21 परमेस्वर नोरास उलिज्यावए बनै कुधुए यायुँ हुपद प्रभु येसुए ओपाँत हुकेर।

22नो पाँर छींनी यरूसलेमलाव मन्दलील मनी थासूद बारनाबासलाई एन्तिओखियादा परींकेर। 23 बारनाबास होड ओकेस्क परमेस्वरए नोराए याखार्ल ओदोव असिकर रेंद बनै खुसी ताके। नोरालाई, “प्रभुए ल्योदा जेयुँ थरैद ओसत तारासच्यो,” लिद यायुँ सज्ञेंद याएक्यो। 24 बारनाबास धर्मी, उयुँ हुबो, छैव पुरूसए ब्यालो मिँ ओल्यो। नोए ओपाँ थैद मिँर सर्बा माहोल्या ज़ येसुए ओपाँत चाःसिहुकेर।

25नकिन जाँवाक बारनाबास तार्सस सहरल बाद साऊललाई खिम्नाक्यो। 26 ओदैवत नोलाई मनी एन्तिओखियाल रैक्यो। नोनी नेब्लो बर्सदिन पै नल ज़ लिद मन्दलीलाव मिँरास खैद परमेस्वरए ओयेम कुधुलाई यारापैकिनी। नो एन्तिओखियाल येसुए ओपाँत बाज्यावरालाई हाःकिन यामिन ख्रीस्त्यान जैद याराएकेर।

27हाः बेलाक यरूसलेमनी अगमबत्तार तोबो नेब्लो एन्तिओखियाल हुकेर। 28 नोरानी तोबो अगाबस यादोज्यावए छैव पुरूसनी, “संसार भरिल बनै घ्योःव अनिकाल हरिज्या,” है लिद डादा ज़ पाँके। थिक है ओल्यो मिताव ज़ नो पाँ रोमी माहाराजा क्लौदियसए ओपालाक योके। 29 है जैद एन्तिओखियालाव यायुँ हुबोराए यहूदिया खन्दल

लिज्याव यादाज्यु भाइरालाई सघैन्या युँ दाद याधुवा भरी सु सु यापैसार स्योन्द, 30 नो पैसा बारनाबास सोनो साऊलनी निकुइत यरूसलेम मन्दलीलाव सररालाई परींद याराएकेर।

12

पत्रुस इयालखानानी उपुलुसो

1हाः बेलाक हेरोद राजाए मन्दलीलाव रूवा रूवारालाई क्योःद बनै दुख याएक्यो। 2 यूहननाए ओदाज्यु याकूबलाई ते झन खोर्च्योए पल्द सैःक्यो। 3 यहूदीर ननी बनै खुसी याताव रँःद हेरोदए पत्रुसलाई मनी क्योःव यापरीक्यो। नो बेलाक माँदा भरेस ज्यान्या पर्व ताद उलिज्याव। 4 पत्रुसलाई क्योःद, इयालखानाल झाःद सोह जना सिपाईराए याजिम्बाल नैद, ‘पर्व ओखेमोत ची जनताराए याङ्काक डसतैया ब’ है उलिज्याव। 5 पत्रुस इयालखानाल उलिज्याक मन्दलीए नोए उज्जनी परमेस्वरलाई बनै पोंखारिउ ज्ञ यानैज्याव।

6हेरोद राजाए जनताराए डाक पत्रुसलाई सतैव ओपैज्याव ओङ्गालाव छचाम रील, पत्रुस इयालखाना जील नेब्लो सिपाईनी निखाल साँगलए किसिउ स्याँद उलिज्याव। ग्रामक मनी पाल्यार च्याँःसिद गुद यानैज्याव।

7हाःत ज्ञ उमँःजानी परमेस्वरए ओचाकर्या सरैःसिद ओज्जगैए इयालखानाल पलाँ जैद, पत्रुसलाई कोतैद, “सोद घलसिन्के,” है दाद ओसोचोइव प्राइँना ज्ञ ओसाँगलर यानी ज्ञ पलाःसिद तेकेर।

8 हाःत ज्ञ नो चाकर्याए, “नवाँःफोर पोःसिद नपोलार जासिन्के,” है ओदोक ते, पत्रुसए हैज्ज जैक्यो। नकिन, “नबर्की क्वाइसिद डाछींत हुन्के,” है ओदोक ते, 9 पत्रुस लाँःदा पुलुसुद उछीं उछीं ज्ञ बाके। खाली उयुँल ते, ‘आव भरी झजल्किद डारँःज्याव ज्ञ ताखेहो’ लिद नो साचो ज्ञ ओल्यो लिन्या ओमासैँज्याव। 10 नोनी उस०कताव पाल्यालाई बलेंद, फरी हुकिनकाव पाल्यालाई ब बलेंद सहरल

बाजूयाव झँए यामक निकेस्क नो याम ओलनी ज़ फ़ैसिके। ननी पुलुसुद येमत निबाजूयाक नो चाकर्या उमँ:जानी समैसिके।

11 हा:त ज़ पत्रुसए ओचेत फ़र्किद, “साचो ज़ ओल्यो, परमेस्वरए डाल्योक ओचाकर्यालाई परींद ओयाँव ची ओल्यो। नोए डालाई राजा हेरोद सोनो यहूदीराए याजालनी जोगोइद ओपलेनाव ची ओल्यो!” है लिके। 12 है जैद आव पाँ भरी चेतैद पत्रुस मरियमए उझिमक बाके। नो मरियम मर्कूस यादोज़्याव यूहननाए ओआमा ओल्यो। नल हो बेलाक कुधु मिँर दुप्सिद परमेस्वरलाई यापोँखारिजूयाव। 13 पत्रुस यामक हुद कोतो कोतो ओजैक तोबो रोदा यादोज़्याव नोकोर्नी मेंमाए यामक चिऊनाक्यो। 14 रोदाए पत्रुसए ओर्गा ओसरेसो प्राइँना ओरेंतए याम माफ़ैद झन झिमल धों:नाद, “दे, पत्रुस हुद यामक च्याँ:सिद ले,” है ओरादोक ते, 15 प्राइँए, “काता नपाँजूयाव निताव स्यावदिनी ब्यावदी?” है यादोक ते, नो लुज़ाए, “हो ज़ ब्याँ, हो ज़,” है यादोक्यो। नोराए झन, “उपुरुस नरँ:व ताखेहो,” है दोकेर।

16 ना: भरिल पत्रुस यामक च्याँ:सिद कोतोका कोतो जैव ज़ ओनैजूयाव। बल्ल नोराए यामक बाद याफ़ैनाक पत्रुसलाई रँ:द बनै अचम्ब ताकेर। 17 पत्रुसए ‘इयाउँ तालिच्यो’ लिद उकुइए सान दाद परमेस्वरए इयालखानानी ओपलेकाव पाँ भरी है यादोक्यो। नकिन, “आव पाँ भरी याकूब सोनो उपुर्काव गेनैरालाई मनी है यारादोक्यो,” है दाद ओल ननी पुलुसुद छुतड बाके।

18 हो परा:ती इयालखानाल ‘पत्रुस काना ओबाव’ लिद पाल्याराए याखार्ल राउँनी इयाउँ ताके। 19 हेरोदए उसिपाईरालाई नोलाई सापो ओरापरींक यामादैवए नो पाल्यारालाई तोबो तोबोनी खोलेद, नोरालाई सै:न्या सजा याएक्यो।

हेरोद राजा उसिउ

नकिन हेरोद राजा यहूदियानी पुलुसुद कैसरिया सहरल बाद नल

ज उलिज्याव। ²⁰ हाः बेलाक तुरोस सोनो सीदोन सहरलाव मिरास हेरोद बनै रसिद उलिज्याव। खाली नोराए याज्याव भरी हेरोदए ओपोनी उहुज्यावए नोराए होस सखैसिउ यापैज्याव। है जैद याघेपपार हेरोदए ल्योक हुद तोबो उयुं हुबो ओकर्मचारी बलसूतसलाई याल्योदा जैद राजास पाँव यापैज्याव। ²¹ जलफल दान्या याथरैव छचाम, हेरोद बनै तह महौ जैसिद उसिंहासनत चुसिद ओपाँ यासथैक्यो। ²² ओपाँ थैज्यावराए, “आव पाँ ते मिँए ओपाँ माःक, ईस्वरए ओपाँ ची,” है लिद बनै ज़ क्रिकेर। ²³ हाःत ज़ हेरोद सन्द परमेस्वरलाई ओमान नैद ओमायोए प्रभुए तोबो ओचाकर्याए फाल्पाप फुर्लुप ओख्याक रूइद सिके।

²⁴परमेस्वरए ओपाँ झन ज़ बाःद प्राईंदा ज़ राःसिनाके। ²⁵ बारनाबास सोनो साऊलनी यरूसलेम मन्दलीलाव पैसा भाःन्या नियेन निखेमोत, यूहनना यादोज्याव मर्कूसलाई ब नीस ज़ लाँद एन्तिओखियादा ओल्द बाकेर।

13

बारनाबास सोनो साऊलनिलाई खतैद यारापरींव

¹एन्तिओखियालाव मन्दलीए खार्ल अगमबक्तर सोनो परमेस्वरए ओपाँ पलासूज्यावर यालिज्याव। नोराए यामिनर आवर ज़ — बारनाबास, काल्या यादोज्याव सिमियोन, कुरेनीलाव लुकियस, साऊल, सोनो जिम्ज़ाकिन ज़ हेरोद राजास तोबो झिमल सिप हर्किउ मनेन याल्यो। ² नोर तछा दुप्सिद, उपासिद परमेस्वरलाई यापोंखारिज्याव बेलाक छैँव पुरूसए, “डा बारनाबास सोनो साऊलनिलाई डाज्नी डानिउथैव येनत जे ज़ नोनिलाई खतैद यारापरींच्यो,” है यादोक्यो। ³ है जैद नोर उपासिद पोंखारिद नोनी निक्याँत याकुइ नैद्याद हो येनत यारापरींकेर।

साइप्रसत येसुए ओपाँ ओथासो

⁴है जैद बारनाबास सोनो साऊलनी छैँव पुरूसए उनिखतैव येनत

बाकिनी। सिलुकिया सहर पै झरिद, नकिन री जहाजल पसिद साइप्रस तापुत बाकिनी। ⁵ नल सलामिस सहर निकेसोत यहूदीराए धर्मसास्त्र झिमल बाद परमेस्वरए ओपाँ यारासथैकिनी। नोनिलाई सघैन्या यूहन्ना ब उलिज्याव।

⁶नो तापु भरिल तछयोनी ज़ दुलिद पाफोस सहर याकेसोत नल तोबो बार-येसु यादोज्याव यहूदी धामीस दैसिकेर। नोए परमेस्वरए उमिन हाइद धुतनी ओरापैज्याव। ⁷ नो धामी तापुताव हाकिम सर्गियस पौलुसए ओसेवात उलिज्याव। नो हाकिम बनै ओगहक ल्यो मिँ ओल्यो। नोए परमेस्वरए ओपाँ थैन्याए जूँनी बारनाबास सोनो साऊलनिलाई ओल्योदा सथैना निखुल्क्यो। ⁸ खाली बार-येसु यादोज्याव एलुमास धामीए (ग्रीक खामनी एलुमासए ओअर्थ 'धामी' ज़) नोनी निपाँलाई वैद, हाकिमलाई नो पाँनी तँदा बले-व ओपैज्याव। ⁹ है जैद साऊल (छीनी उमिन पावल) छैव पुरूसए ब्याल्द, नोलाई लँ लँ चिऊद, ¹⁰ "ए सैतानए ओज़ा, धुतैद ज़्याज्याव, साचो पाँ भरी वैज्याव, नँ खा पै परमेस्वरए दाँव ओयेमलाई गाँत्या गुँती जैव नपैज्याव? ¹¹ नँ इताव नदोवए आछिमकिन परमेस्वरए ओसजा नक्याँत हुद जाँवा पै नमी लाम लुम ताद निमीए ओज़लाँ ब रँ:न्या नमाले," है ओदोव प्राइँना ज़ उमी मारै:द छाम छाम ताद दोरैन्या मिँ खिम्क्यो। ¹² नो हाकिमए निताव रँ:द परमेस्वरए ओपाँत अचम्ब ताद उयुँ हुपके।

एन्तिओखियाल येसुए ओपाँ ओथासो

¹³नकिन पावल ओनैनिस री जहाजल पसिद पाफोसनी बाद पामफिलिया खन्दलाव पर्गा सहरल केस्केर। नकिन ज़ यूहन्ना नोनिस भा:सिद यरूसलेमदा ओल्द बाके। ¹⁴ पावल सोनो बारनाबासनी ते पिसिदिया खन्दलाव एन्तिओखियाल बाद नासिन्या छचाम ओतावए धर्मसास्त्र झिमल बाद चुसिकिनी। ¹⁵ नो झिमलाव घेप्पाराए मोसाए ओकानुन सोनो अगमबक्ताराए यापाँर

यारासथैवत बारनाबास सोनो पावलनिलाई, “अ भाइनी, जिनस यूँ सझें:न्या काता पाँर उलिकिन गेलाई सथैव ताके,” है यारादोकेर। 16 हा:त ज़ पावल याड़ाक च्याँ:सिद उकुइए सान दाद, “अ इस्राएली डानैर सोनो परमेस्वरए ओमान नैजूयाव छुत जातलाव मिँर, आदा थैचिके। 17 इस्राएली जातलावराए गेपरमेस्वरए गेसाखा पुर्खारलाई छाँतिद, इजिपल खासिद यालिजूयाव बेलाक नोरालाई बनै ज़ सबाद, ओल उकुइनी ननी पलेद दौरैद यालाँक्यो। 18 माचाव यादिउदीलाई ब चालीस बर्स भरी सहिद बनल पाथस यानैक्यो। 19 नोरालाई लिन्या पो जैद्यान्याए जूनी कनान देसलाव सात राज्यारालाई यामिन समैद्याद नो पो यामीं ज़ जैद याएक्यो। 20 नो भरी चार सय पचास बर्सवा लागिके। “नकिन समूएल अगमबक्ताए ओपालाक पै नोरालाई याराज्या चलैन्याए जूनी परमेस्वरए न्याधिसर खतैद याएक्यो। 21 हा: बेलाक इस्राएलीराए, ‘गेलाई चलैन्या तोबो राजा जैद्यासिके,’ है यादोक ते, परमेस्वरए नोरालाई तोबो साऊललाई याराजा जैद याएक्यो। नो मिँ बेन्यामीन थरलाव कीसए ओज़ा ओल्यो। नो मिँ चालीस बर्स पै याराज्या चलैद याएक्यो। 22 छीनी परमेस्वरए नोलाई पलेद दाऊदलाई याराजा जैद याएक्यो। होए उजूनी ओल परमेस्वर ज़ अइ लिद उलिजूयाव, ‘यिसैए ओज़ा दाऊदलाई डायुँलाव मिँ ज़ थरैद डानै। नोए डायेन भरी चावस ज़ दान्या ले।’ 23 परमेस्वरए नो मिँ ओथोनी ज़ गे इस्राएलीरालाई ओय्याकालाव पाँर सयोद्याद गेलाई तोबो बाँचैजूयाव परीद्यासिक्यो। नोए उमिन येसु ज़। 24 खाली नो ओमाहुवा पै, रील सछैँजूयाव यूहन्याए इस्राएलीरालाई, ‘जेपापलाई रास्द रील सछैँसिहुचिके,’

13:17 13:17 प्रस १:७; १२:५१ 13:18 13:18 गन्ती १४:३४; ब्य १:३१ 13:19 13:19 ब्य ७:१; यहो १४:१ 13:20 13:20 न्याय २:१६; १ समू ३:२० 13:21 13:21 १ समू ८:५; १०:२१ 13:22 13:22 १ समू १३:१४; १६:१२; भज ८९:२०

है लिद ओरासथैजूयाव। 25 नोए ओयेन ओखेमनावत, 'जे रूवाराए डालाई ख्रीस है जेदाँजूयाखेहो। डा हो माःक, नो डाकिन छींनी हरिजूया। डा ते नोए ओपोलाए ओचें पलान्या स्यासो ब डामाले,' है ओरादोजूयाव।

26“जे डादाज्यु भाइर, अब्राहामए ओथोर सोनो परमेस्वरए ओमान नैजूयाव छुत जातलाव मिँर, आव है डादाचिजूयाव परमेस्वरनिकाव बाँचैन्या पाँर गे प्राइँए गेजूनी ज़ लिजूया।

27 यरूसलेमलाव मिँर सोनो गेघेपपाराए झन नो येसुलाई ज़ मासरेसुधुकेर। नासिन्या छचाम साताकाव तखेप दुप्सिद अगमबक्तराए यापाँर प्रिद ब नो पाँए ओअर्थ माप्राल्धुकेर। है जैद झन येसुलाई सैःन्या थरैद, मासैद ज़ नो पाँर सयोःकेर।

28 नोलाई सैःन्या खत कान्त ज़ यामादैजूयावत ब, 'सैःन्या ज़' लिद पिलातसलाई सुँपिकेर। 29 नोए उजूनी धर्मसासत्रलाव सर्सिउ पाँ भरी प्राइँ ज़ यासयोःवत ओमोरोलाई क्रुसतिन हाइद खादरल झाःकेर।

30 खाली परमेस्वरए झन नोलाई सिउनी सोचोइक्यो। 31 सिउनी ओसोवत ओलस गालील खन्दनी यरूसलेमल हुव ओनैराए ल्योक कुधु दिन पै सरैःसिके। नोर ज़ आज्याल ओसाचीर लिजूयार।

32“है जैद गेसथैचिजूयाव चाव था आव ज़ — गेसाखा पुर्खारालाई ओरायो याका भरी 33 येसुलाई सिउनी सोचोइद गे याथोराए गेक्याँत ज़ सयोःद्यासिक्यो। किताव भजन पोस्तोकोलाव दुईल सर्सिउ लिजूया, हिताव ज़ योःके। नलाव सर्सिउ आव ज़,

‘नँ डाज़ा ज़,

आछिम ज़ नँलाई डाजर्मैनिके।’

34फरी धर्मसासत्रल परमेस्वरए येसुलाई सिउनी सोचोइद फरी ब सिउ यान्या माले लिन्या डादाकिन ज़ ओरैःजूयाव। तोथो आव ज़, 'दाऊदलाई डायो याकालाव थोरिउ छैव असिकर,

जे छींनीकावराए जेक्याँत ज़ सयोःद्यान्या डाले।’

³⁵फरी तोथोल अइ लिद ब सर्सिउ लिज्या,

‘अ परमेस्वर, नँ छैव नज़ालाई,

खादरल चिउ यान्या नमाले।’

³⁶“ओल दाऊद ते उपिरील वाज़ लिद, परमेस्वरए ओयेनर सयोःद

उजिज्यु बाज़्युराए माँःती सिद खादरल बाद चिके। ³⁷ खाली

परमेस्वरए येसुलाई सिउनी ओसोचोइवए ओक्याँ माचिए। ³⁸ है

जैद डादाज्यु भाइर, आव ब सैच्यो — आव है डादाचिज्याव

येसुनी, जेदोव पापए सजा क्याल्सिज्या। ³⁹ मोसाए ओकानुननी

उस्क़िउ गोमादैवए जो मिँए येसुलाई उयुँ हुपूज्या, नो प्राइँनी ज़ फुर्सुल

ताद परमेस्वरस खैज्या। ⁴⁰ है जैद आव पाँत जोगोइसिच्यो, मानी

अगमबक्तराए यापाँ जे जेक्याँत ज़ तान्या ले। नो पाँ आव ज़,

⁴¹‘अ डापाँलाई हसैद ल०ज्यावर,

अचम्ब ताद नास ताच्यो।

जे जेपालाक ज़ अचम्बलाव येन तोबो डादोरिज्या।

नो येन सुवाराए है यादाचिदी ब पतिन्या जेमाले।’ ”

⁴²पावल सोनो बारनाबासनी धर्मसास्त्र झिमनी पुलुसूद निबाज्याक

नो थैवराए, “आव जिनपाँ फरिकाव साताक मनी गेलाई सथैव

ताके,” है यारादोकेर। ⁴³ भाःसिद निबावत मनी कुधु यहूदीर सोनो

छुत जातलाव यहूदी धर्म मानिज्यावर नीस ज़ बाकेर। है जैद

पावल सोनो बारनाबासनी, “आव जेथैव पाँत थ०रिद परमेस्वरए

ओयाचिउ असिकलाई तारासच्यो,” है लिद यारासथैकिनी।

⁴⁴नो हुव साताकाव नासिन्या छचाम सहरलाव लिज्याव जाँकोसै

मिँर परमेस्वरए ओपाँ थैना हुकेर। ⁴⁵ यहूदीराए, मिँर नाः कुधु

याहुज्याव रँःद यामी तूद पावलए ओपाँ पलूतैद्याव पैद नोलाई

थल्केर। 46 नाःत ज़ पावल सोनो बारनाबासनी, निपाँ छत्कैद है यारादोकिनी, “परमेस्वरए ओपाँ थैन्या मौका डादा ते जे यहूदीरालाई ज़ याव ताके है गिन्लिज़्याव। खाली जे नो पाँलाई भीःद अजम्बरी जुनी दैन्या मौका जेमाभैःवए, गिन ते छुत जातलाव मिँरालाई गिन्रासथैनारिज़्या। 47 आवए उजूनी परमेस्वरए धर्मसास्त्रल मनी अइ लिद ले,

‘बाँचैन्या डापाँ मानुवाताव काना कुनीड पै जेनी ज़ ओकेस्क लिद, छुत जातलाव मिँराए ल्योदा ब ज़गै मिताव जैद डानैचिए।’”

48नो परमेस्वरए ओपाँ थैद नकाव लिज़्याव छुत जातलाव मिँर बनै रेंद नो पाँए उजूनी धन्या धन्या है लिकेर। है जैद परमेस्वरए अजम्बरी जुनील बान्या थरैद ओरानैज़्याव भरिए नो पाँत यायुँ हुपके।*

49है जैद परमेस्वरए ओपाँ नो खन्द भरिल प्राइँदा ज़ ओराःसिनाज़्याव। 50 खाली नलाव यहूदीराए माभैःद याधर्म मानिज़्याव धनी मेंमार सोनो सहरलाव घेप्पारालाई मचैद पावल सोनो बारनाबासनी निखिरी पसिउ परींद यापोनी याराखेपैकेर। 51 है जैद पावल सोनो बारनाबासनी, माभैःज़्यावरालाई परमेस्वरए ज़ न्याय ओदोवक लिद निखँताव गालो धुइरो ब सीद ख्यानैद्याद आइकोनियन सहरदा बाकिनी। 52 परमेस्वरए ओपाँत हुव भरी ते छैँव पुरूसए ब्याल्द रेंव ज़ यालिज़्याव।

14

आइकोनियनल येसुए ओपाँ ओथासो

1आइकोनियन सहरल मनी पावल सोनो बारनाबासनी यहूदीराए धर्मसास्त्र झिमल बाद परमेस्वरए ओपाँ निरासथैक चावस पलासद् निरायोए यहूदीर सोनो छुत जातलावर बनै कुधु ज़

13:47 13:47 यसै ४२:६; ४९:६ * 13:48 13:48 छुत बुझिन्या — अजम्बरी जुनील बान्या थरैज़्याव भरिए नो पाँत यायुँ हुपके।

नो पाँत यायुँ हुपुके। 2 खाली माभैःजूयाव यहूदीराए ते छुत जातलाव मिँरालाई मचैद, 'नोनी निपाँ ताथैच्यो' लिद यार्नाल झाःद याराएकेर। 3 हितावत मनी नोनी नो सहरल कुधु पै लिद प्रभुए ओक्याँत ख्यासिद माछेःद ज़ ओपाँर यारासथैकिनी। परमेस्वरए मनी थैजूयावराए यायुँल यालो ओपाँर साचो ज़ थरैद्यान्याए जूँनी पावल सोनो बारनाबासनी निक्याँनी अचम्बलाव येनर सरेसर ब दाव उनिएजूयाव। 4 है जैद नो सहरलाव मिँर नेभा ताकेर। तभा यहूदीराए ल्योदा यालिजूयाव, तभा पावल सोनो बारनाबासनी निल्योदा यालिजूयाव। 5 छीनी नलाव छुत जातलाव मिँर सोनो यहूदीर याघेपपारास तोबो बुद्धी कलैद नोनिलाई बीजूयात जैद लुँए झेःव यापैजूयाव। 6 नोनी था निदैवत ननी धोःद लुकोनिया खन्दलाव लुसूत्रा सोनो दर्बी सहर जीदा बाकिनी। 7 नल मनी परमेस्वरए ओपाँ यारासथैकिनी।

लुसूत्राल येसुए ओपाँ ओथासो

8 लुसूत्राल तोबो मिँ जर्मननी ज़ उखँ सिउ चुसिद उलिजूयाव। नो मिँ खर्क ज़ ओमाबाधुजूयाव। 9 पावलए नल मनी परमेस्वरए ओपाँ ओरासथैजूयाक नो मिँए बनै धिद ओथैजूयाव। पावलए नोलाई रँःद सगराँसिन्याए जूँनी उयुँ उहुपूजूयाव मिताव रँःद, 10 बनै चोइस, "नखँर पलासूद च्याँःसिन्के," है ओदोव प्राइँना नो मिँ थर च्याँःसिद आदा होदा लिके। 11 नलाव माहोल्याराए पावलए ओदोव येन रँःद अचम्ब ताद, लुकोनिया खामनी, "देवतार मिँ जैसिद गेल्योक ज़ याहुव ओल्यो," है लिद किकेर। 12 बारनाबासलाई 'जिउस' देवता है दोकेर, पावललाई परमेस्वरए ओपाँ सथैजूयाव मुख्या मिँ ओतावए 'हर्मेस' देवता है दोकेर। 13 जिउस देवताए ओथान सहर लापक उलिजूयाव। है जैद नो देवताए उपुजारीए माहोल्यारास खैद, वासर जासूसिउ बहरर सहरलाव ग्रामक रैद, नोनिलाई पुजा दाव पैकेर।

14 हा:त ज़ बारनाबास सोनो पावलनी 'अइ ची याजैजूयाव ओल्यो' लिन्या सैद, हार मानिद निक्वार चीए चीए माहोल्याराए याखार्ल बाद, 15 "काता जेजैसिजूयाव इताव? गिन मनी जे स्यासो मिनी ज़ ची। गिन गिन्सथैचिजूयाव चाव पाँनी ते इताव माचाहिउ पुजा दान्यालाई रास्द, नाम नम सोनो नलाव लिजूयाव भरी जैजूयाव, जींदो परमेस्वरलाई मानिन्या लिजूया। 16 परमेस्वरए डादाकिन जे मिताव छुत जातलाव मिँरालाई जेमन लागिउदा बाव ओयाचिजूयाव। 17 हैदी मनी ओललाई सरेसून्या सरेसर प्राईलाई ज़ याएक्यो। जेल्योदा मनी दाइनो ताद नम सवाद्याद, ज़यावर सपरीद्याचिजूयाव। जेचाहिजूयाव भरी जोरैद्याद जेफू तसी जैद्याद जेयुर होलाँ जैद्याचिजूयाव," है लिद, 18 है निरादोज़यावत मनी नो माहोल्यारालाई पुजा दान्यात धो वैव ताकिनी।

19 छीनी एन्तिओखिया सोनो आइकोनियनलाव यहूदीराए लुसत्राल हुद नलाव माहोल्यारालाई मचैद, पावललाई लुँ लुँए झे:द लल्यातोरो जैद, 'उसिउ ची ओल्यो' लिद सहरकिन पाखाड ख्याकेर। 20 खाली नो सहरलाव येसुए ओपाँत बाजूयावर पावलए ओल्योक गुरिगाँ यादुप्सिक, पावल सोद यास ज़ सहरदा बाके। हो परा:ती बारनाबासस दर्बी सहरदा बाकिनी।

सिरियालाव एन्तिओखियादा निओलो

21 पावल सोनो बारनाबासनी दर्बील मनी चाव था सथैद येसुए ओपाँत हुन्यार कुधु ज़ याराजैकिनी। नकिन फरी ओल्द लुसत्रा सोनो आइकोनियन सहरलाव घ्याँ पिसिदिया खन्दलाव एन्तिओखियादा बाद, 22 नलाव, परमेस्वरए ओपाँत हुवरालाई, "परमेस्वरए ओपाँ तारासूच्यो," लिद यार्युर सज़े:द्याद, "परमेस्वरए ओराजूयाल कुधु दुखर सहिद वाज़ केसून्या गेले," लिद यारासम्जैकिनी। 23 सु सु यामन्दलील सेवा चलैन्या स्रेर

खतैद्याद नोराए जूनी उपासिद पोंखारिद यायुँ यासुहुबो परमेस्वरए ओपासल याराझाःकिनी। ²⁴ नकिन पिसिदिया खन्दलाव घ्याँ बाद पामफिलिया खन्दल केस्किनी। ²⁵ नल पर्गा सहरल बाद फरी ब परमेस्वरए ओपाँ यारासथैकिनी। ननी पुलुस्द अतालिया सहरल बाकिनी।

²⁶नकिन फरी री जहाजल पसिद सिरिया खन्दलाव एन्तिओखियादा बाकिनी। झादा नो एन्तिओखियानी ज़ नोनिलाई परमेस्वरए ओपाँ सथैन्याए जूनी नलाव यायुँ हुबोराए परमेस्वरए ओपासल झाःद परींद यारानैज्याव। है जैद नो येन सयोःद नल ज़ ओल्किनी। ²⁷ पावल स़ोनो बारनाबासनी नल निकेसो प्राईना मन्दलीलाव मिँरालाई दुपद परमेस्वरए नीस ओदोव येन भरी है यारादोकिनी। “परमेस्वर गिनस गिनस बाद छुत जातलाव मिँरालाई पाला ओराज्याल पसिन्या येम फैद याएक्यो,” है लिन्या पाँर ब यारासथैकिनी। ²⁸ नोनी नो सहरल यायुँ हुबो निनैरास कुधु पै लिकिनी।

15

पुराँदो चलनत याखर्लेसिउ

¹पावल स़ोनो बारनाबासनी एन्तिओखियाल निलिज्याक यहूदिया खन्दनी तोबो नेब्लो मिँर हुद नलाव येसुए ओपाँत हुवरालाई, “जे मोसाए ओकानुननी क्याल्न्या सरेस जेमाजैसिवा पै अजम्बरी जुनी दैन्या जेमाले,” है यारादोज्याव। ² नो पाँत पावल स़ोनो बारनाबासनी नोरास माखैद बनै खर्लेसिकेर। छीनी नलाव यायुँ हुबोराए या यामीर तोबो नेब्लो जैद पावल स़ोनो बारनाबासनि स यरूसलेमदा बान्या थरैकेर। ‘होड बाद येसुए ओसाचीर स़ोनो मन्दलीलाव स़ेररास दैसिद आव पाँए उजूनी सल्ला दाव ताके’ लिद, ³ मन्दलीए नोरालाई यापरींक्यो। नोर ननी पुलुस्द

फोनिके स्नो नो सामरिया खन्दलाव घ्याँ बाद, 'छुत जातलाव मिँर मनी परमेस्वरए ओपाँत हुज्जार' है लिन्या थार यारासथैक, नलाव यादाज्यु भाइर बनै ज़ रेंकेर। 4 यरूसलेम याकेसोत नलाव मन्दलीलावर यासेररास स्नो नो येसुए ओसाचीराए नोरालाई यारासुम्केर। पावल स्नो नो बारनाबासनिस परमेस्वरए ओदोव येन भरी है यारादोकिनी।

5 निताव पाँ थैद येसुए ओपाँत हुव फरिसीर रूवा रूवार जाँ माभैःद च्याँःसिद, "छुत जातलाव मिँर मनी परमेस्वरए ओपाँत याहुव प्राइँना क्वालून्या सरेस जैसिद, मोसाए ओकानुन ब सयोःव ज़ परीं व ताके," है लिकेर।

यरूसलेमलाव सेरराए याथःरैव पाँ

6 है जैद नो पाँ थःरैन्याए जूनी येसुए ओसाचीर स्नो नो मन्दलीलाव सेरर दुप्सिद, 7 कुधु यापाँवत पत्रुस याड़ाक च्याँःसिद अइ लिद यासथैकयो, "अ डादाज्यु भाइर, आदा थैचिके। छुत जातलाव मिँरालाई चाव था सथैद परमेस्वरए ओल्योदा जैन्याए जूनी डालाई जेखानी डादाकिन ज़ खतैद ओनैनाज्याव जे ज़ जेसैज्या। 8 प्राइँए यायुँलाव पाँ सैज्याव परमेस्वरए गेलाई ओयासिउ मिताव ज़ नोरालाई मनी छैँव पुरूस याद उमीर ज़ ओराजैव सतैद याएक्यो। 9 स्नो नो परमेस्वरए जातए ओलेखा मानैद नोरालाई मनी यायुँ यासुहुबोनी ज़ यायुँर सछैँद याएक्यो। 10 है जैद काराव गोसाखा पुर्खाराकिन ज़ गोमासहिधुहुज्याव चलनर इन नोरालाई दाव परींद परमेस्वरलाई जाँचिन्या? 11 नोराए मिताव, गो मनी प्रभु येसुए गेल्योदा उयुँ ओगराँवनी वाज़ अजम्बरी जुनी दैन्या गेताज्या," है ओरादोक ते, 12 नो पाँत प्राइँ ज़ थाम थुम ताकेर।

नकिन पावल स्नो नो बारनाबासनी निपाला ताद छुत जातलाव मिँराए याखाल नोनी निक्याँनी ज़ परमेस्वरए दाद ओरायो अचम्बलाव येनर है निरादोक ते नोराए बनै ज़ धिद थैकेर।

13नोनी निपाँ ओखेमोत याकूबए अइ लिद यासथैक्यो, “अ डादाज्यु भाइर, आदा थैचिके। 14 सिमोन पत्रुसए ओयाःनी जे ज़ थैद जेने — परमेस्वरए छुत जातलाव मिँराए याखार्नी मनी ओल उमीर ओराजैज्याव ओल्यो। 15 नो पाँत अगमबक्ताराए यापाँ ब चबनै खैज्या। नोराए यापाँ इताव सर्सिउ लिज्या,

16नाः भरी ओतावत डा फरी हुद,

चितराँ पुतराँ ताव दाऊदए ओराज्या बनैघान्या डाले।

ताव ओभार्नारालाई फरी रिम्द,

माव उमिन फरी ब नैघान्या डाले।

17नाःत ज़ मानुवाताव मिँर प्राइँए ज़ परमेस्वरलाई खिमन्या लेर।

डामिनत डाराछाँतिउ छुत जातलाव मिँर ब डाल्योदा हुन्या लेर।

18आव पाँर परमेस्वरए नाम नम ओजैवकिन ज़ गोइँद ओनैज्याव।’

19“है जैद डादाज्यु भाइर, डा डाबिचार इताव लिज्या — नो परमेस्वरए ल्योदा हुज्याव छुत जातलाव मिँरालाई माचाहिउ वैन्या मित्ताव पाँर झाःघान्या माःक। 20 बुरू नोरालाई गेल्योनी चिथी तोबो परीँद, नो चिथील ‘खाली अडग्यालाई चरैःसिउ ज्यावर ताज्युच्यो, ओधेँ फर्लेद सैःसिउ स्याकरी ताकैच्यो, झी ताज्युच्यो, पातर्या पातर्नी ब ताजैसिच्यो’ है लिन्या पाँर वाज़ सर्द परीँव ताके। 21 नोरालाई मोसाए ओकानुन थैन्या मौका ते भाःकिन ज़ उलिज्याव। नोए ओपाँ सहर सहरल धर्मसास्त्र झिम झिमक नासिन्या छ्याम सथैव ज़ यारानैज्यार,” है लिद यासथैक्यो।

22है जैद येसुए ओसाचीर, ओपाँत बाज्याव सेरर सोनो मन्दलीलाव मिँर प्राइँ तोबो पाँत खैद यासकाव नेब्लो मिँनिलाई पावल सोनो बारनाबासनिस एन्तिओखियादा बान्या याराखतैकेर। नोनी घेपपा मान दैव मिँनी ज़ निल्यो, निमिन बारसाबास यादोज्याव यहूदा,

सोनो सिलासनी। ²³ नोनी निकुइत इताव चिथी परींकेर,
 “गे येसुए ओसाचीर सोनो मन्दलीलाव लोम्बा जेदाज्यु भाइराए
 गेल्योनी, जे एन्तिओखिया, सिरिया सोनो किलिकियाल लिज्याव
 छुत जातलाव गेदाज्यु भाइरालाई आव चिथी परींद गयाचिज्या।
²⁴ गेल्योनी बाव तोबो नेब्लो मिर जेल्योड हुद यापाँए जेयुँलाई
 आँचा पाँचा जैद याचिकेर दी लिन्या गेथैके। निताव सल्ला गे
 गेल्योनी हुव माःक, यानी ज़ ची। ²⁵ है जैद गे भरी दुप्सिद तोबो
 नेब्लो गेमीरालाई गेयुँलाव पावल सोनो बारनाबासनिस जेल्योदा
 परींन्या गेथरैके। ²⁶ नो पावल सोनो बारनाबासनी गेप्रभु येसु
 ख्रीसए ओयेनत निक्याँलाई मया मारिद निजिउ ज़ थाँद नैनी। ²⁷ है
 जैद नोनिस यहूदा सोनो सिलासनिलाई मनी गेरापरींज्या। नोनी
 ज़ आलाव सर्सिउ पाँ साचो गेनी ज़ हुव लिद जेलाई है दान्या
 लिनी। ²⁸ अब गे भरी दुप्सिद छैँव पुरुसनी जे दान्या येन आव
 ज़ थरैद गेनै — उपुर काता कर ज़ माले, खाली आव खास पाँर
 भन्या भैःव ताके — ²⁹ अडग्यालाई चरैःसिउ ज़यावर ताज्युच्यो,
 झी ताज्युच्यो, ओधें फर्लेद सैःसिउ स्याकरी ताकैच्यो, पातर्या
 पातर्नी ब ताजैसिच्यो। आव मादान्या येनर जेमादोकिन जेलाई चाव
 तान्या ले।

गेपाँ आःज़, जेरो।”

³⁰ नो चार जना यारापरींवर एन्तिओखियाल बाद नलाव
 मन्दलीलाव मिरालाई दुपद नो चिथी याराएकेर। ³¹ नो युँ सझेंःन्या
 चिथी दैवराए प्राइँलाई प्ररिद यारासथैक यायुँ होलाँ ताद प्राइँ ज़
 बनै रेंकेर। ³² यहूदा सोनो सिलासनी मनी अगमबक्ता नितावए
 नोनी मनी नलाव मिरालाई परमेस्वरए ओपाँर सथैद यायुँर बनै
 सझेंःद याराएकिनी। ³³ नो सहरल सर्बा ज़ निल्योत नलाव यायुँ
 हुबोराए फरी यरूसलेमदा चावस यारापरींकेर। ³⁴ [खाली सिलासए
 नल ज़ लिन्या चाव डम्सिके।] ³⁵ पावल सोनो बारनाबासनी ते

एन्तिओखियाल ज़ लिद छुत कुधुरास खैद परमेस्वरए ओपाँ पैद यारासथैकेर।

पावल सोनो बारनाबासनी निभाःसिउ

36 छींनी तछा पावलए बारनाबासलाई, “गिन नो परमेस्वरए ओपाँ गिन्रासथैव पो पोड बाद नलाव दाज्यु भाइर किताव यालिज्याव फरी तखेप चिऊना गिन्बा,” है ओदोक ते, 37 बारनाबास मनी भैःद निनै यूहन्ना यादोज्याव मर्कूसलाई ब लाँव ओपैज्याव। 38 खाली पावलए ते माभैःद, “आव येनत ओजाँगर माहुद गिनलाई पामफिलियाल रासूद ख्यानैव मिँलाई गिन काराव लाँन्या?” है दोक्यो। 39 है जैद नोए उजूनी नोनी जात ज़ माखैद भाःसिकिनी। बारनाबासए मर्कूसलाई ओलस ज़ लाँद री जहाजल पसिद साइप्रस तापुदा बाकिनी। 40 पावलए ते सिलासलाई रूजिद ओनै जैक्यो। नलाव लिज्याव दाज्यु भाइराए नोनिलाई उयुँ यालज्याव परमेस्वरए ओपासल झाःद चावस यारापरीकेर। 41 नोनी सिरिया सोनो किलिकिया खन्दल बाद नलाव मन्दलीलाव मिँरालाई पाथ पारैद यारुँ सङ्गेःद याराएकिनी।

16

पावल सोनो सिलासनी तिमोथीलाई नीस निलाँव

1 नकिन पावल सोनो सिलासनी दर्बी सोनो लुसूत्रा सहरल बाकिनी। नल परमेस्वरए ओपाँत तोबो उयुँ हुबो तिमोथी यादोज्याव उलिज्याव। होए ओआमा पाला उयुँ हुबो यहूदिनी ओल्यो, ओबाबु ग्रीक जातलाव ओल्यो। 2 लुसूत्रा सोनो आइकोनियनलाव यारुँ हुबोराए तिमोथीलाई बनै चाव मिँ थरैद यानैज्याव। 3 पावलए मनी नो मिँलाई ओलस बान्या ओनै जैव ओपैज्याव। खाली नजीदाडाव यहूदीराए ग्रीक जातलाव ओबाबुलाई पाइँए ज़ यासरेसूज्याव। है जैद नोरालाई सभैःन्याए जूनी तिमोथीलाई क्यालून्या सरेस जैदिक्यो। 4 हाःकिन नोनी सहर सहर, पो पोड ‘यरूसलेमलाव

येसुए ओसाचीर सोनो नलाव सेरराए याथरैव पाँर दोच्यो' लिद याराअर्थेकिनी। 5 ननी ज़ मन्दलीर यार्युरं झन ज़ हुपनाद, या ब झन ज़ बानाकेर।

पावलए दर्सनल माकेदोनियालाव मिँलाई उरँ:व
6 छैव पुरुसए पावल सोनो सिलासनिलाई एसिया खन्दल परमेस्वरए ओपाँ सथैन्या उनिवैवए फ्रिगिया सोनो गलातिया खन्दलाव घ्याँ बाकिनी। 7 नकिन माइसिया खन्द निकेसोत बिथिनिया खन्दल बाव निपैज्याक येसुए उपुरुसए फरी ब निवैक्यो। 8 है जैद माइसियानी पुलुसुद त्रोआस सहरल बाकिनी। 9 नल निलिज्याक तछा रील पावलए दर्सनल माकेदोनियालाव मिँलाई च्याँ:सिद उलिज्याव रँ:क्यो। नोए, “जिन माकेदोनिया खन्दल हुद गेलाई ब परमेस्वरए ओपाँ सथैव ताके,” है लिद बिन्ती दोक्यो। 10 है जैद पावलए निताव दर्सन उरँ:व छीनी, “परमेस्वरए गेलाई नदा मनी चाव था सथैना उपरीसिज्याव ओल्यो,” लिन्या थरैद हतप्त ज़ बान्या गेझा:सिके।

फिलिप्पीलाव लिदियाए परमेस्वरलाई उयुँ उहुबो
11 त्रोआसकिन री जहाजल पसिद एकसब्घा ज़ सामोथ्राके तापुदा गेबाके। नकिन हो परा:ती नियापोलिस सहरदा गेबाके। 12 नकिन बल्ल माकेदोनिया खन्दलाव तोबो फिलिप्पी यादोज्याव मुख्या सहरल गेकेस्के। नलाव मिँर जाँकोसै रोमी जातलावर यालिज्याव। नो सहरल सर्बा ज़ गेलिके। 13 न्नासिन्या छचाम सहरलाव ग्रामनी पुलुसुद, ‘भै छचोक पोंखारिन्या पो लिज्याखेहो’ लिद नदा ज़ गेबाके। नड दुपुसिद लिज्याव मेंमारालाई मनी परमेस्वरए ओपाँ गेरासथैके। 14 नोरास परमेस्वरए ओमान नैज्याव थिआतीरा सहरनी हुव तोबो लिदिया यादोज्याव मेंमाए बनै धिद ओथैज्याव। नो मेंमाए घ्यामो क्वाए

बेपार ओदोज्ञयाव। प्रभुए नोलाई पावलए है ओरादोज्ञयाव पाँर बुझिन्या युँ जैदिक्यो। ¹⁵ ओल सोनो उझिमलाव भरी रील सछैसिद, “डालाई परमेस्वरलाई उयुँ हुबो मेंमा जेथरैनाकिन डा डालिमक हुद गेस ज़ ल्यो ताके,” है दाद गेलाई मालाँद मातान्या जैक्यो।

पावल सोनो सिलासनिलाई इयालखानाल याराझाःव ¹⁶फरी तछा नो पोखारिन्या पोदा गेबाज्ञयाक तोबो जोखना चिऊन्या पुरुस दैव बाँदानी लुजास गेदैसिके। नो लुजाए, ओल्योक हुज्ञयावरलाई हुन्या पाँर पाँद्याद ओघरपतीरालाई कुधु पैसा कमैद ओराएज्ञयाव। ¹⁷ हो छचाम नो मेंमा गेछीं गेछीं हुद बनै चोइस, “आवर माहान परमेस्वरए ओनोकोरर ज़। यासथैचिज्ञयाव पाँर अजम्बरी जुनील सकेसून्या पाँर ज़,” है लिद उकिज्ञयाव। ¹⁸ कुधु दिन पै निताव क्रिउ ज़ उलिज्ञयाव। तछा पावलए उयुँ कोला कोला ताद नो मेंमाए ल्योदा भाल्सिद ओक्याँताव चरिउ पुरुसलाई, “डा नँलाई येसु स्त्रीसए उमिननी है डादीज्ञया, नोए ओक्याँतिन पुलुसद बान्के,” है ओदोव प्राइँना ज़ पुलुसद बाके।

¹⁹नो लुजाए ओघरपतीराए निताव रँःद, ‘गेपैसा हुन्या येम सूइघासिकिनी’ लिद पावल सोनो सिलासनिलाई क्योःद बजार खार्ल सेले सेले अदालतल लाँद, ²⁰ हाकिमराए याझाक सच्याँद, “आव यहूदीनी गेसहरलाव मिँरालाई गरबर याराजैज्ञ्यानी। ²¹ गे रोमीराए गेकानुनस माखैव, गेमाभैःज्ञयाव रितिथितीर यारापैज्ञ्यानी,” है यारादोकेर।

²²हाःत ज़ नलाव माहोल्याराए नोनी निक्वाँत भोरोगसिउ पैकेर। है जैद हाकिमराए नोनी निक्वार सिउःद्याद स्याकोराए रीःव यारापरींकेर। ²³ बनै ज़ प्रोद इयालखानाल झाःद पाल्यालाई बनै चावस गुव परींकेर। ²⁴ है जैद नो पाल्याए नोनिलाई प्राइँरानी उजींलाव कुन्तील झाःद, निखँत हला झाःद निएक्यो।

²⁵आधा रील पावल सोनो सिलासनी पोखारिद परमेस्वरए उमिनत

भजन निगैजूयाक, नीस लिजूयाव उपुर्काव कैदीराए याथैजूयाव।
 26 हाःत ज़ उमँःजानी बनै घ्योःव भोचालो हुद इयालखाना भरी
 बनै थोनोःसिद ग्रामर ब यानी ज़ फैसिकेर। कैदीराए यासांगलर ब
 पलाःसिकेर। 27 हाःत ज़ नो पाल्या सैसिद ग्राम भरी फैसिउ रँःद,
 “ओहो! कैदीर पुलुसूद याधोःव ची ओल्यो,” लिद ओखोर्च्यो हाइद
 ओल ज़ सैःसिउ ओपैजूयाव। 28 पावलए निताव रँःद बनै चोइस
 क्रिद, “थारे थारे, तासैःसिनी। गे प्राइँ आल ज़ गेलिजूया,” है ओदोक
 ते, 29 नो पाल्याए ओनैरालाई बत्ती रैव परींद, बनै भुम भुम गूद
 इयालखानाल धोःनाद पावल सोनो सिलासनी निखँत फुलुपुसिके।
 30 नोनिलाई ननी पलेद, “दे डाधर्मीनी, डा कै जैद बाँचिन्या
 ओताव?” है उनिदोक ते, 31 “प्रभु येसुलाई नयुँ सुहुपूद ओक्योत
 नख्यासिकिन नँ सोनो नझिमलावरास बाँचिद अजम्बरी जुनी दैन्या
 जेले,” है दाद, 32 नो पाल्यालाई उझिमलाव भरिरास परमेस्वरए
 ओपाँ यारासथैकिनी। 33 निताव आधा रील मनी नो पाल्याए पावल
 सोनो सिलासनिलाई निघाइर छेद निएक्यो। हो प्राइँना ज़ पाल्या
 उझिमलावरास रील सछैसिद, 34 पावल सोनो सिलासनिलाई
 उझिमक लाँद, ज़यावर जैद निएक्यो। उझिमलावरास परमेस्वरए
 ल्योदा यायुँ यासुहुबोए बनै रेकेर।

35नम छेलाला उसँक हाकिमराए, “पावल सोनो सिलासनिलाई
 निरासूके,” लिद सिपाईरालाई इयालखानादा है दानाव यारापरींकेर।
 36 है जैद पाल्याए नो था दैद पावललाई, “हाकिमराए जिनलाई
 ‘रासून्या’ लिद था परींद नैर। है जैद जिन आनी पुलुसूद चावस
 बाचिन्के,” है उनिदोक ते, 37 पावलए नो सिपाईरालाई, “गिन
 रोमी नागरिकनिलाई मनी नाःकाव जनताराए डाक अनाकल ज़
 गिनलाई प्रोद गिनन्याय माफालूद ज़ इयालखानाल झाःसिन्केर।
 अब कै जैद गिनलाई अलगजा पलेव यापैजूयाव? माता। पलेन्या
 ताकिन याज़ ओपलेःसिहुरक,” है ओरादोक ते, 38 नो सिपाईराए

हाकिमरालाई है यारादोनाकेर। नोराए नोनी रोमी नागरिकनी निल्यो लिन्या यामासैजूयाव। है जैद नो पाँ थैद, हाकिमर बनै छेद,*
 39 याज़ निल्योक बाद माफी निद लाँ:दा पले:द, “गेसहरलाई रासूद बाचिन्के,” है दाव ज़ यारानैकेर। 40 है जैद नोनी इयालखानानी पुलुसूद लिदियाए उझिमक बाद येसुए ओपाँत बाजूयावरास फरी तखेप दैसिद यारुँर सझें:द्याद बाकिनी।

17

पावल सोनो सिलासनी थेसलोनिकेदा निबाव

1 नकिन पावल सोनो सिलासनी अम्फिपोलिस सोनो अपोल्लोनिया सहरलाव घ्याँ बाद थेसलोनिके सहरल केसूकिनी। नल यहूदीराए धर्मसासूत्र झिम तोबो उलिजूयाव। 2 पावलए डादाकिनकाव ओदोजूयाव मिताव ज़ सोसाता पै नासिन्या छचाम नो याझिमल बाद धर्मसासूत्रलाव सर्सिउ पाँर पलासूद्याद, 3 “ख्रीस दुखर सहिद, सिद सैसिउ परिन्या ज़’ लिद भा:किन ज़ धर्मसासूत्रल सर्सिउ उलिजूयाव,” है दाद थरैद याएक्यो। फरी, “आव है डादाचिजूयाव येसु ज़ नो ख्रीस,” है मनी यादोक्यो। 4 नो पाँत रूवा रूवा यहूदीर यारुँ हुपूद पावल सोनो सिलासनिस खैकेर। परमेस्वरए ओमान नैजूयाव कुधु ग्रीकर सोनो सहरलाव यामिन थासो मेंमाराए ब यारुँ हुपूके। 5 छुत यहूदीर ते यामी तूद बजार जीलाव अइज़ दुलिरिजूयाव सँधुवारालाई दुपूद नो सहरल खैलानी बैला जैव यारापरींकेर। नोर पावल सोनो सिलासनी निलिजूयाव तोबो यासोनए उझिमक बाद नोनिलाई पले:व पैकेर। 6 खाली नोनिलाई मादैद झन यासोनलाई ख्वा ख्वा यारुँ हुबोरास क्यो:द अदालतदा सेले सेले लाँद, “नो सहर सहर दुलिद खैलानी बैला जैजूयावनी गे गेसहरल ब निहुवत, 7 यासोनए ओल्योक बासिउ निएक्यो दी। नोर माहाराजाकिन प्राई

* 16:38 16:38 रोमी नागरिकरालाई रोमी कानुननी न्याय यामादोवा पै सजा यान्या ओमाताजूयाव, इयालखानाल झा:न्या ब ओमाताजूयाव। है जैद नो हाकिमराए या यान्याय मनी ताए सै लिन्या ओछचास उलिजूयाव।

तँदा जैसिद नोराए याराजा येसु ज़ है लिज़्यार,” है लिद क्रिउ ज़ लिकेर। 8 नोराए यापाँ थैद सहरलाव मिँर सोनो याघेपपार बनै ज़ मचिकेर। 9 है जैद यासोन सोनो ओनैरालाई धरौतील यारारासुकेर।

पावल सोनो सिलासनी बेरियादा निबाव

10 नम ओइयाक नलाव दाज्यु भाइराए पावल सोनो सिलासनिलाई हतपूत ज़ बेरिया सहरदा यारापरीकेर। नल निकेसोत फरी ब यहूदीराए धर्मसासुत्र झिमक बाकिनी। 11 बेरियालाव यहूदीर ते थेसलोनिकेलाव मिँराकिन यातह ल्योर यालिज़्याव। नोराए पावल सोनो सिलासनी निपाँत बनै ज़ धिद थैद, ‘आवनी निपाँ साचो मालिज़्या’ लिद दिनकाव ज़ धर्मसासुत्रल याचिऊज़्याव। 12 है जैद नोर येसुए ओपाँत कुधुए यायुँ हुपुके। नोरास यामान ल्यो ग्रीक खेपा मेंमार ब सर्बा ज़ याल्यो।

13 खाली थेसलोनिकेलाव यहूदीराए, ‘पावलए बेरियाल मनी परमेस्वरए ओपाँ यासथैज़्याव दी’ लिन्या थैद, नदा मनी माहोल्यारालाई यारामचैनाकेर। 14 है जैद नलाव यायुँ हुबोराए पावललाई जोगोइन्याए जूनी समुन्द्र छचोक पै सारैनाकेर। सिलास ते तिमोथीस नल ज़ लिकिनी। 15 है जैद पावललाई सारैना बावराए एथेन्स सहरक पै लाँकेर। ननी ओल्द बाव यापैँज्याक पावलए नोराए कुइत सिलास सोनो तिमोथीनिलाई, ‘ओताकिन चाँदो ज़ हुचिन’ लिन्या था परींक्यो।

पावल एथेन्सल

16 पावलए एथेन्स सहरल सिलास सोनो तिमोथीनिलाई कींद उनिनैज़्याक नलाव कुधु अडग्यार रँद उयुँर माचाव दाद, 17 धर्मसासुत्र झिमल बाद नलाव यहूदीर सोनो परमेस्वरए ओमान नैज़्याव ग्रीकरास कुधु ज़ याखर्लेसिज़्याव। बजार जील आदा होदा लिज़्यावरास मनी दिनकाव ज़ ओपाँज्याव। 18 तछा इपिक्युरी सोनो स्तोइकी यादोज़्याव धर्म मानिज़्यावर हुद

ओपाँ थैद खर्लेसिनाकेर। पावलए येसुए ओपाँ सथैद, 'सिउनी सैसिके' है लिन्या पाँर ओरासथैवए नोर रूवा रूवाराए, "काता ओपाँजूयाव, निताव त्यात्यानी तितिव?" है यालिजूयाव। रूवाराए फरी, "काताडाव देवताराए यापाँ ओपाँजूयाव ताक्या?" है ब यालिजूयाव। 19 छीनी नोराए अरियोपागस कचरीक लाँद, "नो सा:रो पाँए ओअर्थ खास काता उलिजूयाव? गेलाई है दासिके। 20 गे अनवार्यासो ज़ गेथैजूया। ओअर्थ पलासुद्याद फरी ब तखेप थैव गेदैक," है दोकेर। 21 नो एथेन्सलाव मिँर सोनो यासहरल छुतनी हुद लिजूयावराए पाला जम्मा सा:रो पाँर थैन्यात वाज़ लहर यादोज़याव।

22 है जैद अरियोपागस कचरीक पावल प्राइँए याड़ाक च्याँ:सिद, "अ एथेन्सलाव मिँर, जे धर्म खिमन्यार जेलिजूयाव ओल्यो डामीए ज़ रँ:द डानैचिए। 23 जेसहरलाव पुजा दान्या पोर आदा होदा डालिक तोबो थानत, 'सुए ज़ यामासरेस्ताव ईस्वर' सर्सिउ उलिजूयाव डारँ:के। डा है डादाचिजूयाव परमेस्वर नो मासरेसूद जेमानिजूयाव ईस्वर ज़। 24 प्राइँ जैजूयाव परमेस्वर नाम नमलावराए गेडैताव ओतावए कुइए जैसिउ मन्दिरल मालिधुइ। 25 होलाई मिँए ल्योनी काता ज़ खाँचो ब माले। इन गेलाई चाहिजूयाव भरी होए ओल्योनी ज़ हुजूया। आव गेजिउ ब होए ओल्योनी ज़, गेस० ब ओल झा:द ओयासिउ ज़। 26 तोबो मिँए ओक्याँनी ज़ आव मानुवाताव प्राइँ जातलाव मिँरालाई याजैक्यो। नोरालाई सु सु लिन्या यापो, सु सु याबेला ब ओल ज़ थरैद याएक्यो। 27 है जैद 'डालाई छाम छाम जैद तादी ब कसा खिमूद मादैनार' है लिद ओल ज़ इताव जैक्यो। हैदी ब परमेस्वर गेकिन तादाड माले। 28 गे होए उकुइत ज़ ताद ओलनी ज़ गेबाँचिजूया,

ओलनी ज़ गेलिज़्या। जेसकाव सैन्याराए मनी, 'गे ओल ओज़ार ज़ गेलिज़्या,' है लिद लेर।

29 "है जैद गे परमेस्वरए ओज़ार गेताकिन, कै जैद ओल ते सीं लुँ ओताज़्याव? सुन चाँदीए जैसिउ अडग्या ते अइज़ मिँए युँ स्यानी जैसिउ ची। 30 ड़ादाकिन परमेस्वरलाई मासरेस्दकाव अनाकलाव गेदोव भरी ते आथ पाला पै गेचार ताके। आकिनी ते परमेस्वरए प्राइँनिकाव मिँरालाई 'निताव माचाहिउ येन भरी रास्द डाल्योदा हुचिके,' है दासिज़्याव। 31 मानुवाताव मिँराए न्याय फाल्न्या ब 'आव छचाम ज़ तारिज़्या' लिद थरैद नैव। सतस न्याय फाल्न्या मिँ ब 'आव ज़' लिद प्राइँए याड़ाक सिउनी सोचोइद थरैद याएक्यो," है यादोक्यो। 32 'सिउनी ओसोचोइव' है ओरादोव याथैक रूवा रूवार सास्केर। रूवाराए फरी, "छीनी ब तछा नपाँ थैव गेदैक," है दोकेर।

33 है जैद पावल ननी पुलुस्द ओबाक, 34 रूवा रूवार ओल्योदा जैसिद ओपाँत यायुँ हुपूके। नोरानी अरियोपागस कचरीलाव तोबो दियनुसियस ओल्यो, तोबो दामारिस यादोज़्याव मेंमा ब ओल्यो। नोनिस छुतर ब याल्यो।

18

पावल ओनैँरास कोरिन्थल याबाव

1 नकिन पावल एथेन्स सहरलाई रास्द कोरिन्थ सहरदा बाके। 2 होड बाद तोबो पोन्तस खन्दल जर्मिउ अकिलास यादोज़्याव यहूदीस दैसिकिनी। ओज़्याए उमिन प्रिसूकिला। महाराजा क्लौदियसए यहूदी भरिरालाई रोम सहरनी ओरापलेवए नोनी ज्या-री भर ज़ इतालिया देसनी कोरिन्थल हुद निलिज़्याव। 3 नोनी नियेन ब पावलए ओयेन स्यासो पाल जैन्या ओतावए, पावल नोनिस लिद यायेन ब सिप ज़ दोकेर। 4 साताकाव तखेप नासिन्या छचाम धर्मसास्त्र झिमल बाद यहूदीर सोनो ग्रीकरास खर्लेसिद सभैःन्या

ओपैँज्याव।

5 छींनी सिलास सोनो तिमोथीनी पावलए ल्योक माकेदोनिया खन्दनी निहुवत पावलए ओध्यावना परमेस्वरए ओपाँ सथैन्या वाज्ज जैद, यहूदीरालाई 'येसु ज्ञ पापनी रासज्याव ख्रीस' लिद साची ओराएज्याव। 6 नोर पावलए ओपाँर माभैःद ओपाँलाई थल्द बीज्यात जैव यापैवए पावलए ओक्वाताव गालो धुइरोर याडाक थरैद्याद, "जेपाप भरी जे जेडैत ज्ञ ओताक। जे नो पाँ जेमाभैःव प्राइँना फुर्सुल डाताके। अबकिन डा छुत जातलावरालाई ची डारासथैनारिज्या," है दाद, 7 ननी पुलुसुद धर्मसासुत्र झिम लापकाव तीतस युस्तसए उझिमक बाके। नो मिँ ब परमेस्वरए ओमान नैज्याव ज्ञ ओल्यो। 8 धर्मसासुत्र झिमलावराए याघेप्पा ब तोबो क्रिसुपसए उझिमलाव भरिरास परमेस्वरए ओपाँत यायुँ हुपुके। कोरिन्थलाव छुत छुतराए मनी परमेस्वरए ओपाँ थैद, यायुँ हुपुद रील सछैँसिकेर।

9 तछा रील पावलए दर्सनल प्रभु ओपाँज्याव रँःक्यो। प्रभुए, "पावल, नँ माछेःद ज्ञ आव सहरल डापाँ सथैव ज्ञ घरानैयो, चिम दान्या माःक। 10 डा नँस ज्ञ डालिज्या। सुए ज्ञ नँलाई कैज्ञ जैन्या मालेर। आव सहरल डामीर कुधु ज्ञ तान्या लेर," है दोक्यो। 11 है जैद पावल नो सहरल अथार मैना लिद परमेस्वरए ओपाँ पलासुद ओराएज्याव।

12 अखैया खन्दल गलियोन हाकिम उलिज्याव बेलाक, यहूदीर पावलकिन तँदा जैसिद पावललाई क्योःद अदालतदा लाँद, 13 "आव मिँए परमेस्वरए ओसेवा तँदा बङ्गैद मोसाए ओकानुनकिन छुत येम यापैज्याव," है लिकेर। 14 पावलए जवाप याव ओपैँज्याक ज्ञ गलियोनए ओल ज्ञ, "अ यहूदीर, आव मिँए मादान्या येनर ओदोव ताकिन डा जेपाँ सहिद डयाचिखेहो। 15 खाली जे जेधर्म रोक मेक ताद, काता काताराए यामिनर ओतोसिक जे ते जम्मा इसिउ

वाज़ जेपैज़्या। डा निताव पाँ कै जैद थैन्या? जे ज़ सैच्यो,” है दाद, 16 अदालतनी यापलेक्यो। 17 हाःत ज़ इन नोराए धर्मसास्त्र झिमलाव याघेप्पा सोस्थेनेसलाई क्योःद अदालत डाक ज़ प्रोकेर। खाली गलियोनए घाइ ज़ मारादोक्यो।

परमेस्वरए ओपाँ एफिससल सुरू ओताव

18 पावल कारिनथ सहरल सर्बा ज़ लिद यार्युँ हुबोराए ल्योनी बिदा निद, ‘सिरिया खन्ददा ओल्द बान्या’ लिद री जहाजल पसिके। ओलस अकिलास सोनो प्रिस्किलानिलाई ब निलाँक्यो। नोकिन डादा कोरिनथ लापकाव किंक्रिया सहरल किर्या झाःद ओचेम ब एन्क्यो। 19 नकिन री जहाजल एफिसस सहर पै बाद अकिलास सोनो प्रिस्किलानिलाई नल ज़ निख्यानैक्यो। ओल ते जाँवा पै वाज़ लिद धर्मसास्त्र झिमल बाद यहूदीरास खर्लेसिकेर। 20 नकिन नोराए, “गेस ज़ जाँवा पै ल्यो ताके,” है यादोक ते, पावलए माभैःद, 21 “परमेस्वरए उयुँ ओताकिन फरी डाहुया ज़,” है दाद री जहाजल पसिद एफिससनी बाके।

22 सिरिया खन्दलाव कैसरियाल केस्द जहाजतिन झरिद यरूसलेम पै बाद नलाव मन्दलीस दैसिद एन्तिओखियादा बाके। 23 नल जाँवा लिद गलातिया सोनो फ्रिगिया खन्द जीलाव पो पोक लिज्याव येसुए ओपाँत बाज़्याव भरिरास दैसिद परमेस्वरए ओपाँत यार्युँ सझैःद याएक्यो।

अपोल्लोस एफिससल ओबाव

24 अलेक्जेन्द्रिया सहरलाव तोबो अपोल्लोस यादोज्याव यहूदी एफिससल केसूहेके। नो मिँए ओपाँ बनै डमो, धर्मसास्त्रलाव पाँ ब बनै ओसैज्याव। 25 प्रभुए ओपाँ ब सर्बा ज़ सिऊसिद बनै जाँगरस येसुए ओपाँर सथैद चावस ज़ पलास्द ओराएज्याव। खाली यूहननाए ओरासछैज्याव वाज़ ओसैज्याव। 26 नोए धर्मसास्त्र

झिमल बनै घ्योःव युँस परमेस्वरए ओपाँ ओरासथैज्याव। अकिलास सोनो प्रिस्किलानी नोए ओपाँ थैद नोलाई निझिमदा लाँद येसुए उजूनी ओमासैज्याव पाँ भरी पलासुदिकिनी।

27नकिन अपोल्लोस अखैयादा बान्या युँ दोक्यो। है जैद नलाव यायुँ हुबोराए उयूर सझेंःद्याद, ‘आव मिँलाई चावस नैच्यो’ लिद होडाव यायुँ हुबोरालाई तोबो चिथी परींद याराएकेर। अपोल्लोस होड केसुद परमेस्वरए उयुँ ओगराँवनी यायुँ हुबोरालाई कुधु ज़ यासघैक्यो। 28 प्राइँए याड़ाक यहूदीराए यापाँ पलतैद्याद, ‘येसु ज़ परमेस्वरए खतैद उपरींव खीस’ लिद धर्मसासुत्रनी थरैद याएक्यो।

19

पावल एफिससल ओल्द उहुव

1अपोल्लोस कोरिन्थल उलिज्याक पावल रूनिकाव घ्याँ हुद एफिसस सहरल केसुहुके। नल ख्वा ख्वा येसुए ओपाँत बाज्यावरास दैसिद, 2 “जे येसुए ओपाँत जेहुव बेलाक छैव पुरूस दैद जेमानै?” है ओरादोक ते, नोराए, “छैव पुरूसए उमिन आःपै गेमाथैताए,” है दोकेर। 3 नकिन पावलए, “हिताव ताकिन ते, जे काताए ओपाँनी जेसछैसिउ की?” है ओरादोक ते, “गे ते यूहन्नाए ओपाँनी गेसछैसिउ ची,” है दोकेर। 4 है जैद पावलए याबिरैव भरी चावस पलासुद्याद, “रील सछैज्याव यूहन्नाए मिँरालाई यादोव पापनी यायुँ फकैद्याद ओलकिन छीनी हुज्याव येसुए ल्योदा यायुँ सुहुपुद्यान्याए जूनी ओरासछैज्याव ची,” है ओरादोक ते, 5 नोराए निताव पाँ थैद प्रभु येसुए उमिननी ज़ सछैसिकेर। 6 नकिन पावलए याक्याँत उकुइ नैद ओरायो प्राइँना छैव पुरूस याक्याँत हुद नोर छुत छुत खामनी ब पाँकेर, छैव पुरूसनी अचम्बलाव पाँर ब पाँकेर। 7 नोर बाह्व जनाव यालयो।

8नकिन सोमैना पै पावलए धर्मसासुत्र झिमल परमेस्वरए ओराज्यालाव पाँर सथैद नोरास खर्लेसिद नोरालाई सभैःन्यात बनै

ज़ धामा दोक्यो। ⁹ हितावत मनी ख्वा ख्वाराए परमेस्वरए ल्योदा यायुं जात ज़ माफकैद, झन ज़ एकोहोर्यासो जैसिद माहोल्याराए याड़ाक येसुए ओपाँ बलेव पैकेर। है जैद पावल येसुए ओपाँत हुव भरिरास ननी भाःसिद हाःकिन तुराननस इस्कुलल यादुप्सिज्याव। ¹⁰ नेरिम भरी नल दुप्सिद एसिया खन्द भरिल लिज्याव यहूदीर सोनो छुत जातलाव मिंराए परमेस्वरए ओपाँ थैन्या मौका दैकेर।

मन्तर तन्तरलाव यापोस्तोकोर याराख्याव

¹¹परमेस्वरए पावलए ओक्याँनी अचम्बलाव ओयेनर सतैद ओराएज्याव। ¹² क्वार रैद पावललाई छापो परींद याजोरो हुवर लाँद याराएक, नो याजोरो हुवर यागराँज्याव, माचाव पुरूसर ब पुलुसद याबाज्याव।

¹³यहूदीराए याखाल मनी माचाव पुरूसर पलेन्यार यालिज्याव। नोराए माचाव पुरूसरालाई प्रभु येसुए उमिननी पलेन्या धामा दाद, “गे है गेदाचिज्या, पावलए ओरासथैज्याव येसुए उमिननी जे पुलुसद बाचिके,” है यारादोज्याव। ¹⁴ तोबो स्केवास यादोज्याव यहूदी मुख्या पुजारीए सात भाइ ओज़ाराए मनी निताव येन यादोज्याक, ¹⁵ नो माचाव पुरूसए, “येसुलाई डासरेसज्या, पावललाई मनी डासरेसज्या, जेलाई ते डामासरेसचिए,” है दाद, ¹⁶ नो माचाव पुरूसए क्योःद ओनैज्याव मिँए नोरालाई खपद हारैद, नोर नो झिमनी नाडग्या पात्या, झीघर्यामनी मघर्यामोर ताद पुलुसद धोःकेर। ¹⁷ एफिससल लिज्याव भरिराए, यहूदीर सोनो छुत जातलावर, आव पाँर थैद बनै ज़ छेःकेर। है जैद प्रभु येसुए उमिन बनै घ्योःद ओमान ब रहिके।

¹⁸प्रभु येसुए ओपाँत हुवर मनी कुधुए डादाकिनकाव माचाव यायेनर प्राईए याड़ाक मामोद ज़ यापाँज्याव। ¹⁹ डादाकिन मन्तर तन्तर दाज्यावराए ते यापोस्तोकोर रैद दुपद प्राईए याड़ाक ज़ यारामुकेर। नो यारामुव पोस्तोकोराए याएः याजाँचिक चाँदीए सिक्का पचास

हजारा ओल्हो। ²⁰ है जैद परमेस्वरए ओपाँ प्राइँनी प्राइँनी ज़ घ्योःद आदा होदा बनै ज़ उफीजिज़्याव।

²¹ आव भरी ओतावत पावलए उयुँल, माकेदोनिया सोनो अखैयालाव घ्याँ बाद फरी यरूसलेमदा बान्या थरैक्यो। 'हुकिन छींनी रोम सहरदा मनी बाव ताके' है उलिज़्याव। ²² है जैद ओसेवा दाज़्यावनी, तिमोथी सोनो इरास्तसनिलाई, ओलकिन डादा ज़ माकेदोनियादा निपरीक्यो। ओल ते जाँवा पै एसिया खन्दल ज़ लिके।

पावलए ओपाँत एफिससल यामचिउ

²³ हाः बेलाक एफिसस सहरल येसुए ओपाँत छचाल्दिउ खैलानी बैला माताके। ²⁴ तोबो देमेत्रियस यादोज़्याव सोनारए, आर्तेमिस देबीए जिम्ज़ा जिम्ज़ा चाँदीए अडग्यार जैद सहरलाव तुपुन्यारालाई कुधु फाइदा जैद ओराएज़्याव। ²⁵ तछा नोरालाई सोनो छुत नो मिताव येन दाज़्यावरालाई दुपुद, "अ डादाज्यु भाइर, जे ज़ जेसैज़्या, आव गेयेननी ज़ चाव कमाइ ताज़्या। ²⁶ नो पावलए झन आव गेसहरल सोनो एसिया भरिल, 'कुइए जैसिउ अडग्यार काता देवतार ब माःक' है दाद कुधु मिँरालाई तँदा ज़ याजैक्यो। ²⁷ है जैद नोए ओपाँए ज़ आव गेयेन वाज़ माःक, झन आर्तेमिस गेदेवत्यानीए ओमन्दिर ब कान्ल ज़ गनिसिन्या माले। हिताव ओताकिन ते एसिया भरिल सोनो मानुवाताव मिँराए गेमानिज़्याव देवत्यानीए ओज़गै मगै ब मान्या ओछ्यास लिज़्या," है ओरादोक ते, ²⁸ प्राइँ ज़ यारिस बनै चोद, "एफिससल लिज़्याव आर्तेमिस देवत्यानी जय जय," है लिद बनै किकेर। ²⁹ नो पाँत सहरलाव मिँर कुधु ज़ मचिद माकेदोनियानी हुव पावलए ओनैनी गायस सोनो अरिस्ताख्सनिलाई क्योःद राम दान्या पोल सेले सेले यारालाँकेर। ³⁰ पावलए नो पाँ थैद ओनैनी निज़ूनी राम दान्या पोदा बाव ओपैज़्याव, नलाव यायुँ हुबोराए भैःद माएकेर। ³¹ एसिया खन्दलाव

सरकारए ओयेन दाजूयाव ख्वा ख्वा ओनैराए मनी, “राम दान्या पोदा ताबानी,” लिद ओल्योदा था परींकेर।

³²नल बावर ख्वाराए ‘आव ज़’, ख्वाराए ‘हो ज़’ लिद बनै याक्रिक सुए ज़ काता ज़ माथरैधुकेर। खाली कुधु मिंराए ‘काराव यादुप्सिउ’ लिन्या ब यामासैंज्याव। ³³ छींनी नलाव यहूदीराए तोबो अलेक्जेन्डरलाई जवाप याव परींकेर। है जैद नोए, ‘आदा थैचिके’ लिद उकुइए सान दाद याएक्यो। ³⁴ खाली नोराए ‘यहूदी ज़ ओल्यो’ लिन्या सरेसूद प्राइँए यार्गा तोबो जैद, “एफिससल लिज्याव आर्तेमिस देवत्यानी जय जय,” है लिद नेघन्ता भरी क्किउका क्किउ ज़ लिकेर।

³⁵बल्ल बल्लड नो सहरलाव प्रधानए नोरालाई चाप चुप जैद, “अ एफिससलाव मिंर, आदा थैचिके। नो नमतिन तेव माहान देवत्यानी आर्तेमिस सोनो होए ओमन्दिर आव गेसहरल गेमीं ज़ लिज्या लिन्या प्राइँए ज़ सैंज्यार सानी। ³⁶ ‘माःक’ लिन्या सु ज़ मालेर। जे काराव जेमचिज्याव? चिम दोचिके, मुखलाव येन तादोच्यो। ³⁷ आव सेल्द जेरारैव मिंनी ते गेमन्दिरनी काता ब माहाइनी, गेदेवताए उमिन ब बलेद मायासिर। ³⁸ है जैद देमेत्रियस सोनो ओलसकाव ओनैराए यामुद्दा कातार उलिकिन अदालतल बाद उजुर ओदोरक। ³⁹ छुत यापाँ उलिकिन जनताराए कचरी मनी लिज्या सानी। ⁴⁰ खाली अनाकलाव आछिमकाव जेदोज्याव मिताव ते दान्या माःक, सानी रोमी सरकारए गेलाई गेगलती थरैद्यान्या ओछ्यास लिज्या। मचिन्या निउँ काता ज़ ओमाल्योए गे काता जवाप यान्या?” ⁴¹ है दाद प्राइँलाई भाःसिउ यापरींक्यो।

20

पावल माकेदोनिया सोनो ग्रीसदा ओबाव

1राउँनी इयाउँ ओखेमोत पावलए नलाव यायुँ हुबोरालाई दुपूद परमेस्वरए ओपाँनी यायुँ सज्ञैःद्याद, बिदा निद माकेदोनिया खन्ददा

बाके। 2 नदाडाव यायुं हुबोरालाई मनी परमेस्वरए ओपाँर सथैद यायुं सझें:द याएक्यो। नकिन ग्रीस देसदा बाद, 3 नल सोमैना पै लिके। ननी री जहाजनी सिरिया खन्ददा बाव ओपैँज्याक, 'यहूदीराए पावललाई सै:व पैँज्यार दी' लिन्या थैद नो येमनी माबाद फरी माकेदोनियालाव घ्याँ बान्या थरैक्यो। 4 ओलस छुत मिँर मनी बाकेर। नोराए यामिनर आवर ज़ – बेरिया सहरलाव पुरसए ओज़ा सोपात्रोस, थेसलोनिके सहरलाव अरिस्ताख्स सोनो सिकन्दसनी, दर्बी सहरलाव गायस, तिमोथी, सोनो एसिया खन्दलाव तुखिकस सोनो त्रोफिमसर ज़। 5 नोर गेकिन डादा बाद त्रोआस सहरल याकींसिज्याव। 6 माँदा भरेस ज़यान्या पर्ब ओमाखेमा पै फिलिप्पी सहरल गेलिके। पर्ब ओखेमोत री जहाजल पसिद पाँच दिनत त्रोआसल केसूद डादा बावरास दैसिद, नल सात दिन गेलिके।

पावल त्रोआसलाव यायुं हुबोरास यादुप्सिउ

7 सातालाव उसंकताव छचाम रिमक त्रोआसलाव यायुं हुबोरास दुप्सिद प्रभु-भोज गेमानिज्याव। पावल हो परा:ती बाव ओपैँज्यावए आधा री पै परमेस्वरए ओपाँ ओसथैसिज्याव। 8 नो दुप्सिद गेलिज्याव ओतर्ताव तालल कुधु बत्तीर तै:सिउ यालिज्याव। 9 इयालत तोबो धापाजाकाव युतिकस यादोज्याव चुसिद उउङ्गिज्याव। पावलए ओपाँ बनै ओख्यो:वए नो छोर्या घेप्पा डलत बाद सोताल्यातिन तेके। नोलाई याचानाक सिउ दैकेर। 10 पावल रूतिन झरिद नो छोर्यालाई लापूद प्राइँलाई, "जेयुं होलाँ जैचिके, उसं लिज्या," है दाद, 11 फरी रोत बाद येसुए उमिनताव भरेस के:द भा:द्याद, नम उसँवा पै परमेस्वरए ओपाँर सथैद ननी पुलुसूद बाके। 12 नो छोर्या मासिद ओबाँचिउए प्राइँए यायुं बनै होलाँ ताद झिमक लाँकेर।

त्रोआसकिन मिलेतस पै

13 पावल त्रोआसकिन अस्सोस सहरक पै उखँनी ज़ बान्या

थरैद गेलाई री जहाजल बाव परीसिक्यो। ओल अस्सोसकिन वाज़ री जहाजल पसिन्या युँ ओदोवए, 14 नल ओल गेस दैसिद हाःकिन री जहाजल गेस ज़ बाके। मितिलेने सहरल गेकेसोत, 15 हो पराःती खियस तापुए ओसोराक गेबाके। हुकिन सामोस तापुल बाद, हुकिनकाव हो पराःती मिलेतस सहरल गेकेस्के। 16 पावलए, 'एसिया खन्दल गेबाकिन यरूसलेमलाव पेन्तिकोस पर्वदा गेमातापनाधुया' लिद बनै घल्सिद एफिसस सहरदा माबान्या जैक्यो। 17 बुरू एफिससलाव मन्दलीलाव सेररालाई मिलेतसनी थार परींद ओल्योदा ज़ याथाक्यो।

पावलए एफिससनी ओराथाव सेररास यादैसिउ

18 एफिससलाव मन्दलीलाव सेरर पावलए ओल्योक याकेसहुवत पावलए, "डा एसियाल डाकेसहुव छचामकिन डादोव भरी जे ज़ जेसैज़्या। डा जेस लिद, 19 यहूदीराए ल्योनी कुधु दुखर डादैज़्यावत ब, जेजूनी डा सज़िमसिद परमेस्वरए ओसेवा दाद डापिलर ब डारास्के। 20 जेलाई ओचाहित ल्यो पाँर सथैन्या माअनकनिद ज़ जेदुपसिज़्याव पो पोक, जेज़िमक जेज़िमक ब डएसथैचिके। 21 जेदेसलाव यहूदीर सोनो छुत जातलाव मिरालाई, 'जेपापलाई रासद, परमेस्वरए ल्योदा सखैसिद, गेप्रभु येसु ख्रीसए ओपाँत जेयुँ सुहुपचिके,' लिद प्राइँलाई ज़ डारासथैके।

22 "अब ते छैँव पुरूसए है ओदाँव भैःद यरूसलेमदा डाबाज़्या। होड केसूद 'अइ डातारिज़्या' लिन्या ते डामासैए। 23 खाली जो सहरल डाबादी ब छैँव पुरूसए, 'नजुँ आव ज़ — दुखर दैन्या सोनो ज़्यालखानाल लिन्या' लिद है दाँज्याव। 24 हैदी ब डाजिउए मया माले, खाली डायेन भरी सुदुमद, प्रभु येसुए डालाई ओयाँव येनलाई सयोःन्यात वाज़ डायुँ थू ताज़्या। नो ओयाँव डायेन ते, 'परमेस्वर गेल्योदा उयुँ ओगराँव' है लिन्या चाव था सथैन्या ज़।

25 "अबकिन ते जे परमेस्वरए ओराज्यालाव पाँ जेल्योडाव

डासथैचिउ मिंराए फरी डाडा: रँ:व दैन्या जेमाले लिन्या डासैज्या।
 26 है जैद जे आछिम आव सैचिके — जे सुवाराए तछा परमेस्वरए
 ओसजा जेदैकिन, नो डा डागल्ती तान्या माले। 27 परमेस्वरए
 ओगोईं भरी ओपोःस ज़ जेल्योड सथैद डासयोःके।

28“है जैद जे परमेस्वरए ओबगाललाव यालोम्बार, छैव पुरूसए
 ओखतैचिउर, जेक्याँलाई जोगोइद ख्रीसए उझीए ओरालँ:व
 परमेस्वरए ओमनदलीलाई पाथस याराछोच्यो। 29 डा डाबाव
 छीनी जेबगालल छे छे डम्सिउ पर स्यासोर पसिद रन्दनी बन्द
 जैन्या लेर। 30 जेखालाव मिंराए मनी र्खा र्खार तँदा जैसिद
 परमेस्वरए ओपाँताव मिंरालाई याल्योदा जैन्याए जूनी धुत पाँर
 ब पैन्या लेर। 31 है जैद जे सैसिद लिच्यो। डा जेल्योडाव सोरिम
 भरी लाकनी रील परमेस्वरए ओपाँर तोबो तोबोनी पैद डाप्रिलर
 डारासो ब तामेःच्यो।

32“अब ते डा जेलाई परमेस्वरए ओपासल डाझाःचिज्या। गरॉव
 ओपाँ ब जेस ज़ लिज्या। नो पाँए जेलाई थोरिउ जैद, परमेस्वरए
 उमिनत लिज्यावरास जेलाई मनी परमेस्वरनिकाव जुँ दैन्या
 जैचिरिज्याव। 33 डा जेस डालिज्याक सुए जेल्योनी ब पैसार
 क्वाराए लोभ डामादोए। 34 जे ज़ जेसैज्या, डा सोनो डानैरालाई
 ओचाहिज्याव भरी आव डाकुइए ज़ येन दाद गेडासिके। 35 है
 जैद प्राइँनी ज़ जेल्योड मनी डासतैके — गेकुइए येन बनै दाद
 माधुन्यारालाई मनी सथैव ताके। आवए जूनी गेप्रभु येसुए ओपाँ
 ब तामेःच्यो — ‘छुतए ल्योनी दैन्या देखा, छुतलाई यान्या पाथ
 लिज्या।’”

36पावल आव भरी पाँद उघूँदानी तिकिसिद नो भरिरास प्राइँए
 पोखारिकेर। 37 हाःत ज़ यारुँ माचाव दाद पावललाई लापूद, माइँ
 दाद प्राइँ ज़ घर्केर। 38 ‘जे डाडा: फरी रँ:व दैन्या जेमाले’ है ओल्योए,

होए ज़ प्राइँरानी यायुँ माचाव जैद ओरायो। हाःत ज़ पावललाई री जहाजक पै सारैनाकेर।

21

पावल यरूसलेमदा ओबाव

1गे नोरास भाःसिद पावलस री जहाजल पसिद एकसब्द्या कोस तापुदा गेबाके। हो पराःती रोदस तापुल गेबाके। नकिन पतारा सहरल केसूद, 2 फोनिके खन्ददा बान्या री जहाजलाई दैद होल ज़ गेबाके। 3 साइप्रस तापु रैःन्याक केसूद, तापुकिन दखिनलाव घ्याँ बाद सिरिया खन्द पै सिधा गेबाके। नो जहाजलाव मालसामान हाइन्याए जूँनी तुरोस सहरल ज़ गेथकनिके। 4 नलाव यायुँ हुबोरास दैसिनाद नोरास सात दिन गेलिके। नाः भरिल नोराए परमेस्वरए उपुरूसनी पावललाई, “यरूसलेमदा बान्या माःक,” है दाव ज़ यानैजूयाव। 5 है यादोजूयावत ब जहाज बान्या बेला ओतावत गे ननी पुलुसूद फरी गेबाके। नोर खेपा मेंमार याज़ारास ज़ गेलाई सहरनी जहाजक पै सारैसिहुकेर। समुन्द्र छचोक गेधूँदानी तिकिसिद पोखारिद, 6 प्राइँलाई जेरो दाद जहाजल गेपसिके। नोर ओलूद याज़िमदा बाकेर।

7 है जैद तुरोसनी तोलेमाइस सहरल बाद नलाव यायुँ हुबोरास दैसिद, तरी नोरास गेलिके। 8 नकिन हो पराःती फरी जहाजल बाद कैसरिया सहरल केसूद जहाजतिन हाइसिद नो सात जनारासकाव परमेस्वरए ओपाँ सथैजूयाव फिलिपए उज़िमक बाद नोस ज़ गेलिके। 9 नोए ओज़ार चार जना रे मादोताव मेंमार यालिजूयाव। नोर प्राइँ परमेस्वरए उपुरूसनी पाँजूयावर यालिजूयाव।

10 फिलिपस गेल्यो सोंला चार दिन गेतावत तोबो अगाबस यादोजूयाव अगमबक्ता यहूदिया खन्दनी गेस दैसिहुद, 11 पावलए ओवाँःफो बैद ओल ज़ उखँ उकुइर किद, “छैँव पुरूसए है लिजूया, ‘यरूसलेमलाव यहूदीराए आव वाँःफोए ओर्गेलाई अइ जैद किद,

छुत जातलावरालाई सूपिरिज्यार,' " है लिके।

12 नोए ओपाँ थैद, पावललाई, "यरूसलेमदा ताबानी," है लिद गे सोनो नलाव यायुँ हुबोराए है दाव ज़ गेनैके। 13 खाली पावलए झन, "जे काता जेजैसिज्याव इताव, घर्द्याद नदा बान्या डायुँ के:द जेयाँज्याव? डा किसिन्या वाज़ मा:क, यरूसलेमल बाद प्रभु येसुए उमिनत सिन्या ब तयार ज़ डालिज्या," है दासिक्यो। 14 है जैद गे कै जैद ब गेमासभै:धुवए, 'परमेस्वरए उयुँ ज़ ओताक' लिद चिम गेदोके।

15 हुकिन ते गे भरी झा:सिद यरूसलेमदा बान्या गेथूसिके। 16 कैसरियालाव यायुँ हुबोर मनी तोबो नेब्लो गेस ज़ बाद यरूसलेमदा मनासोनए उझिमक पै लाँसिकेर। नो मिँ साइप्रसनी हुव, झादाकिन येसुए ओपाँत हुव मिँ ज़ ओल्यो। है जैद नोए ओल्योक गेबासिके।

पावल याकूबस ओदैसिउ

17 यरूसलेमलाव यायुँ हुबोराए गेलाई रँ:द खुसी ताद चावस ज़ सुम्सिकेर। 18 हो परा:ती गे पावलस याकूबए ल्योदा गेदैसिनाके। मन्दलीलाव सेरर मनी याकूबए ल्योक दुप्सिद यालिज्याव। 19 पावलए नोरालाई जेरो दाद, परमेस्वरए ओय्रेननी ज़ छुत जातलाव मिँरालाई याक्याँताव ओदोव भरी तोबो तोबोनी है दाद यासथैक्यो। 20 नो पाँ थैद नोर परमेस्वरए ल्योदा बनै खुसी ताद धन्याबाद चरै:केर। नकिन पावललाई, "भाइ, यहूदी जातलाव मिँराए मनी हजारका हजारए ज़ येसुए ओपाँत यायुँ हुपके। खाली नोराए मोसाए ओकानुन ब बनै सघ्यो:ज्यार। 21 नँ नजुँनी ब थैद नैर। रूवा रूवाराए नँलाई, 'पावलए मोसाए ओपाँकिन तँदा जैसिद छुत देसल लिज्याव यहूदीरालाई याचलन भरी रासो परींद याज़ारालाई मनी 'क्याल्न्या सरैस जेमाराजैदी ब ताए' है यादोज्याव दी,' है दीज्यार। 22 गे कै लिन्या ओताव? अब ते 'हुके दी' लिन्या ब

थैन्या लेर। ²³ है जैद अइ जैव ताके — गेसकाव चार जना मिँराए मोसाए ओकानुन मितावनी किर्या झाःद नैर। ²⁴ पुजारीराए ल्योक चोखोइसिद याचेम एन्न्या वाज्ज बाँखी लिज्या। है जैद नँ नोरास बाद यास ज्ञ चोखोइसिद नलाव खर्च भरी नँ ज्ञ फोव ताके। हो ताकिन नो याथैव पाँ भरी 'माथोरिउ ची ओल्यो' है लिन्या लेर। 'मोसाए ओकानुन ब ओदोज्याव ओल्यो' लिन्या ब सैन्या लेर। ²⁵ खाली छुत जातलाव यार्युँ हुबोराए दान्या येन ते आव ज्ञ थरैद सर्द गेनै — अडग्यालाई चरैःसिउ ज्यावर माज्यान्या, झी माज्यान्या, ओधेँ फर्लेद सैःसिउ स्याकरी माकैन्या, पातर्या पातर्नी ब माजैसिन्या," है दोकेर।

²⁶ है जैद हो पराःती पावलए नो चार जना मिँरालाई ध्यान झिमक लाँद नोरास चोखोइसिद, 'सात दिनत किर्या खेम्द मार ब चरैःन्या गेले' लिद भकल दोकेर।

पावललाई याक्योःव

²⁷ नो सात दिन ओयोनावत एसिया खन्दनी हुव यहूदीराए पावललाई ध्यान झिमल रँःद नकाव मिँरालाई मचैद, पावललाई क्योःद, ²⁸ "अ इस्राएली गेदाज्यु भाइर, चाँदो हुचिके। आकाव मिँए संसार भरी दुलिद गेजातलाई सज्जिम्द, मोसाए ओकानुनलाव पाँलाई ख्याद, ध्यान झिमए उमिन ब बलेःद्यासिज्याव। झन ग्रीक मिँरालाई ध्यान झिमल रैद चोखो गेपो ब छुद्यासिक्यो," है दाद यारामचैकेर। ²⁹ नोर डादा सहरल त्रोफिमस यादोज्याव एफिससलाव मिँलाई पावलस यारँःवए, 'ध्यान झिमल मनी रैद नैज्याखेहो' लिन्या यासम्जिज्याव।

³⁰ है जैद सहरलाव मिँर बनै ज्ञ मचिद प्राइँनी ज्ञ धोःहुद, पावललाई क्योःद, ध्यान झिमनी सेल्द, यामर गल्केर। ³¹ नोलाई सैःव यापैज्याक ज्ञ नकाव रोमी सेनापतीए 'यरूसलेम भरी बनै

खैलानी बैला ताके दी' लिन्या थैद, ³² हतपूत ज़ सिपाईर सोनो कपूतानरालाई लाँद नो मचिज़्यावराए ल्योदा धोःनाकेर। नो माहोल्याराए नोर याहुज़्याव रँःद पावललाई प्रोन्या चिम दोकेर। ³³हाःत ज़ नो सेनापतीए पावललाई क्योःद नेब्लो साँगलए किव परींद, माहोल्यारालाई, 'आव मिँ सु ओताव, काता येन ओदोव?' है लिद ओरासुधिक ते, ³⁴ख्वाराए 'आव ज़', ख्वाराए 'हो ज़' लिद बनै राउंनी इयाउँ लिकेर। सुए यापाँ ब ओमाथरैधुवए उसिपाईरालाई पावललाई थानाक लाँव यापरीक्यो। ³⁵थानालाव थप्काक याकेसोत माहोल्यार यारिसए बनै ज़ याछुइसिहुवए सिपाईराए पावललाई छींद लाँकेर। ³⁶नो माहोल्यार थानाक पै याछीं याछीं ज़ हुद, "आवलाई खदम ज़ ख्यान्या," है लिद बनै ज़ क्रिकेर।

माहोल्यारालाई पावलए जवाप ओरायो

³⁷हाःत ज़ पावललाई थानाल लाँव यापैज़्याक, पावलए सेनापतीलाई, "डा नँस तोबो पाँव डादैक," है ओदोक ते, नो सेनापतीए, "नँ ग्रीक पाँ कातानी नसैव? ³⁸डा ते नँलाई छुत ची है डाल्यो। नँ नो तालाडाव सरकारकिन तँदा जैसिद चार हजार गुन्दारालाई मचैज़्याव इजिपी माःक रो?" है ओदोक ते, ³⁹पावलए, "डा हो माःक। डा ते किलिकियालाव तार्सस सहरल जर्मिउ यहूदी ची। नो पो बनै उमिन थासो, छ्याल्ल्यु सहर ब माःक। नँस डाबिन्ती तोबो लिज़्या — आव माहोल्यारास तखेप पाँव डादैक," है ओदोक ते, ⁴⁰नो सेनापतीए पावललाई भैःदिक्यो।

पावल थप्कात च्याँःसिद, 'चिम दोचिके' लिद उकुइए सान दाद याएक्यो। प्राइँ चिम यादोवत पावलए हिबू खामनी अइ लिद पाँके,

22

¹"अ डादाज़्यु भाइर, डासेरर, डा डापाँ ब तखेप थैद्याँचिके," है ओरादोक ते, ²हिबू खामनी ओपाँज़्याव थैद माहोल्यार इन ज़ चाप चुप ताकेर।

३है जैद पावलए, “डा यहूदी जातलाव मिँ ज़, किलिकियालाव तार्सस सहरल डाजर्मिउ। ननी सरिद आल यरूसलेमल डाडासिके। गमलिएलए उसिस ब ताद, गेजिज्यु बाज्युकिनकाव हुव चलन भरी माबिरैद ज़ पैसिद, जे माँ:ती परमेस्वरए ल्योदा बनै ध्यावना डादोज्याव। 4 येसुए ओपाँत बाज्याव खेपा मेंमार यामासिवा पै याखिरी पसिद, ख्वा ख्वारालाई क्यो:द इयालखानाल ब डाराझा:के। 5 अछादी प्रधान पुजारी सोनो घ्यो:व कचरीलाव सेररालाई यारासुधिचिके, याज़ सैज्यार। तछा नोराए ल्योनी दमस्कसलाव यहूदी दाज्यु भाइराए यामिनताव चिथील नलाव यायुँ हुबोरालाई मनी क्यो:द सजा यान्याए जूनी यरूसलेमदा किद रैन्या हक दैद नदा ज़ डाबाके।

6“येमत डाबाज्याक अधमर लाक दमस्कस डाकेस्नाक, उमँ:जानी बनै मी झी:न्या ज़गै नमतिन हुद डाल्योक बनै म्याल्याकनी मिलिक ताके। 7 हा:त ज़ नामक डाधलिउत, कातानी तोबो गा अइ लिद ओपाँज्याव डाथैके, ‘अ साऊल, अ साऊल, नँ काराव डाखिरी नपसिज्याव?’ है ओदाँक ते, 8 ‘नँ सु प्रभु?’ है डादोके। नो गा फरी हुद, ‘डा नो डाखिरी नपसिज्याव नासरतलाव येसु ज़’ है दाँक्यो। 9 नो डास बाज्याव डानैराए ते ज़गै वाज़ रँ:केर, डास पाँज्याव गा ते माथरैधुकेर। 10 हा:त ज़, ‘डा काता येन दान्या, प्रभु?’ है डादोक ते, ‘नँ सोद दमस्कसल बान्केदा, नड ज़ नँ दान्या येन भरी थैन्या नले,’ है दाँक्यो। 11 नो ज़गैए डालाई अन्दनी मुन्द ओजैनावए डानैराए डाकुइनी दोरैद दमस्कसल लाँनाकेर।

12“नल तोबो हननिया यादोज्याव मोसाए ओकानुन माबिरैद दाज्याव धर्मी मिँ उलिज्याव। नलाव यहूदीराए नोलाई बनै चाव थरैद यानैज्याव। 13 नो मिँ डाल्योक हुद, ‘अ भाइ साऊल, नमी ओरै:क,’ है ओदाँव प्राइँना डामी फैसिद रँ:धुन्या डाताके।

14“हा:त ज़ नोए, ‘गेजिज्यु बाज्युकिनकाव गेपरमेस्वरए नँलाई

उयुंलाव मिताव पाँर सतैन्या जूनी खतैद नैनित। छैव ओजा नल्योक सरैःद्याद, ओर्गा थैन्या ब जैनिक्यो। 15 है जैद आव नरैःव नथैव भरित प्राईं मिंराए डाक येसुए ओसाची तान्या नले। 16 है जैद मातेन्सिद ज़ नँ आख सोद नपापलाई छेन्याए जूनी येसुए उमिन हाइद रील सछैंसिन्के, है दाँक्यो।

17“नकिन छीनी यरूसलेमदा ओल्द बाद, तछा ध्यान झिमल डापोंखारिज्याक ज़ नल झजल्किद, येसुलाई डारैःके। 18 नोए, ‘नँ चाँदो ज़ घल्सिद, यरूसलेमनी हाइसिद बान्के। आल डाजूनी नराएज्याव गोहाई भैःन्या मालेर, है ओदाँक ते, 19 डा फरी, ‘काराव प्रभु? याज़ सैज्यार — डा यासकाव ताद धर्मसास्त्र झिम झिमक बाद नपाँ दोज्याव भरिरालाई सापूद क्योःद कैताक प्रोद इयालखानाल ब डाराझाःज्याव। 20 नसाची स्तिफनसलाई लुँए झेःद यासैःव बेलाक डा मनी नोरास खैद नक च्याँःसिद नो झेःज्यावराए याक्वार समारिद डाराएज्याव, है डादोके।

21“हाःत ज़ येसुए, ‘नँ घबानी। तादा तादाड लिज्याव छुत जातलाव मिंराए ल्योदा डापरींनिरिज्या, है दाँक्यो।”

पावलए ओपाँ थैज्यावर यारसिउ

22नो माहोल्याराए नाःपै पावलए ओपाँ चावस ज़ थैकेर। खाली छुत जातराए यामिन ओहाइव प्राईंना माहोल्यार बनै मचिद, “निताव मिंलाई काताए उजूनी नैन्या? बुरू सैःकिन पाथ लिज्या,” है लिद, 23 याक्वार सिउःद ख्याद, धुइरो ब सिमे सिमे नमदा ख्याद बनै किकेर।

24है जैद सेनापतीए उसिपाईरालाई पावललाई थानाल लाँव परींद, “काताए जूनी नाः याकिज्याव? आवलाई रीःद खोलेव ताके, कसा मापाँए,” है दाद, 25 पावललाई किद रीःव यापैज्याक, नकाव च्याँःसिद लिज्याव कप्तानलाई पावलए, “डा रोमी नागरिकलाई डागल्ती माथरैद अइज रीःन्या ओताज्याव रो?” है दोक्यो।

26नो कपूतानए नो पाँ थैद सेनापतीलाई, “कै जैनुया नपैंज्याव? आव मिँ ते रोमी नागरिक ची ओल्यो, नमासैए रो?” है ओदोक ते, 27 नो सेनापती पावलए ल्योक बाद, “साचो नँ रोमी नागरिक रो?” है ओदोक ते, “डा रोमी नागरिक ज़,” है दोक्यो। 28 नकिन नो सेनापतीए, “डा कुधु पैसार फोःद वाज़ नागरिक डाताके,” है ओदोक ते, पावलए, “डा ते रोमी नागरिक ज़ डाजर्मिउ ची,” है दोक्यो।

29हाःत ज़ पावललाई खोलेःना हुवर नो पाँ थैद याछींदा तेन्सिकेर। सेनापती मनी, ‘अनाकल ज़ रोमी नागरिकलाई ची डाकिउ ओल्यो’ लिद छेःके।*

पावललाई घ्योःव कचरील यालाँव

30हो पराःती नो सेनापतीए पावललाई पलाःद, ‘यहूदीराए काराव आवलाई खत यालैज्याव’ लिद थरैनुयाए जूनी मुख्या पुजारीर सोनो घ्योःव कचरीलाव मिँरालाई दुपूद, पावललाई याड़ाक सच्याँक्यो।

23

1पावलए नो कचरीलाव मिँराए ल्योदा भाल्सिद अइ लिद जवाप याएक्यो, “दाज्यु भाइर, डा आःपै परमेस्वरए ओड़ाक छैव युँस ज़ डालिज्या,” है ओरादोव प्राइंना, 2 प्रधान पुजारी हननियाए नकाव च्याँःसिद लिज्यावरालाई पावलए ओयाःत लफरैव यापरीक्यो।

3 हाःत ज़ पावलए उरिस चोद, “ए पाखात वाज़ चाव जैसिज्याव, नँलाई तछा परमेस्वरए लफरैनिरिज्याव। नँ मोसाए ओकानुननी फालनुया जैसिज्यावए कै जैद नो कानुनलाई उलतैद डालाई प्रोव नरापरीज्याव?” है ओदोक ते, 4 नकाव च्याँःसिद लिज्यावराए, “नँ कै जैद नाःल्दिउ परमेस्वरनी खतैसिउ प्रधान पुजारीस याः नदोज्याव?” है यादोक ते, 5 पावलए, “दाज्यु भाइर, नो प्रधान पुजारी ओल्यो लिन्या डा डामासैए। धर्मसासत्रल मनी इताव सर्सिउ लिज्या, ‘राज्या चलैज्याव घेपपाराए याडैत माचाव पाँन्या

* 22:29 22:29 ओसा १६:३८ चिऊन्या।

माताए।”

६नो घ्योःव कचरील तभा सदुकी दललावर, तभा फरिसीर यालिजूयाव सैद, याड़ाक च्याँःसिद प्राईलाई, “अ दाज्यु भाइर, डा फरिसीए ओजा फरिसी ज़। डा, ‘सिद मनी अजम्बरी जुनीए आस लिजूया,’ है डालिजूयावनी ज़ आछिमकाव मुद्दाल डापरिके,” 7 है ओरादोव प्राईना नलाव सदुकीर सोनो फरिसीर या या माखैद बनै खर्लेसिकेर। 8 सदुकीराए ते, ‘अजम्बरी जुनी ब माले, परमेस्वरए ओचाकर्यार ब मालेर, पुरूसर ब मालेर’ है यालिजूयाव। फरिसीराए फरी, ‘कै जैद ओमालिजूयाव? नो भरी लिजूया ज़’ है यालिजूयाव। 9 है जैद नोर बनै राउंनी इयाउं जैद, फरिसीरासकाव यासास्त्रीर च्याँःसिद बनै रसिद, “आवए माचाव काता दाद ओनैजूयाव? है उलिजूयाव मिताव परमेस्वरए ओचाकर्या कितर परमेस्वरए उपुरूस हुद ओलस ज़ ओपाँव ताक्या,” है लिकेर। 10 है जैद या याज़ माखैद इन ज़ मचिनाद पावललाई हो ज़ सेलन्या, हो ज़ छुइन्या जैकेर। निताव रँःद नो सेनापतीए सैःर्या लिद छेःद उसिपाईरालाई पावललाई करस ज़ पलेःव परींद थानाक लाँक्यो।

11हो छचाम रील ज़ प्रभु पावलए ओड़ाक सरैःसिद, “नयुँ तासतेयो, नयुँ होलाँ ओताक। किताव आल यरूसलेमल डासाची जैसिद डापाँ नरासथैव, हिताव ज़ रोमल मनी डासाची नतानारिजूया,” है दोक्यो।

पावललाई सैःन्या बुद्धी

12हो पराःती छकालून्या यहूदीर दुप्सिद पावललाई सैःन्या बुद्धी कलैद, “नोलाई गेमासैःवा पै ज्ञान्या ब गेमाज्यु, ओन्या ब गेमाओ,” लिद किर्या ब झाःकेर। 13 निताव किर्या झाःज्ञ्यावर चालीसकिन यादा ज़ याल्यो। 14 नोर मुख्या पुजारीर सोनो सेरराए ल्योक बाद, “गे भरी पावललाई गेमासैःवा पै काता ज़ ज्ञान्या गेमाले लिद किर्या झाःद गेने। 15 है जैद जे घ्योःव कचरी दाव

जैसिद, सेनापतीए ल्योदा 'पावललाई चावस फाल्नुयाए जूनी आदा रैके' लिद था परीं व ताके। हो बेलाक ज़ गे येमक वैसिद नोलाई गेसै:रिज़्या," है दाद सल्ला याराएकेर।

16हा: बेलाक पावलए ओभान्जए यासल्ला भरी थैद, थानाक बाद ओबागे पावललाई है दोनाक्यो। 17 पावलए फरी कप्तानलाई खुल्द, "आव छोर्यालाई सेनापतीए ल्योक लाँद्याव ताके, होस तोबो पाँ पाँरिज़्या दी," है ओदोक ते, 18 नोए नो छोर्यालाई सेनापतीए ल्योक लाँद, "आवए ओपाँ तोबो लिज़्या दी। कैदी पावलए डालाई नल्योक सारैव परींनाक्यो," है ओदोक ते, 19 नो सेनापतीए नो छोर्यालाई उकुइनी क्यो:द तँदा अलगज़ा लाँद, "काराव, डालाई है दाँके," है दोक्यो।

20नकिन नो छोर्याए, "परा:ती यहूदीर घ्यो:व कचरी दाव जैसिद, 'पावललाई चावस फाल्नुयाए जूनी आदा रैके' लिद नँस बिन्ती दोरिज़्यार दी। 21 खाली नँ नोराए यापाँ ताभै:नी। चालीसकिन यादाडाव मिँर पावललाई सै:न्या लिद येमक वैसिद लेर। नोराए, 'पावललाई गेमासै:वा पै ज़्यानुया ब गेमाज़्यु, ओनुया ब गेमाओ,' लिद किर्या झा:द नैर। नँ नपाँलाई वाज़ कींद नैर," है ओदोक ते, 22नो सेनापतीए, "आव पाँर डालाई है नदाँव सुलाई ज़ है तारादोयो," है दाद नो छोर्यालाई उझिमदा परींक्यो।

पावललाई कैसरियादा यासारैव

23नो सेनापतीए नेब्लो कप्ताननिलाई खुल्द, "पते रील नौ बजेवाक, जिन पावललाई कैसरियादा लाँनुयाए जूनी खँनी बान्या सिपाईर नेसय, घोरा चेपूद बान्यार सत्तरी सोनो ज़लरास बान्यार नेसय जना तयार याराजैचिन्के। 24 पावललाई मनी घोरात जोगोइद हाकिम फेलिक्सए ल्योदा पाथस सारैव ताके," है निदोक्यो।

25नो सेनापतीए फरी, हाकिमए ल्योदा तोबो चिथी अइ लिद सर्द परींक्यो,

26“डा क्लौदियस लुसियसए डाल्योनी, नँ माननिय हाकिम फेलिक्सलाई जेरो लिज्या।

27आव नल्योदा डापरींज्याव मिँलाई यहूदीराए क्योःद सैःव यापैंज्याव। रोमी नागरिक ज़ ओल्यो लिन्या सैंद डा डसिपाईरास बाद नोलाई डाजोगोइके। 28 ओगल्ती काता ओताव लिद थरैन्याए जूँनी यहूदीराए घ्योःव याकचरील ब डालाँके। 29 नल याधर्मए उजूँनी वाज़ यामाखैज्याव ओल्यो लिन्या डाथरैके। नोलाई इयालखानाल झाःन्या सोनो सैःन्या सजा स्यासो ते काता ज़ डामादैके। 30 हितावत ब यहूदीराए नोलाई सैःन्या बुद्धी याकलैज्याव ओल्यो। निताव डसैवत हतपूत ज़ नल्योदा डापरींके। ओडैत पाँज्यावरालाई मनी, ‘जेमुदा कातार उलिकिन हाकिमए ल्योदा लाँचिके,’ लिद हुकुम डाराएके।

डापाँ आःज़, जेरो।”

31है जैद नो सेनापतीए है ओरादोव मिताव ज़ सिपाईराए हो छचाम रील ज़ पावललाई एन्तिपात्रिस सहरक पै लाँकेर। 32 हो पराःतीकिन नो खँनी बाज़्यावर ओल्द, घोरा चेपूद बाज़्यावरालाई वाज़ पावलस यारापरींकेर। 33 नो घोरा चेपूद बाज़्यावर कैसरियाल केसूद हाकिमलाई चिथी बुझैद पावललाई मनी बुझैकेर। 34 है जैद नो हाकिमए नो चिथी प्रिद, पावलए उजिल्ला सुधिद किलिकियालाव ओल्यो लिन्या सैंद, 35 पावललाई, “नजगर्यार मनी याहुवत आव नमुदा डाथैया,” है दाद पावललाई हेरोदए ओदरबारल नैव यापरींक्यो।

24

हाकिम फेलिक्सए ओड़ाक पावल

1पाँच दिन ओतावत प्रधान पुजारी हननिया तोबो नेब्लो यहूदीराए यासेररास कैसरियाल हुद, हाकिमए ल्योक बाद पावलए उजूँनी उजुर दोनाकेर। नोरास तोबो तर्तुल्लस यादोज्याव वकिल ब रैद

यानैजूयाव। ² है जैद मुद्दा चलैद पावललाई यारैवत तर्तुल्लसए अइ लिद पाँके, “माननिय फेलिक्स ज्यू, नँ गेपोडाव हाकिम ताद, नदयानी गेदेस बनैद नयासिउए गे प्राइँडावरालाई बनै सन्च ताद फाबिउ ज़ गेलिजूया। ³ होए उजूनी गे प्राइँनी ज़ नगुनर मामेःद मानिउ ज़ गेलिजूया। ⁴ खाली आछिम नर्च्या मासैःद गेल्योदा दया दाद आव तोबो ज़िमज़ा गेपाँ वाज़ थैद नयासिकिन ताखेहो है गेलिजूया। ⁵ खास गेपाँ आव ज़ — आकाव नल्योक रैद यानैजूयाव मिँ ते बनै नाल क़याव माचाव मिँ लिजूया। नासरी दललाव यागुर्बा ताद संसार भरिल दुलिद यहूदीरालाई बनै ज़ यामचैजूयाव। ⁶ ध्यान झिमलाई झन झुथो जैव ओपैजूयाक बल्ल गेक्योःके। [मोसाए ओकानुननी गे ज़ फालो गेपैक ते, ⁷ कप्तान लुसियस हुद झन नोलाई गेल्योनी जबरजूयासूती नैद, ⁸ गे ओजगर्यारालाई मनी नँ नल्योदा हुव परींसिक्यो।] है जैद आवलाई नबिचारिक उजुर गेदोव पाँ भरी साचो ज़ ओल्यो लिन्या थरैन्या नले,” है दोक्यो।

⁹नोस हुव यहूदीराए मनी ओपाँ जोर्दिकेर।

हाकिमलाई पावलए ओयो जवाप

¹⁰हाःत ज़ हाकिमए पावललाई सान दाद ओएक ते पावलए अइ लिद पाँके, “माननिय हाकिम, नँ आव राज्याल कुधु बर्सकिन ज़ मिँरालाई नराफालजूयावए डा नडाक डायुँ हुपूद ज़ डापाँजूया। ¹¹ डा यरूसलेमदा परमेस्वरए ओध्यान दाना डाबाव आछिम बाह दिन वाज़ ताके। आव डापाँ साचो सैँ माःक नँ ज़ थरैधुन्या नले। ¹² नाः भरिल डाकिन तँदाडावराए ना डा सुरास ध्यान झिमल डारखर्लेसिजूयाव यारँःनाव, ना धर्मसासूत्र झिमराल ना सहरल मिँरालाई डारामचैजूयाव यारँःनाव। ¹³ है जैद आव डाडैताव झाःव यापैजूयाव पाँर काता ज़ थरिन्या माले। ¹⁴ खाली आव तोबो भन्या हैज़, गेजिजू बाज्युकिनकाव ओसेवा गेदोहुजूयाव परमेस्वरलाई डा मनी साःरो येमनी ओसेवा डादोज़या। आवराए झन ‘तँनिकाव

येम' है दाँज्यार। है यादाँदी ब मोसाए ओकानुन सोनो अगमबक्तराए यासरो पाँ भरित डायुँ हुपुज्या। 15 आवराए यादोज्याव मिताव डा मनी 'तछा चाव माचाव दाज्याव प्राईं मिँर परमेस्वरए ओझाक च्याँ:सिरिज्यार,' है लिद परमेस्वरए ल्योदा आस डादोज्या। 16 है जैद नो पाँर चेतैद डा परमेस्वरए ओझाक सोनो मिँराए याझाक छैव युँस दान्या वाज्र धामा डादोज्या।

17“है जैद डा छुत देस जीदा नेरिम सोरिम भरी दुलिद, 'डादेसलाव दुखिरालाई सघैद परमेस्वरलाई मनी भिती चरै:न्या' लिद फरी यरूसलेमल डाहुके। 18 होए उजुँनी ध्यान झिमल डालिज्याव बेलाक यहूदीराए दैनाकेर। हो बेलाक ज़ भर चोखोइसिद डालिज्याव, ध्यान झिमल खैलानी बैला ब काता ज़ ओमालिज्याव। हा:त ज़ एसिया खन्दनी हुव यहूदीराए डालाई सरेसूद नलाव मिँरालाई यारामचैकेर। 19 नोराए डाडैत झा:न्या पाँ कातार ओल्यो ताकिन नोर याज्र आछिम हुद उजुर दाव परिन्या ओल्यो। 20 अथबा, यहूदीराए घ्यो:व याकचरील काता डागल्तीर यादैव ताकिन आकाव हुद लिज्यावराए ओपाँरक ते। 21 सै नो कचरीलाव सिउनी सैसिन्याए जूँनी डापाँवनी आछिमकाव मुद्दा याचलैज्याव ओताव?” है यादोक्यो।

22हा:त ज़ नो हाकिम फेलिक्सए ना: थैद, “डा आव जेपाँ भरी कपूतान लुसियस उहुवत डाबिचारिया,” है दाद भा:सिउ यापरीक्यो। ओल ते उपुर्कावराकिन येसुए ओपाँ सर्बा ज़ ओसैज्याव। 23 है जैद नोए पावललाई गुन्याए जूँनी सिपाईराए याकमान्दरए उजिम्बाल नैद, “आवलाई जाँ आदा होदा ल्यो ब यान्या, दैसिना हुज्याव ओनैरालाई मनी तारावैयो,” है लिद हुकुम एक्यो।

24नेला सोलावात फेलिक्स, यहूदी ओज्या द्रसिल्लास हुद, येसु

ख्रीसनिकाव येम किताव उलिजूयाव लिद चावस थैन्याए जूनी पावललाई खुल्द पलासो परीक्यो। 25 है जैद पावलए ओअर्थ भरी पलासद्याद, परमेस्वरए उयुंलाव मिताव येन दान्या, तहस लिन्या, सोनो परमेस्वरनिकाव फाल्न्या छचामए उजूनी उनिसथैवत, फेलिक्सए उयुंल बनै छेद, “आछिम नाःत ज़ नैकेदा बान्के। बुरू तछा फरी डाधाःक डाकिन्यादा नसथैना,” है दोक्यो। 26 हाःकिन, “पावलए ओल्योनी घुस ब डादैए सै” लिद पावललाई घरी पाला ज़ खुल्द सिप सिप ज़ निपाँजूयाव।

27नेरिम ओतावत फेलिक्सए ओपाला तोसिद तोबो पर्किअस फेस्तस हाकिम ताके। फेलिक्सए ते नो येन ओरास्क यहूदीरालाई खुसी जैन्याए जूनी पावललाई मारास्द कैतल ज़ नैक्यो।

25

साःरो हाकिम फेस्तस

1साःरो हाकिम फेस्तस यहूदिया खन्दल उहुव सोला ओतावत कैसरियानी पुलुस्द यरूसलेमदा बाके। 2 यरूसलेम ओकेसोत नलाव मुख्या पुजारीर सोनो यहूदीराए याघेपपाराए पावलए ओडैताव याझाःव पाँर सम्जैद, 3 ‘यरूसलेमल सारैन्या’ लिद बिन्ती दोकेर। नोर खास येमत वैसिद सैःन्या बुद्धी कलैद यानैजूयाव। 4 फेस्तसए नोराए यापाँ भैःद मायाद, “पावललाई कैसरियाल थुनाल थुनैद नैर, डा मनी जाँवाक नदा ज़ डाबारिजूया। 5 है जैद जे नोए उजूनी जेपाँ कातार उलिकिन तोबो नेब्लो जेसेररालाई डास ज़ बान्या यारापरीच्यो। होए ओगल्ती कातार उलिकिन नोराए ज़ उजुर दोर्या,” है लिद यासमूजैक्यो।

6हाकिम यरूसलेमल ओल्यो आथ दस दिन ओतावत कैसरियादा ओल्द बाके। ओकेसो हो पराःती अदालतल बाद पावललाई रैव यापरीक्यो। 7 पावल अदालतल उहुवत, यरूसलेमनी हुव यहूदीर प्राई ओल्योक गुरिगाँ जैसिद घ्योःव घ्योःव माथ०रिउ पाँर ओडैत

झाःदिकेर।

⁸पावलए नोरालाई जवाप याद हाकिमलाई, “डा यहूदीराए याकानुनलाई तादी ब, ध्यान झिमलाई तादी ब, माहाराजालाई तादी ब, काता ज़ बलेद डामाराए,” लिद है ओदोक ते, ⁹फेस्तसए यहूदीरालाई ओल्योदा जैन्याए जूनी पावललाई, “हुकी नँ यरूसलेमदा बान्केदा आव पाँर होड ज़ फसेला डाजैया, कै ताके?” है ओदोक ते, ¹⁰पावलए, “डा सरकारए अदालत डाक ज़ डालिज़्या, आल ज़ फाल्सिउ परिए। यहूदीरालाई ते काता ज़ बलेद डामाराए है डाल्यो ते नँ ज़ नसैज्याखेहो सानी। ¹¹ डा माचाव येन दाद, डालाई सैःन्या मिताव गल्ती कातार उलिकिन ते थिक ज़, डालाई जेसैःनादी ब ताए ज़। खाली आवराए डाडैताव झाःद यायाँज्याव पाँर ओमाथरिउ ताकिन नँ डालाई याल्योदा सूपिन्या नहक ब माले। है जैद डा आख ज़ माहाराजाए ल्योदा बिन्ती दान्या डापैज्या,” है दोक्यो।

¹²हाःत ज़ फेस्तसए ओलसकाव सल्ला याज्यावरास जलफल दाद पावललाई, “नँ माहाराजाए ल्योदा बिन्ती दान्या नपैव प्राइँना नदा ज़ बान्या नले,” है दोक्यो।

फेस्तसए राजा अग्रिपासस सल्ला ओदोव

¹³नेला सोंला ओतावत तोबो अग्रिपास राजा ओबैनी बरनिकीस कैसरियाल फेस्तसस दैसिना हुकिनी। ¹⁴ नोनी सर्बा कुधु दिन नल लिन्या बिचार निदोवए हाकिम फेस्तसए पावलए उजूनी राजा अग्रिपासस सल्ला दाद, “डाकिन डादाडाव हाकिम फेलिक्सए तोबो कैदीलाई डा डाजिम्बाल ख्यानैक्यो। ¹⁵ डा तछा यरूसलेमल डालिज़्याव बेलाक नलाव मुख्या पुजारीर सोनो यहूदीराए यासेरर डाल्योक हुद नोए ओडैत ओखत पलेद्याद होक ज़ सजा ब याव पैकेर। ¹⁶ डा फरी नोरालाई, ‘रोमी कानुननी बादी पर्तीनी जोरन जैद, नो पर्तीवालाए ओडैत झाःद यायो पाँ भरिए ओजवाप याव

ओमादैवा पै नोलाई अइज़ सूपिन्या माताए, है डारादोके। 17 है जैद नो मुद्दा याज़्यावर आल ज़ हुकेर। धिलो मादाद हो परा:ती डा कचरी जैद पावललाई मनी अदालतल रैव डारापरींके। 18 नोर च्याँ:सिद ओडैत झा:द यापाँक डा बनै अचम्ब डाताके। अपराधी मिताव येन ते काता ज़ डामाडम्सिके। 19 अइज़ याधर्म रोक मेक ओतावए यामाखैज़्याव ओल्यो। तोबो सिउ येसु यादोज़्यावए उजूनी पावलए 'जींदो ज़ लिज़्या' है ओरादोवनी बनै यारसिउ ओल्यो। 20 डा याधर्मलाव पाँ जाँ मासैद कातानी फाल्नुया ओताव लिद पावललाई, 'आव पाँर फाल्नुयाए जूनी नँ यरूसलेमदा नमाबाके?' है डादोक ते, 21 पावलए झन, 'डा नदा डामाबा, बुरू आव पाँर फाल्नुयाए जूनी माहाराजाए ल्योदा डामाबावा पै आल ज़ डालिरिज़्या,' है लिके। है जैद डा नोलाई माहाराजाए ल्योदा परींन्या मौका ओमाहुवा पै आल ज़ डानैज़्या," है दोक्यो। 22 अग्रिपासए नो भरी थैद, "डा मनी नोए ओपाँ तखेप थैव डादैक," है ओदोक ते, फेस्तसए, "ताए, नोए ओपाँ परा:ती ज़ नथैया," है दोक्यो।

पावल अग्रिपासए ओड़ाक ओपाँव

23हो परा:ती अग्रिपास सोनो बरनिकी बनै तह महौ जैसिद, सेनापतीर सोनो सहरलाव घेप्पारास सिप ज़ कचरी दान्या महलल हुकेर। प्राँ यादुप्सिउत फेस्तसए उसिपाईरालाई पावललाई रैव यापरींक्यो।

24हा:त ज़ फेस्तसए प्राँलाई, "राजा अग्रिपास सोनो आल हुद लिज़्यावर, आव डापाँ थैचिके। आव जेड़ाकाव च्याँ:सिद लिज़्याव मिँए उजूनी यरूसलेमलाव यहूदीर सोनो आलाव यहूदीर बनै रसिद डाल्योक हुद, सै:न्या सजा याव यापैंज़्याव। 25 आवलाई डाबिचारिक फरी सै:न्या सजा यान्या स्यासो ते काता ज़ डामादैके। हा:त ज़ माहाराजाए ल्योदा बिन्ती दान्या ओपैवए नदा ज़ परींन्या डाथरैके। 26 खाली नदा डापरींकिन माहाराजालाई

आवए उजूनी सर्द्यान्या मिताव पाँर ते काता ज़ माले। है जैद आछिम जे भरिए जेड़ाक सोनो खास ते नँ राजा अग्रिपासए नड़ाक आव मिँलाई सच्यौँद डानै, कसा आवए उजूनी तोबो नेब्लो सर्न्या पाँर मापुलुस्रिज्या। 27 मानी नाःल्दिउ राजाए ल्योदा बिनु गल्ती कै जैद परीन्या?” है यादोक्यो।

26

1हाःत ज़ राजा अग्रिपासए पावललाई, “नपाँ काता उलिज्याव, पाँनिके,” है ओदोक ते, पावलए उकुइए सान दाद अइ लिद जवाप एक्यो,

2“डालाई यहूदीराए डाडैत झाःद यायाँव खतए ओजवाप नँ राजा अग्रिपासए नड़ाक पाँव डादैवए, डा आछिम बनै डाभागी ल्यो ज़ डालिज्या। 3 नँ यहूदी चलन भरी बनै सैन्या मिँ ज़ नलिज्या। है जैद आछिम पै डालाई सहिद डापाँ भरी चावस थैयो लिद बिन्ती डाचरैःनिज्या।

4“डा डाजर्मिउ पो सोनो यरूसलेम सहरल यहूदी जातलावराए याखार्ल ज़ डाघ्योःके। है जैद यहूदी भरी प्राइँए ज़ जिम्जाकिन डादोहुज्याव येनर चावस सैँज्यार। 5 हाः बेलाक फरिसी ब डाजैसिके। गेधर्म मानिज्याव भरिरानी फरिसीराकिन कर्रा सु ज़ मालेर। है जैद डालाई नो येनत डादाकिन ज़ सरेस्द नैनार। नो पाँए उजूनी है यालिकिन है लिधुन्या ज़ लेर। 6 नोराए झन आछिम डा ‘गेसाखा पुखारालाई परमेस्वरए ओरायो याका सयोःद्यासिक्यो’ है डारादोवनी ज़ डालाई सजा याव पैँज्यार। 7 नो याकाए उजूनी ज़ गेमीं बाह थरलाव मिँराए आस दाद लाकनी रील ध्यान दाद खिमो ज़ नैँज्यार। अ राजा, डा नो खिमो ज़ यानैँज्यावलाई थरैद डारायोनी ज़ यहूदीराए माभैँद आछिम नल्योक रैद नैनार। 8 ‘परमेस्वरए सिउरालाई यासोचोइँज्याव’ है डालिज्याव पाँत कै जैद अचम्ब ताद जेमापतिज्याव?

9“डा मनी डादा नासरतलाव येसुए उमिन बनै सोद ओपाँलाई जुनी ब वैव डापैंज्याव। 10 है जैद यरूसलेमल नोए उउपत बनै धामा दाद, मुख्या पुजारीराए ल्योनी क्योःन्या हक रैद येसुए छैव उमीं कुधुरालाई इयालखानाल ब डाराझाःके। सैःन्या याथरैक डा मनी ‘हैज’ लिद यापाँ जोर्द डाराएज्याव। 11 कैताक धर्मसासत्र झिम झिमक बाद नोरालाई दुख याद, कसा मारासर लिद कर ब डारालैज्याव। डारिस बनै माचाव ओतावए छुत देसलाव सहर जीदा मनी दुलिद नोरालाई सापे सापे याखिरी डापसिज्याव।

12“अ राजा, तछा निताव येनए जूनी मुख्या पुजारीराए ल्योनी हक रैद दमस्कसदा डाबाज्याव बेलाक, 13 अधमर लाक निमीकिन ब ओझार ल्यो जगै नमतिन हुद, डानैरास गेल्योक म्याल्याकनी मिलिक रैःहुके। 14 गे भरी प्राई नामक गेधलिउत तोबो गा हिबू खामनी डस, ‘अ साऊल, अ साऊल, नँ काराव डाखिरी नपसिज्याव? नँ सैज्यावत ब जपत लातए थेंद ननैज्याव मिताव ज नलिज्या,’ है ओदाँक ते, 15 डा, ‘नँ सु प्रभु?’ है डादोके। प्रभुए फरी, ‘डा नो डाखिरी नपसिज्याव येसु ज। 16 नँ सोद च्याँःसिन्केदा, डा नँलाई डानोकोर जैन्याए जूनी आछिम नल्योक डसरैःसिके। आछिम डालाई नरैःनावए नँ डसाची ताद, छीनी सतेंद डाईरिज्याव पाँए ओसाची ब नतारिज्या। 17 यहूदीराए ल्योदा सोनो छुत जातलावराए ल्योदा डापरीनिक नोराए ल्योनी डाजोगोडनिरिज्या। 18 नँ होरालाई डापाँ सथैद यामी फैद्यान्या नले। चुम चुमो सैतानए ओराज्यानी पलेद, ओजगै ल्यो परमेस्वरए ओराज्याल लाँन्या नले। हुनी ज नोर डालाई यारुं हुपद यापापर क्याल्सिद, परमेस्वरस खैवरास स्वर्गताव बताहा दैन्याकावर तान्या लेर,’ है दाँक्यो।

19“है जैद, राजा अग्रिपास, डा नो नमतिन हुव पाँकिन तँदा

माबाद, ²⁰ दमस्कसल येसुए ओपाँ सथैन्यात डाथूसिके। नकिन यरूसलेमलावर, यहूदिया खन्द जीदाडावर, सोनो छुत जातलावराए याल्योदा मनी बाद, 'जेपापलाई रास्द, परमेस्वरए ल्योदा जेयुँ फकैद, साचो हो मिताव येन ब दोव ताके,' लिद सथैव ज़ डारानैज्याव। ²¹ होए उजूनी ज़ डा ध्यान झिमल डालिज्याव बेलाक यहूदीराए डालाई क्योःद सैःव पैकेर। ²² खाली परमेस्वरए डालाई पाथस ओनैनावए आछिम पै घेप्पा ज़िमज़ारालाई ओसाची याव ज़ डालिज्या। नो डापाँल मोसा सोनो अगमबक्काराए, 'इताव इताव तारिज्या' है याल्यो पाँकिन डा छुत काता ज़ चरैःद डामापाँए। ²³ होराए पाला, 'ख्रीस दुखर सहिद, सिउनी सैसिउ प्राइरानी डात ताद, यहूदीर सोनो छुत जातलाव मिँरालाई अजम्बरी जुनील बान्या येम सतैद याएरिज्याव,' है लिद मिँरालाई यारासथैकेर।"

²⁴पावल निताव ओपाँज्याक ज़ फेस्तस बनै चोइस क्रिद, "पावल, नँ दासानी बिसा ताद नले। कुधु प्ररिद चबनै बूलिउ स्यासो नताके," है ओदोक ते, ²⁵पावलए, "माननिय फेस्तस ज्यू, डा बूलिउ माःक। साचो थंरिउ पाँ ज़ डापाँज्याव ची। ²⁶ आव पाँ भरी राजा अग्रिपासए मनी सैज्याखेहो लिद ओडाक डायुँ हुपूद ज़ डापाँज्या। आव मोसिउलाव पाँ स्यासो ते माःक। है जैद 'ओमासैव ब काता ज़ मालिखेहो' लिद डायुँ हुपूद ले," है दाद, ²⁷ राजा अग्रिपासलाई मनी, "अ राजा, अगमबक्काराए यासरो पाँ नमापतिज्या? नपतिज्याखेहो," है ओदोक ते, ²⁸ अग्रिपासए, "आव छचावा नपाँए डालाई ब ख्रीस्त्यान जैव नपैज्याव रो?" है ओदोक ते, ²⁹ पावलए फरी, "परमेस्वरए ओडाक डाबिन्ती आव ज़ लिज्या — छचावानी तादी ब, कुधुनी तादी ब, जे आछिमकाव डापाँ थैज्याव भरिए, डालाई सुसिउ साँगलराकिन बाहेक, डा स्यासो जेताकिन ताखेहो

है डालिज्ञ्या,” है यादोक्त्यो।

³⁰हाःत ज़ राजा अग्रिपास, हाकिम फेस्तस, बरनिकी स़ोनो यास चुसिद लिज्ञ्याव भरी च्याँःसिद लाँःदा पुलुसद, ³¹या या पाँसिद, “साचो ज़ ओल्यो, आवलाई सैःन्या सजा अथबा इयालखानाल झाःन्या सजा यान्या स्यासो ते माले,” है लिकेर। ³²नकिन राजा अग्रिपासए फेस्तसलाई, “आव मिँए माहाराजाए ल्योदा बिन्ती दान्या ओमापैव ताकिन गे नोलाई रासून्या गेल्यो,” है दोक्त्यो।

27

पावल रोमदा ओबाव

¹पावललाई इतालिया देसदा लाँन्या याथरैवत छुत कैदीरास माहाराजाए ओफौजीलाव कप्तान युलियस यादोज्ञ्यावए ओपासल ज़ झाःकेर। ²है जैद गे तोबो एद्रामितेनोस सहरनी हुव एसियालाव समुन्द्र छ्योकाव पो पोक बाज्ञ्याव री जहाजल पसिद गेबाके। गेस माकेदोनिया खन्दलाव थेसलोनिके सहरनी हुव तोबो अरिस्ताख्सस ब उलिज्ञ्याव।

³गेबाव हो पराःती सीदोन सहरल केसद जाँवा पै गेलिके। युलियसए पावललाई दया दाद, “ननैरास दैसिद नचाहिन्यार होराए ल्योनी रैयो,” है दोक्त्यो। ⁴नकिन फरी री जहाजल गेबाक गेड़ानी बतास उहुवए, साइप्रस तापुए बतास ओथोरोलाव घ्याँ गेबाके। ⁵नकिन किलिकिया स़ोनो पामफिलिया खन्द झाकाव घ्योःव समुन्द्रलाव घ्याँ बाद, लुकिया खन्दलाव माइरा सहरड केसद, नो इडाडाव जहाजनी झरिद, ⁶गेसकाव कप्तानए तोबो अलेक्जेन्द्रिया सहरनी हुव इतालियादा बाज्ञ्याव जहाज दैद नल झाःसिक्त्यो। ⁷नो जहाजल मनी, बतास गेड़ानी हुद कुधु दिनत बल्ल क्नीदस सहर नजिकक गेकेसके। हुकिन होदा, गे बाव गेपैज्ञ्याव येमदा बतासए बाव ओमायासिउए फरी क्रेत तापुए बतास ओथोर्ज्ञ्याव सालमोने यादोज्ञ्याव पोलाव घ्याँ गेबाके। ⁸नकिन बनै ज़ धो धो तापु छ्यो

छचो बाद लासिया सहर लापकाव 'चाव बन्दरगाह' यादोज्याव जहाज थकनैन्या पोल गेबाके।

१नक पै केसून्या कुधु दिन गेझाःधुवए ज्यूँःव साहा हुनाद उलिज्याव। नो साहाक बतास दाद समुन्द्रल बान्या बनै ओछ्यास ल्यो ओताज्याव। है जैद पावलए नो जहाज चलैज्यावरालाई, 10 “अ डादाज्यु भाइर, गे आथ पाला गेबाकिन जहाजलाव सामानर सोनो जहाजलाई मनी कुधु नोक्सान तारिज्या। गेजिउलाई मनी ओछ्यास ल्यो ज़ लिज्या,” है ओरादोज्यावत ब, 11 नोए ओपाँ कप्तानए काता माँःती माडम्सिद, बुरू जहाजए ओगेँ सोनो जहाज चलैज्यावनी निपाँ कोसै भैःके। 12 हो सोनो ज्यूँःव साहाक नो जहाज थकनैन्या पोल लिन्या जाँ माज्यासो उलिज्यावए नो जहाजत बाज्यावर जाँकोसैए नो क्रेत तापुत छ्यावा होकसैकाव फोनिक्स सहरदा बान्या जैकेर। नो सहर दखिन-पछ्युँ सोनो उतर-पछ्युँदा फर्किउ जहाज नैन्या पो थुमो उलिज्यावए युँदा भरी नक ज़ लिन्या थरैकेर।

समुन्द्रलाव आँधी

13 हाःत ज़ दखिन त०नी बनै चाव बतास स० स० हुद जहाज चलैज्यावराए 'अब ते गेकेस्या' लिद नो जहाजलाई अदैज्याव झँए साँगललाई रीनी सेल्द क्रेत तापु छचो छचो ज़ गेबाके। 14 हाःत ज़ उमँःजानी उतर त०निकाव तापुनी ल्यो माल्यो बतास गेतर्त हुद, 15 जहाजलाई आदानी होदा ख्याक्यो। बतास त०दा गेमालाँधुवए जहाजलाई गेरास्क, बतासए झन समुन्द्र माँजल ज़ लाँसिक्यो। 16 बल्ल बतासलाई जाँ थोर्ज्याव क्लौदा यादोज्याव जिम्जा तापु छींक गेकेसनाक जहाजए ओर्मेःताव सुर्सिउ आदा होदा लिन्या दोङ्गालाई सेल्द बनै दुखस छींद जहाजल गेझाःके। 17 'रीए जहाजलाई मनी सुफुवा' लिद घेप्पा तारए बनै ज़ कस्कैकेर।

लिबिया छचोकाव उर्जी माल्यो बगरल गैन्या ओछ्यास ओतावए नो जहाजलाई सेलज्याव क्वार सतेद्याद बतासए ओभरत ज़ रास्केर। 18 हो परा:ती आँधीए जहाजलाई पावा पावा ओजैवए जहाजलाव सामानर ब हाइद रील याराख्याकेर। 19 हुकिनकाव हो परा:ती जहाजए ओजार ब याराख्याकेर। 20 कुधु दिन पै आँधी बाबत ताद निमी सोरोर ब यामारै:ज्यावए, 'गेमारहिके ब' लिद गेयूर स्यासे गेसतेके।

21 ज्यावर गेमाज्युव कुधु दिन ओतावत पावल प्राइँए ड़ाक च्याँ:सिद, "अ डादाज्यु भाइर, डा जेलाई है डादाचिउ पाँर भै:द क्रेत तापु जेमारसो ताकिन आ: नोक्सान तान्या ओमाल्यो। 22 हैदी ब जेयुँ स्यासे तासतेच्यो — जहाज वाज़ खदम तारिज़्या, गे मिँर ते सु ज़ सिन्या गेमाले। 23 आछ्या रील ओसेवा डादोज्याव डापरमेस्वरए ओचाकर्या डाल्योक सरै:सिद, 24 'पावल, ताछे:नी। नँ जुनी ब माहाराजाए ओड़ाक नच्याँ:सिरिज़्या। नँस बाज्याव ननैर मनी परमेस्वरए ओदयानी बाँचिरिज़्यार,' है दाँक्यो। 25 है जैद डानैर, जेयुँ होलाँ जैचिके। परमेस्वरए है ओदाँव मिताव जुनी ब तान्या ज़ ले लिद डायुँ हुबो ज़ लिज्या। 26 खाली गे तोबो तापुत उर्जी माल्योल गर्न्या गेले," है दासिक्यो।

री जहाज उचिसो

27 बतास ओदोव चौध रात ओतावत एद्रियास समुन्द्रल बतासए गेजहाजलाई आदा होदा उहुतैनाज्याव। आधा रील री छचोदा गेहुव मिताव डम्सिद जहाज चलैज्यावराए, 28 'उर्जी खा उलिज्याव' लिद यागोइँक चालीस मितर ताके। नकिन जाँ होकसैकावक फरी यागोइँक तीस मितर ताके। 29 'जहाज घ्यो:व घ्यो:व पहर जीदा थुक्सिया' लिन्या छ्यासए जहाज अदैन्या झँए साँगलर ओमै:तिन चारता यारासतेकेर। हा:किन 'नम खर्क सँके' लिद कींद ज़ गेझा:के। 30 हा:त ज़ नो जहाज चलैज्यावराए धो:न्या निउँ तोबो जैद,

‘जहाजए उसुनी धूँलाव झँर मनी पलाःद सतेव ताके’ लिद नो आदा होदा लिन्या ज़िम्ज़ा दोङ्गालाई रील झरैकेर। ³¹ पावलए याचाल सैद कप्तान सोनो सिपाईरालाई, “आवर जहाजल गेस यामारहिकिन, गे भरी बाँचिन्या गेमाले,” है ओरादोक ते, ³² नो सिपाईराए दोङ्गाए ओचेंर चम्द बगैद याराएकेर।

³³नम उसंनाक पावलए प्राइँलाई यारुँर सझेंःद्याद, “आछिम पै जेसोगोए काता ज़ माज़्याद जेल्यो चौध दिन जेताके। ³⁴ है जैद आछिम जेसार् सपरीन्याए जूँनी ज़्यावर ब ज़्युव ताके। गे सु ज़ मासिद तोबो गेमुल ब गलिन्या माले,” है दाद, ³⁵ उकुइत भरेस रैद प्राइँए याङ्गाक परमेस्वरलाई धन्याबाद चरैःद केःद ज़्युक्यो। ³⁶ हाःत ज़ उपुर्काव भरिए पाला यारुँ होलाँ जैद या मनी ज़्युकेर। ³⁷ नो जहाजल लिज़्यावर, गे भरी प्राइँ झाःद, नेसय छयहत्तर जना गेल्यो। ³⁸ है जैद गे भरी गेफू तसी ज़्याद, जहाजए उगुर सोबोमन्याए जूँनी नो गेसयेलो गेदा भरी रील याराख्याकेर।

³⁹नम छेलाला उसँवत ‘आव काता पो ओताव?’ लिद सुए ज़ माथरैधुकेर। खाली तोबोक ओधाँद माल्यो छेरारान्व पो रँःद ‘गेधुवा पै जहाजलाई नड ज़ लाँव ताके’ है लिद, ⁴⁰ नो जहाजलाई अदैज़्याव सतेसिउ झँए साँगलर चम्द रील ज़ ख्यानैद, जहाजए ओडै आदा होदा दल्कैज़्याव दाबीलाई मनी चलैन्याए जूँनी पलाःकेर। नकिन बतासए फुलैद जहाजलाई सेल्ज़्याव क्वार तङ्गैद नो छेरारान्व पोदा यालाँज़्यावत ज़, ⁴¹ री जीलाव बालुवा बोर्सिउत तोल्द जहाज होल ज़ गैके। ओडै बनै चोइस उतूँसिउए कै जैद ब माहाइधुकेर। उछीनीकाव रीए छल्काए जहाजलाई बनै प्रोद पानाक्यो।

⁴²हाःत ज़ सिपाईराए, ‘आलाव कैदीर हाइसिद धोःर्या’ लिद सैःव पैकेर। ⁴³ खाली कप्तानए पावललाई जोगोइव ओपैज़्याव। है

जैद नोरालाई भें:द मायाद, “जे रील चेलून्या सैज्यावर झादा रील ज़ो:द पाखादा पुलुसचिके। 44 चेलून्या मासैज्याव भरी जहाजलाव फल्यार, काता कातार हाइद नत ज़ बाचिके,” है लिद याअर्थैक्यो। है जैद तोबो ब कै मै माताद ज़ प्राई पाखात गेपुलुस्के।

28

माल्ता तापुत

1गे भरी कैज़ माताद पाखात गेपुलुसो प्राईना ‘आव तापुए उमिन माल्ता ची ओल्यो’ लिन्या गेसैके। 2 नकाव लिज्याव मिंराए गेलाई रें:द यायुं नाद दया दासिकेर। नम फाइ फाइनी फुइ फुइ जैद बनै उजूयू:वए में:र दाद्यासिकेर। 3 पावलए सीं तकर रैद में:ल ओझा:क में:ए ओघम्काए घुल तोबो पुलुस्द पावलए उकुइ दा:दिक्यो। 4 नो तापुताव मिंराए उकुइत घुल उञ्जुन्दिउ रें:द, “ओहो! आव मिं ते ज़्यानमारा ज़ ओल्यो ताखेहो। ना:ल्दिउ रीनी उजुगिदी ब न्यायनी ते बाँचिउ मादैक्यो,” है लिकेर। 5 खाली पावलए उकुइ फरैद घुललाई में:ल ख्याक्यो, ओल ते कैज़ माताके। 6 तापुताव मिंराए ते, ‘जुनी ब गोद सिए’ लिद चिऊद यानैज्याव। कुधु पै चिऊद ब कैज़ ओमातावए, हा:किन “आव मिं ते देवता ची ओल्यो,” है लिकेर।

7नो तापुताव याघेप्पा पब्लियसए ओएँ:र उझिमर नजीदा ज़ यालिज्याव। है जैद नोए गेलाई दया दाद सोंला पै बनै चावस ज़ नैसिक्यो। 8 नोए ओबाबु फू बान्या बेथाए ओजोरो हुद थलिद उलिज्याव। पावलए नोलाई चिऊनाद परमेस्वरलाई पोंखारिद, ओक्याँत उकुइ नैद ओयोत, होक ज़ गराँके। 9 हा:किन नो तापुताव मिंराए ‘पावलए अइ जैक्यो’ लिन्या थैद याजोरो हुवर प्राई ओल्योक हुद यासगराँसिहुज्याव। 10 है जैद गेलेवा भरी नो तापुताव मिंराए गेलाई बनै मानस ज़ नैद, गेबान्या छचाम ओतावत येमताव गेज्यावर ब झा:द्यासिकेर।

रोम याकेसो

11माल्ता तापुत सोमैना गेतावत तोबो अलेक्जेन्द्रिया सहरनी हुव जहाजत गेबाके। नो जहाज युँदा भरी नो तापुत नैसिउ उलिज्याव, ओडैत जोडोल्या देवता यादोज्यावए ओअडग्या खुपिसिउ उलिज्याव। 12माल्ताकिन सुराकुसाई सहरक बाद सोला पै नक ज गेलिके। 13नकिन फरी बाद इतालिया देसलाव रेगियन सहरल गेकेस्के। नल तछा गेतावत दखिन त०नी बतास चलिद नेलात ज पतिओली सहरल गेकेस्के। 14नो सहरल येसुए ओपाँत बाज्यावरास गेदैसिक, नोराए 'गेस ल्यो ताके' है यादासिक ते नोरास तसाता पै गेलिके। नकिन बल्ल रोम सहरदा ज गेबाके। 15रोमलाव यायुँ हुबोराए 'हुज्यार दी' लिन्या थैद रूवार अप्पियस बजारक पै, रूवार तीन-भत्ती बजारक पै गेलाई चिहुसिकेर। पावलए नोरालाई रँ:द उयुर होलाँ ताद परमेस्वरलाई धन्याबाद चरै:क्यो। 16रोम गेकेसोत पावललाई तोबो सिपाईए ओपासल इयालखानाकिन अछतड तोबो झिमल ल्यो एकेर।

पावलए रोमलाव यहूदीरालाई ओरासथैव

17पावल सोला ओतावत नलाव यहूदीराए याघेपपारालाई दुपद अइ लिद यासथैक्यो, "अ डादाज्यु भाइर, डा गेजिज्यु बाज्युराए याचलन सोनो गेजातलाव मिँरालाई काता ज बले:द डामाराएदी ब, यरूसलेमलाव यहूदीराए डालाई क्यो:द रोम सरकारए ल्योदा सँपिनाकेर। 18रोमीराए डापाँ फाल्द डालाई सै:न्या स्यासो काता ज मादैद रासो यापैज्याव। 19डामीं यहूदी दाज्यु भाइराए याउपत काता खतर लैन्या पाँ ज ओमाल्यो, खाली यहूदीराए ते इन डालाई रासन्त्या पाँलाई यामाभै:वए माहाराजाए ल्योदा बिन्ती दान्या कर ज लागिके। 20खास डा इस्राएलीराए आस दाद यानैज्याव खीसए उजूनी है डारादोवनी ज डालाई इताव साँगलए किद नैनार। है जैद नो पाँर जेलाई है दान्याए जूनी आछिम डाखुलचिउ," है ओरादोक ते, 21नोराए, "गे आ:पै यहूदिया देसनी नँ नजूनी काता चिथी ज

गेमादैताए। ननी हुज्याव गेमींराए यायाःनी ब नजूनी माचाव काता ज़ गेमाथैताए। ²² खाली प्राइँड ज़ जे स्त्रीस्त्यानराए जेजूनी 'आवराए यापाँ थिक माले' है यालिज्याव वाज़ गेथैज्या। है जैद जेपाँ किताव उलिज्याव, गे मनी तखेप थैव ताके," है दोकेर।

²³ है जैद 'आव छचाम दुप्सिउ ताके' लिन्या याथरैव छचाम यहूदीर पावलए उझिमक ओपाँ थैना काला मुलु हुकेर। हो छचाम छकालन्याकिन रिमक पै पावलए नोरालाई परमेस्वरए ओराज्यालाव पॉर पलास्द्याद, मोसाए ओकानुन सोनो अगमबक्तराए येसुए उजूनी यासरो भरिनी थरैद्याद यायुँ सुहुपद्यान्या धामा दोक्यो।

²⁴ नोर ख्वाराए ओपाँ चावस थैद नो पाँत यायुँ हुपके, ख्वाराए ते माभैःकेर। ²⁵ है जैद या या माखैद ननी पुलुसूद याबाज्याक पावलए आव तोबो पाँ याडैत झाःद याएक्यो, "जेजिज्यु बाज्युरालाई छैव पुरुसए है ओरादोव पाँ ते थिक ज़ ताद ले। नो पाँ यसैया अगमबक्ताए अइ लिद सर्द नैद यायो,

²⁶ 'आव मिँरालाई है यादोनाके,
थैन्या ते जेथैज्या, जेमातीधुइ।

रँःन्या ते जेरँःज्या, जेमासरेसुधुइ।

²⁷ आवराए यायुँ काता ज़ मातीधुन्या भुत्यासो ताद ले।

यार्ना ब सूइसिउ मिताव ताद ले।

यामी ब चिमि जैद यानैज्याव मिताव लिज्या।

निताव यामाताव ताकिन आः झरी यामीए रँःधुखेरहो,

यार्नाए थैधुखेरहो,

यायुँल तीधुखेरहो।

डाल्योदा यायुँ फकैँधुखेरहो।

सोजोकावर ब डाराजैधुखेहो।'।

28है जैद आव ब सैच्यो – आछिमकाव जेथैव परमेस्वरनिकाव हुव बाँचैन्या पाँर जेल्योड मारहिद छुत जातलाव मिँराए ल्योदा बारिज्या। नोराए ते झन थैन्या लेर।” 29 [पावलए आव पाँ है ओरादोवत यहूदीर या या खर्लेसिद पुलुस्द बाकेर।]

30पावल रोम सहरल झिमए किराया फोःद नेरिम भरी नल ज़ लिके। उझिमक हुज्याव भरिरालाई चावस सुम्द, 31 परमेस्वरए ओराज्यालाव पाँर सथैद, घ्योःव युँस प्रभु येसु ख्रीसए उज्जनी ब पलास्द ओराएज्याव। नो येनत सुए ज़ यामावैज्याव।

साःरो बाचा

Kham, Western Parbate: साःरो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd